

أفضل في الصالون

محمد محسن

أفضل في الصالون

محمد محسن

الطبعة الأولى (سبتمبر ٢٠١٦)

تصميم الغلاف: سالي عبد الرحمن

المراجعة اللغوية: هبة النجار - التنسيق الداخلي: إسلام علي

مدير النشر: همد عبد الله (نور مانجا)

إشراف عام: رباب فؤاد

رقم الإيداع: 2016/16774

الترقيم الدولي: 978-977-6534-17-9

جميع الحقوق محفوظة

للكاتب ودار الفؤاد للنشر والتوزيع، وأي اقتباس أو تقليد أو إعادة طبع أو نشر أي جزء من هذا العمل، سواء إلكترونياً أو فوتوغرافياً أو أي شكل آخر دون تصريح كتابي موثق من الناشر، يعرض مرتكبه للمساءلة القانونية.

هذا الكتاب يحمل رأي ورؤية الكاتب وحده، ولا يمثل الدار أو العاملين بها. جميع أحداث وشخصيات الرواية من وحي خيال الكاتب، وأي تشابه بينها وبين الواقع هو من الصدفة لا أكثر.


**دار
الفؤاد**
للنشر والتوزيع

Alfouad_publishing@hotmail.com
facebook.com/fouadpublishing



أفضل في الصالون

(رواية)

محمد محسن


دار
الْفؤاد
للنشر والتوزيع

♥ إهداء ♥

إلى أمي مصدر طاقتي.. إلى أبي ظهري ودرعي.. إلى إخوتي:
(ميرام).. (أحمد).. (أميرة).

إلى جدتي رحمها الله.

إلى صديقي (محمد فخري) رحمه الله.

إلى أصدقائي (سراج فوزي المعلم خيرى محسن أنور وتوحو)..
(عيطه العدوي بيومي غزو بندق ومصطفى كامل).. و(هيثم
مدكور عمرو سالم خالد ميدو البيضاء وميدو السودا).. (وليد
شوقي بلال وطارق).. (ذكروري عزت عبد القادر خالد
وعادل).. (أسامة الهادي).. (أسامة سامي).. (رامي عصام)..
(هاني سرحان).. (طحان كريم رضا النجعاوي وتيفا).. (أحمد
عصام).

إلى (دينا طارق ونهى).. (داليا أحمد محمد ندا وفيروز)..
(بودي وسارة).. (محمد [اللي كان خالد] مي أحمد ونادر)..
(محسن ومنة).. (نسرين وعز) (رباب سارة وبوسي).. (رامي
رغدة والأنف).. (أحمد السقا ويسرا).

إلى كل حد عملي Follow .. Like .. Share .. شجعتني
بكلمة ولو مجاملة.

إلى (الماك رويال).. (حمص الشام).. (عمرو دياب)..
(العجمي).. (جنيفر أنيستون).. جون (أبو تريكة) في
الصفاسي الدقيقة ٩٢.. الشيخ (مشاري بن راشد).. عصير
البرتقال.. ملعقة العسل على الصبح.

أنتم من صنعتموني..

شكراً ♥

المقدمة

إذا كنت تريد أن تعرف

- هل مات عبد الناصر مسمومًا.
- أين يوجد المسيح الدجال؟
- هل انتحرت الفنانة سعاد حسني أم اغتُيلت؟
- هل يوجد مخطط صهيوني لإيقاف اللاعب (محمد صلاح)؟
- هل مازال عمر سليمان حيًا؟
- ما هو العمر الحقيقي لنهايتهم؟
- كل الاسئلة دي وأكثر..
- هتلاقوا أجوبتها..

بس أكيد مش هنا..

الكتاب اسمه (اتفضل في الصالون).. فأکید بيتكلم عن جواز الصالونات!!

(اتفضل في الصالون) مش رواية.. هي شوية مشاهد، بعضها ساخر وبعضها درامي، يربط بينهم خيط رفيع.

المقدمة بجد

لا أعلم، هل حقيقة الحب أنك صاحب الاختيار؟ أم أنها حقيقة السعادة في حد ذاتها؟ أن لك مطلق الحرية.. لست مقيداً! من الممكن عدم تقبل نفس الاختيار لمجرد إحساس بسيط أنك مجبر عليه! تخيل معي أنك تدخل أحد المطاعم، فلا تجد في قائمة الطعام سوى نوعاً واحداً فقط.. فحتى ولو كان المفضل لديك لن تكون على راحة تامة في اختياره مثلما لو كان ضمن العديد من الاختيارات! نعم السعادة في الاختيار، وإن أخطأت الاختيار حتى! فالله مميّز الإنسان عن الملائكة بالاختيار؛ فالإنسان مُخَيَّر في محيطه، مُسَيَّر بوجوده في هذا المحيط بالتحديد!



اجتمعت اللجنة لتقييم آخر مجموعة من القصص المقدمة لمسابقة أفضل قصة رومانسية لعام ٢٠١٥؛ فهذا هو آخر يوم بعد عدة أسابيع من العمل الدؤوب. دخل (هاني) الموظف الجديد.. لم يمر سوى أسبوع على عمله بالمركز الثقافي.. دخل وفي يده دوسيه يحتوي على العديد من أوراق (الفلوسكاب). تقدم ناحية الأستاذ (منير) رئيس اللجنة، ذو اللحية البنية والشعر المجعد. ابتسم له ابتسامة روتينية، وقال:

- "دول يا باشا اللي فاضلين.. النهاردة إن شاء الله هنخلص من الفيلم ده"

رد الأستاذ (منير) في ضجر، وقال:

- "باشا!! انت بتكلم فنان يا (هاني).. مش تاجر عربيات!!"

تملك التوتر (هاني)؛ فهو حديث التخرج، ليس لديه من الخبرة إلا القليل. نظر (منير) جواره إلى زميلته في اللجنة.. الدكتورة (روزا) ذات الأعين الزرقاء والقوام المعتدل، رغم أنها أتمت الأربعين إلا أنها مازالت محتفظة ببطأتها. مال (منير) ناحيتها، وقال:

- "آدي يا ستي الشباب اللي بيقدّر الفن! يقولوا أنا (يا باشا)!"

ثم نظر إلى (هاني) المتصبّب عرقاً، وقال ومازالت نبرته حادة:

- "اتفضل يا أستاذ.. وريني الدوسيه اللي فاضل"

تقدم (هاني)، ولكن ارتطمت قدماه بمنضدة صغيرة أمام المكتب. فتناثرت الأوراق من الدوسيه بعضها على الأرض، والبعض على المكتب، واختلطت الأوراق ببعضها. وقف (منير) غاضباً قائلاً:

- "يخرب بيتك! لخبطت القصص على بعض! هنعرفهم من بعض إزاي!؟"

كان (هاني) يجمع الأوراق في توتر أكثر مما كان عليه، فقال وهو يحاول ترتيب الأوراق:

- "ما تقلقش يا باشا.. قصدي.. قصدي يا سيادة الفنان.. دول تقريباً تلت قصص"

رد الأستاذ (منير) في استياء:

- "وعرفت منين يا فالح؟"

نظر (هاني) إلى (منير) بابتسامة، حتى يوحي له أنه على حق، وقال بثقة، وهو ينظر للأوراق:

- "أصل فيه قصة مكتوبة فصحي واثنين بالعامية.. والي بالعامية واحدة على لسان بنت، والتانية على لسان ولد.. يعني تلت قصص"

وضعت (روزا) أصابعها على كتف (منير) تضغط عليه لأسفل، كي يجلس مجدداً... كانت لمستها بمثابة مهدئ.. قالت بمنتهى التعقل:

- "محصلش حاجة.. خير خير.. إحنا بقالنا أسبوع شغالين متواصل.. يمكن مضغوطين شوية.. خلونا نبدأ يا جماعة.. اقرأ يا (هاني) أول قصة عندنا النهاردة"

لم ينظر (هاني) إلى (منير)، وبدأ في قراءة أول قصة، وقال:

- "دق الباب.. هي على يقين من أنه هو؛ فهي لا تختلط عليها الأمور؛ فلا تستطيع أن تفرق بين دقات قلبها ودقات الباب، إلا حينما يكون هو من يطرق بابها.. وهي بالفعل في انتظاره فقد قضت ساعتها السابقة في محاولاتها للتزين حتى تبدو في أبهى صورها لتليق بنظرة عينيه العاشقة..

أشارت لوالدتها بأن تتراجع، فهي من ستجيب الطارق.. أوقفتها مرآة في طريقها، فلم تستطع تجاهلها حتمًا.. فعلاقة المرأة بالمرأة...

قاطعه (منير):

- "بصراحة يا جماعة.. أنا مشدود شوية، ومش هقدر أسمع فصحي.. اقرأ لنا قصة من قصص العامية يا ابني"

ثم نظر (منير) إلى (روزا)، وقال:

- "ده بعد إذنك طبعًا"

بحث (هاني) سريعًا عن القصة الثانية، ثم قال في حماس:

- "أنا همرا قصة الولد"



(١)

ثم شرع (هاني) في قراءة القصة:

~~~~~

"يا أهلاً! يا أهلاً! ده انتوا نورتونا، وزارنا النبي، والجو النهاردة حلو، والدنيا زحمة.. يا أهلاً وسهلاً! يا أهلاً! يا أهلاً"

أم العروسة كانت بتحاول تقطع الصمت اللي مسيطر على القعدة.. لكن رجعنا له تاني.

تبادل إطلاق نظرات سريعة بين أطراف العائلتين.. لحد ما أصابت نظرة عين العروسة.. وشها احمرّ.

ماما قامت قايلة:

- "إحنا نسيب الولاد لوحدهم؛ عشان يبقوا على راحتهم"

قمت قعدت جنبها، وقتلتها:

- "إنتي عارفة إن دي أول قعدة ليا"

- "حلو أوي يا جديد.. دي الـ (٩٩) ليا.. يعني هجيلك من الآخر، ونختصر"

- "اتفقنا"

- "أنا حاطة رموش ولينسز.. والقصة اللي طالعة من الإشارب كاويها وصابغاها.. عشان تتخيل إني (blond) مع إنك عارف إني من فيصل"



- "دي جزمة (سامح) الـ (timberland) ودي ساعة (سامح) الـ (guess) والماديلية اللي عليها علامة (بي إم) دي المفتاح اللي فيها بتاع (فيرنا)"
- "أنا لما بصحى من النوم ببقى منعكشة وشبه (مارسيلو)"
- "وأنا برفص وأنا نايم وممكن أديكي واحدة تكسرلك الحوض"
- "قبل ما تتجوزني عايزاك تذاكر بيولوجي عشان تعرف إن جسم البنت فيه هرمونات ممكن تتغير.. وبالنسبة لـ (هيفاء) و (نانسي) و (سارة سلامة).. الناس دي مابتخضعش لقوانين البيولوجي دي"
- "وأنا هكّرّش.. ومش هبطل شرب بيبسي"
- "ساعات بحط على وشي زبادي وخيار وعسل وكول سلو.. بتبقى ريحتي بنت كلب.. أه أنا مش حاطة (Gucci)"
- "وقت الماتشات مش عايزك تطلبي مني حاجة.. ساعة الماتش اعتبري نفسك أرملة"
- "بص أنا مش بتاعت قمصان نوم وجو (فيكتوريا سيكريت) ده.. أنا برتاح في ترينينج أديداس مكتوب على ظهره ٢٢ ومش هغيره"
- "وأنا مابلبشش بيجامات وروب وجو حسن كامى ده.. لبس البيت عندي لبس الخروج اللي قدم.. فمممكن تلاقيني لابس بنطلون بدلة على تيشيرت الميلان"
- "إحنا بينا حاجات كتير مشتركة"
- "وأنا ارتحتلك أوي.. يبقى الخميس الجاي"

- "خليها الجمعة أحسن عشان ألحق أروح للكوافيرة، ولا انت بتحب  
الاشنبه؟"

- "اشنبه!!؟ لأ!!!!!!!!!!!!!!!!!!"



صحيت من النوم على الكابوس البشع ده.. اللي بيتكرر معايا تقريبا كل  
أسبوع.. الساعة خمسة ونص الصبح.. الجو تلج.. الأيام دي بقيت بصحى  
بدري.. معرفش ليه الواحد بقى بينام كتير وبرضه مش بينام كويس.. زي ما  
يكون وهو نايم مخه صاحي!! النوم بقى غريب أوي.. الواحد كل يوم قبل  
ما ينام لازم ضميره ما ينيموش.. يفضل ساعة يتقلب في السرير وضميره  
بيطارده.. مره يجيله في شكل الشيخ (وجدي غنيم).. "عاجبك حالك؟  
هتدخل النار حدف.. إنت مابتصليش ليه؟! بتسرح في الصلاة ليه؟! بتبص  
على البنات الجامدة أوي دي ليه!؟".. وفجأة ضميري بيتحول وييجي على  
هيئة الكابتن (حسام عاش) بتاع الـ(GYM).. "لا! لا! إنت تخت جامد من  
عند منطقة البطن والجوانب والخدود ولغود.. لازم تحرق سعرات يا  
(محمد) بكرشك ده.. مفيش شوكلاتة! آه مفيش شوكلاتة! ولد!!!!"..  
بعدها يجي في صورة صاحب أبويا، اللي معرفش اسمه، وبنقابلة بعد صلاة  
الجمعة.. "مش هتفرحنا بقى يا حمادة!؟".. طب أعمل لأمك إيه يا عمو  
عشان أفرحك؟! أقولك نكتة؟ ولا أجيبلك شوكلاتة؟... "مش قلنا مفيش  
شوكلاتة!؟.. ولد!!!!" وبيفضل ضميري كل شوية يلبس شخصية، ولا كانه  
(عزب شو) في ليالي أضواء المدينة!!!

قمت من النوم بصيت في موبايلي.. محدش عبرني.. لا ميسد، ولا ماسدج!  
وأنا مستني مين أصلاً يعبرني!؟ مفيش غير مسدجات الرصيد.. (سلفني

شكرًا.. ادفع الي عليك، وخلي عندك دم).. وأدفع ليه؟! وهكلم مين؟! ده  
حتى نمر البنات الي عملت مجهود خرافي عشان أجيبها أيام الجامعة.. ده  
أنا كنت ساعات باخد كورسات في مواد مش عندي عشان أظبط رقم بنت..  
دلوقتي كل فترة أمسح رقم واحدة عشان اتخطبت ولا اتجوزت!!



## باور رينجرز وقت التحول

لقيت ماما صاحبة من بدري كالعادة.

"أحضرك الفطار يا (حمادة)؟"

قلتلها: "آه".. ومش حاجة غريبة إن واحد عنده 28 سنة وحمادة.. وعلى  
الفطار بأة ماما بدأت سيناريو كل يوم..

"أنا عايزة أفرح بيك بأة يا (حمادة)"

قلتلها:

"يعنى أنا يعني الي مليش نفس أفرح يا ماما؟!"

ومش عارف ليه سيرة الجواز دي مابتحلاش إلا على الفطار ولا الغدا؟! زي ما  
يكونوا بيدلوني عشان بيأكلوني، وهو ده المقابل! بصيت ليها وأنا عمال أفكر  
في تاريخ العرايس الي كانت بتجيبها.. وبالتحديد لما كانت ماتعرفش تجيب  
صورة للعروسة! مرة كانت بتوريني صورة عروسة مع خطيبها الي سابتته!  
ومرة تانية جابتلي صورة بنت أخت العروسة الي عندها أربع سنين،  
وقالتلي: (دي فيها من العروسة).. مش فاهم.. يعني أخذ الصورة أوديتها

لخبير DNA وواد جامد كده في الفوتوشوب عشان أطلع شكل أخت أمها؟! ولا أجيب الرسام بتاع المجرمين ده يرسملي أقرب صورة ليها؟! عامة الحمد لله عمري ما قابلت واحدة فيهم، ودائماً كنت أطلع منها! قال أتجوز صالونات قال!!

صحيت على صوت ماما، وهي بتقولني:

- "مالها (هايدي) بنت خالتك؟! قولي! مال وجمال وبنت إيه.. تتحط عالجرح يطيب!"

هو أنا هتجوز (كيناكومب)؟! وبعدين إزاي أتجوز بنت خالتي؟! أنا أصلاً كنت فاكرها من المحارم اللي ماينفعش أتجوزهم!! مش قادر أتخيلها تبقى مراقي! واحدة كنت بشوفها أيام ما كانت بضاير.. ضفاير!! ضفاير إيه؟! دي كانت ضفيرة واحدة، وكانت بتبقى طالعة في نص دماغها زي الزعرورة.. وهي أصلاً هتتقبلني إزاي، وهي شافت كل مراحل نموي؟! كان فاضلها تشوفني وأنا نطفة! بنت خالتي ماشافتش مراحل تطوري أنا بس.. دي شهدت على مراحل تتطور شنب.. شنب طفل تحسه معموله سويت.. ثم شنب خفيف مرسوم بقلم رصاص أو قلم تهشير.. ثم شنب عساكر أمن مركزي.. وأخيراً شنب (هشام عباس)، أغنية (حلال عليك)!!

كملت ماما كلامها:

- "طب وموضوع (رانيا) اللي قابلناها في صلاة العيد؟"

ماردتش عليها، وفضلت ساكت مش لاقى رد.

قالتلي:

- "إنت أصلاً مش وش نعمة.. أنا هكلم (رامي) ابن خالتك وأقوله على (رانيا) دي"

قلت لماما:

- "ياريت والله! وبعدين (رامي) كمان ماعندوش مانع في جواز الصالونات.. ده قعد كتير قبل كده"

ماما ردت، وكأنها بتكيدني:

- "خلاص أنا هشيل الأكل، وأكلم (رامي)"

كان فيه كليب لـ(نانسي) شغال، وعيني على (نانسي).. ماما لاحظت، قالتلي: "عيبك يا (حمادة) إنك مركز في الشكل والجسم بس".. قتلتها، وأنا لسة عيني على (نانسي): "يا ماما لأ! إزاي؟! أهم حاجة عندي العقل.. بس أنا ماشي على المثل بتاع (العقل السليم في الجسم السليم الجامد أوي)".



## (عمرو) القديم

قمت ألبس هدومي عشان أنزل الشغل.. فتحت اللابتوب عشان أسمع أي حاجة.. لأ مش أي حاجة.. الهضبة (عمرو دياب)، وبالمناسبة كل ما أسمع ألبوم جديد لـ(عمرو) أقول بس هي دي الأغنية الـ(slow) بتاعة فرحي.. يمكن أنا على الحال ده من أيام (تملى معاك)! ربنا يستر وألحق (عمرو) قبل ما يعتزل.. احتمال أرقص في فرحي على أول أغنية (Single) للهضبة الصغرى.. المقطم (عبد الله عمرو دياب)!!

شغلت أغنية (وماله) وأنا بغير هدومي.. (عمرو) يقول بمنتهى الحنية، وهو ضامم إيديه الاثنين على صدره، يمكن عشان بيحب، ويمكن عشان البرد، ويمكن عشان دي حركة لإرادية:

"وماله لو ليلة تهنا بعيد وسيبنا كل الناس!"

يخرب بيت إحساسك يا أخي! أنا ليه مبقاش زيك كده، وأحب حد، وأتوه في أي حته؟! معقول الواحد بعد ما يسمع الكلام ده يتجوز وخلص؟! يتجوز صالونات!! يعني أبقي شايف (عمرو) عامل كده، وإحساسه واصل لجيرانا اللي في التامن، وأنا أسمع بس!!؟ هو أنا مش هعيش بأة ولا إيبيبيبه!!؟ بس الظاهر وأنا بقول (بأة ولا إيه) كان صوتي عالي شوية.. ماما دخلت مرة واحدة..

- "جرى إيه يا (حمادة) إنت بتكلم نفسك!؟"

- "لا يا ماما.. ده أنا.. ده أنا.. ده أنا بجرب صوتي في (بأة ولا إيه)"

وعدتها تاني.. قال يعني لسة بجرب..

"بأة ولا إيه! إحم! إحم!"



وأنا خارج لقيت ماما فاتحة السبيكر، وبتكلم (رامي) تقوله على موضوع (رانيا).. وبتبصلي نظرة حسرة (ضيعت الفرصة يا حمار).. وقفت شوية أسمع المكالمة، وأعرف رد فعل (رامي)..

- "مش هنفرح بأة بيك يا (روميو)؟"

- "والله يا طنط مش لاقى عروسة"

- "ما تشوف البت (رانيا).. والله عسل"
- "(رانيا) مين يا خالتو؟!"
- "دي بنت قابلتها في صلاة العيد.. قول آه بس، وأنا معايا رقمها.. مسجلاها أهو.. (رانيا عيد الصغير)!"
- "تعالى نحسبها"
- "نحسبها!!!"
- "إحنا ١٠٠ مليون نسمة.. نسبة الإناث ٥٤% يعني فيه ٥٤ مليون أنثى"
- "مالها (رانيا) مش فاهمة!!!"
- "اتقلي يا طنط.. منهم ٥٠% أميين يعني بنتكلم في ٢٧ مليون!"
- "حلو!!!"
- "سن البنات بقى اللي من ٢٢ لـ ٣٤ حوالي ١٠ مليون!!!"
- "مم"
- "لو قسمناهم على عشر محافظات، وقلنا مفيش بنات في المحافظات الثانية يبقى في محافظتي مليون واحدة!"
- "يا حبيبي مليون واحدة تتمناك!!!"
- "قولي نسبة المحجبات منهم ٥٠% يعني بنلعب دلوقتي في نص مليون"
- "نص مليون برضه مش شوية"
- "لا هقولك عنين خضرا، ولا شعر أصفر.. بس قولي متوسطة الجمال.. يبقوا كام؟"

- "قول يا (رامي) ١٠٠ ألف!"
- "أظن من حقي يكون دمها خفيف!"
- "ييقوا خمسين ألف!"
- "نفس المستوى الاجتماعي!"
- "عشر تلاف!"
- "مممكن يحصل قبول بيني وبينهم بنسبة أد إيه؟ مانا مش (ليوناردو دي كابريو)"
- "قول مثلاً ٢٠٠٠ بنت"
- "ونسبة إن أهلي وأهلها يقتنعوا ببعض؟"
- "قول فيه أمل في بتاع ٥٠٠ بنت!"
- "طلعي من الـ ٥٠٠ دول الفيمينست.. واللي مابتحبش ماما، والقماصة، واللي لبسها ضيق، والخنقة اللي بتغير حتى من بنات خالتي!"
- "بس! بس! يتبقى قول خمسين!"
- "قابلت أنا منهم ٤٩"
- "يتبقى واحدة!!"
- "تفتكري الواحدة دي هتبقى (رانيا)؟!"
- "(رانيا) مين؟!"
- قعدت أضحك جامد على (رامي)..
- وقفت على الباب..



- "آه.. ماتنشاش تطلع الزباله.. وما تنشاش تجيب عيش.. وماتنشاش سوسته البنطلون مفتوحة"



♥♥♥♥♥

وقفت لحد ما جه تاكسي.. ركبت.. السواق كان في أواخر العشرينيات كده..  
لابس نظارة شمس، وحالق طبعاً كابوريا زي (أحمد زي [سابقاً] - نيمار  
[حالياً]).. ومربي الضافر الصغير اللي في إيديه اليمين.. وفايحة منه ريحة  
الكيلوبترا والطعمية.. وكان صوته إبيه.. أنا أعرف خرير الماء.. سهيل  
الحصان.. ده بقى كان شخير الخنازير! وأكثر حاجة بيعملها يشتم اللي  
يعديه ويدي كلكسات.. يشتم ويدي كلكس.. شتيمة.. كلكس.. لأ وشتايم  
إيه.. أول مرة أسمعها في حياتي.. مش الشتايم اللي إحنا نعرفها.. لااااا! ده  
شتايم مركبة.. يا ابن بنت عم اللي راحت، وجت، وودت، ومش عارف مين  
خد إيه فين! ماتفهمش الشتيمة فيها تورية قليلة الأدب، ولا الشتيمة ليها  
بُعد سياسي! شتيمة كده تحسها إخراج (يوسف شاهين)!!

كان مشغل أغنية الحقيقة معرفش مين اللي بيغني ولا بيقول إيه.. بس  
تحس إنه صوت شخص راضع من إنسان آلي.. وواضح إن المغني كان زعلان  
أوي.. ومع إن مش باين ولا كلمة من اللي بتتقال كان السواق بيغني معاه  
عادي.. تقريباً كان شكله عارف المغني زعلان من إيه!! كان السواق بيعلي  
صوته في حت، ويقول: "آآه يابت الكلب! آآآه!".

حببت أفتح حوار قتلته:

- "هو انت مابتسمعش (عمرو)؟"

بصلي كده، ورفع حاجب اللي هو بيفتكر في (عمرو دياب)، وقال:

- "(عمرو الجزار).. ده متربي المفدل"

جزار مين؟! حاولت أفكره، قتلته:

- "بتاع (وياه)"

قالي:

- "آآآآآه! تملي وياه!"

- "عليك نور.. إلا قولي يا أسطى.. انت بتحب ولا إيه؟"

قام رافع إيده اليمين كده نحيتي، قتلته:

- "كنت لسة هسألك مابتقصش ضافرك ليه يا معفن!؟"

قام مقاطعني، وهو لسة رافع إيده، وقايل:

- "يا باشا أخوك خاتب من سنتين.. وكنت ارتبّت بيها خمس سنين.. لولا

أخوها ابن ال.... أفشني معاها.. كان زماني لسة مرتبت، ومزاجي حلو"

قتلته:

- "ممم.. والارتباط ده بقى عن حب.. ولا إزاي؟"

قام راجع بظهره ورا كده، ورافع راسه، وأخذ نفس عميق على أساس بيفتكر

الذكريات، وقالي:

- "لأ أنا كنت ماشي لقيت فيها المواصفات اللي أنا عايزها.. بس إيه..

بالميللي"

- "إيه بأة المواصفات دي؟"

- "أبدأ.. كابوتة، وشتنة عريضة، وتبقى فابريكة.. ماتلمستش يا بيه"

إيه ده هو أنا ما فهمتش الإجابة للحظة، ولا أنا نمت وصحيت على إجابة

سؤال ثاني!؟

أنا: "طب يا عم لما إنت بتحب وهيمان.. بتسمع في أغاني نكد ليه على الصبح!?"

السواق: "بنت الجزمة مبيعاني اللي ورايا والي قدامي.. اتفقنا على النص بالنص"

أنا: "إيه لسة فاضلك حاجات كتير?"

السواق: "عسارة البرتقان.. مدرب بيد كهربا.. شمعدانات لزوم رومانسية.. شيالة الكحك.. معلقة الجيلاقي.."

كنا وصلنا المحطة، ولسة ماخلصش اللي فاضله، فقلتلته:

- "خلاص على يمينك هنا يا أسطى"

السواق: "أنااعة البيتسا.. تقم الكاتوه.. كاسات جيلى.. قلاية بتاتس من غير زيت.."

أنا: "يا باشا على يمينك أحب على إيديك.. المحطة عدت"

وقف بالتاكسي في نص الطريق.. مابصليش.. نزلت.. لسة بطلع الفلوس أحاسبه.. قام ماشي من غير ما ياخذ الفلوس، وهو بيكمل:

- "كَلَاية فشار.. أوالب كيك.. ناقص تقولي قشارة لب أسمر.. آه يابت الكلب  
آآآآآه!"



# ما تقولش لحد

دخلت محطة المترو.. مكانتش زحمة أوي يعني.. كان فيه كنبه في نص رصيف المترو.. قاعد عليها بنت كده بتاعة ٢٥ سنة، قاعدة لوحدها.. والناحية الثانية كان فيه ولد وبنت لابسين أحمر زي بعض.. مطقمين سوا.. واقفين على أول رصيف المترو بيتهامسوا كده ومندمجين على الآخر.. رocht قعدت على الكنبه جنب البنت، بس على جنب أوي بدل ما تفتكرني بعاكس.. أهو دقيقتين على ما المترو ييجي.. بس لقيت حاجة غريبة على الكرسي، لقيت محفور [(أمير) بيتزرفففت..... ويحب (ياسمين)!!] يادي النيلة! هو (أمير) ده ورايا ورايا؟! ييراقبني ده ولا إيه؟

ريحت ضهري على الكنبه مستني المتزو.. واقف قدامي الولد والبنت.. الواد  
إيه عاملها فيها (تامر).. فاتح زراير القميص لحد زرار البنطلون تقريباً.. مش  
عارف ليه الولاد متأثرة بموضة شعر الصدر دي دلوقتي بس.. مع إن (تامر)  
أصلاً جايها من (سيد زيان)!! والبنت كانت عادية، لا حلوة ولا وحشة..  
بس الحق يتقال البت كانت شنطة وكابوت!!

قعدت أبص عليهم أوي.. مش أنا بس البنت كمان الي كانت قاعدة جنبني كانت بتبص بنفس نظرة (أنا عايزة من ده يا حزمبل أنا عايزة من ده!!)!! وقعدت أفكر يعني أرخم وقت بيعدي عليا في حياتي وأنا قاعد مستني المترو.. وهم أحلى وقت بيعدي عليهم الوقت ده، وبيقوا مش عايزين المترو ييجي.. طب ولحد إمتى أنا هفضل مستني لوحدي؟! مش كده كثير بأة ولااااا إبييييه!؟ بس الحمد لله ماطلعتش المرة دي بصوت عالي.. لقيت البنت الي جنبني بتقول بصوت عالي "بأة ولاااا إبييييه!؟".. قمت باصص

ليها نظرة البواب لما بصلي.. هو مرض "بأة ولاااا إيببييه!" ده انتشر ولا إيه!!؟ البنت اتكسفت جداً.. قمت قايلها: "زمانه جاي".. هزت راسها قتلها: "المترو.. المترو زمانه جاي".



## الأضواء

دخلت المترو أدور بعيني على كرسي فاضي قبل ما يتزحم.. لقيت كرسي جنب راجل كبير مكنش باين شكله؛ لأنه كان مديني ظهره.. قربت منه، وقلت: "سلامو عليكم".. فبصلي وهو بيرد السلام.. لقيته مستر (وحيد) اللي كان بيديني دراسات اجتماعية في المدرسة.

أنا: "مستر (وحيد).. إزيك؟"

المستر: "أهلاً ااااا (أبو حميد)! إزيك؟"

أنا (قمت قاعد):

- "إزاي حضرتك يا مستر؟"

الراجل ده عجز أوي ليه كده؟!

قتله: "فينك يا مستر؟"

المستر: "والله لسة في المدرسة، وإنت يا (حمادة) فينك؟"

أنا (بضحك): "لا أنا خلصت مدرسة من زمان"

ابتسم مجاملة، وليه حق بصراحة.. قتلته: "أنا بشتغل في بنك في فيصل"

المستر: "ما شاء الله.. وخطبت ولا لسة؟"

دايمًا السؤال ده بييجي بعد سؤال الشغل.. سؤال متوقع غلس بييجي من أي حد (عمك.. خالتك.. جارك قدام الأسانسير.. الراجل اللي بيلم اشتراك الوصلة).. في أي مناسبة (فرح.. ميتم.. عيد ميلاد.. عالفطار في رمضان.. فوز مصر بكأس الأمم).. ولازم أرد وأنا عامل نفسي عاقل بارد رزين حكيم.. ولا لما حد بيسأل بطريقة حماسية.. "إنت مش ناوي تعملها بأة ولا إيه!؟).. ببقى بقول في سري: "أعملها معاك يا ابن ال....!"

لقيت المستر قال تاني بصوت أعلى:

- "بقولك خطبت؟"

قلتله:

- "لسة والله.. وحضرتك معاك إيه دلوقتي أطفال؟"

بص الناحية الثانية، وبعدها بصلي، وقال بصيق كده:

- "أنا لسة ماتجوزتش"

أنا سكت بصراحة، وهو سكت، وبعد دقائق قطع الصمت ده وقال:

- "تعرف أنا بستغرب أوي من الدراسات الاجتماعية دي.. أنا بدرسها للطلاب بقالي ٢٠ سنة، وهي مادة ملهاش أي تلاتين لازمة.. تقدر تقولي الواحد استفاد إيه من إن مصانع السكر في نجع حمادي؟! وإن مناخ أثيوبيا مناخ موسمي؟! وأنا مال أمني؟! تقدر تقولي إيه فائدة حشائش السافانا في حياتك؟! إيه هتلف سجارتين حشائش سافانا؟! أمريكا الشمالية تقع بين دائرتي عرض ١٥ و ٨٢ وخطوط طول ٥٢ و ١٦٩.. عشان لو إنت مسافر ماتتوهش مثلاً؟!"

أنا فضلت ساكت وباصصله.. هو في إيه؟! هي هربت منه ولا إيه؟؟ ولا جاي  
يراجع معايا المراجعة النهائية!؟

قلتلته: "يا مستر اهدا بس في إيه؟"

المستر: "مش كانوا يا ابني يدونا حاجة نفيد بيها الناس؟"

أنا: "زي إيه يا مستر؟"

المستر: "يا سيدي كانوا يدرسوا إزاي تعرف عروستك.. تنفع ولا متنفعش من  
ساعة في قعدة تحت ضغط أهالي بيتلكوا لزغروطة؟! إزاي تفهم شخصيتها  
في ساعة!؟ وتعرف إذا كانت تتوافق معاك ولا لأ، وأهي برضة دراسات  
اجتماعية.. بدل ما الواحد بيخرج من البيت زي ما بيدخل.. كانت حاجة  
فادتنا يا بني"

ابتسمتله كده وأنا ساكت.. قعدت أفكر.. هو أنا ممكن يجيلي يوم وأبقى  
كده، أبقى تايه!؟

قلتلته:

- "أشوفك على خير يا مستر"

قالي:

- "أشوفك على خير يا حبيبي" وهو مبتسم، بس كان لسة متأثر.

قلتلته:

- "طيب يا مستر مش عايز حاجة؟"

قالي:

- "انت مش عايز حاجة يا (محمد)؟"





اقفلي النور عشان هنام"، ومرة أبعت لأخويا "قوم يا (أحمد) اقلب على الماتش" متهيأي فودافون لو تعرف اللي بعمله ده كانت طردتني، ورجعت أتكلم أرضي يا ابن بلدي.

بكمل تقليب في الجرنال لقيت المسابقة السنوية لأجمل قصة رومانسية، وجايزتها رحلة لجزر المالديف.. جزر المالديف؟! هي ناقصاكو؟! هو أنا ليه معنديش قصة رومانسية؟! بفكر أبعثلهم قصة (أمير) و(ياسمين).. بدل ماهو فاضح أمها على المنشآت العامة!



## ٤ ١ فبراير

ابتدت الناس تهل وتيجي.. بس فيه حاجة غريبة.. كله شایل أكياس.. بس مش أكياس سندوتشات.. لأ أكياس شيك عليها قلوب كده وبتاع.. وفيه بنات كانت شائلة ورد.. أنا مش فاهم حاجة.. هو فيه إيبيه؟؟

شغال معايا في نفس الأوضة ثلاثة.. (خالد).. (شاهندا).. و(رنا).. والحقيقة (رنا) دي من نوعية البنات اللي هي ولا حلوة تتجوزها، ولا وحشة تشتغلها، هي من النوع اللي تحس إنها زي أختك.. لا هتقدم ولا هتأخر.. أما (شاهندا) فهي من النوع اللي تحسها إنها مش زي أختك، وبرضه مينفعش تتجوزها.. يعني يا دلح دلح.. وشخلعني شخلع.. يومين ثلاثة قضيتها واخلع.. وطول اليوم (خالد) واقف عند مكتب (شاهندا)، ومن كتر وقفته عندها صهره اتنى يا عيني.

قعد (خالد) على مكتبه اللي جنبى، وكان حالق دقنه، وحاطط جيل، أو  
عشان أبقى دقيق علبه جيل، وإزازه برفان (مش أوريجينال).. سألتته وأنا  
باصص على الكيس اللي هو جاييه وحاطه على المكتب: "إلا قولي يا (خالد)  
هو فيه إيه النهاردة!؟"

(خالد): "إييه!؟"

أنا: "أصل كلكوا جايين متأخر وشايلين أكياس.. هو عيد ميلاد المدير  
النهاردة!؟"

(خالد)، وهو عامل شفايفه حرف إس: "الفلاتين يا (محمد)... الفلاتين"

أنا: "آآآه!... وانت جايب الهدية دي للمدير؟"

(خالد)، بصوت واطي وكأنه بيقولي سر: "(شاهندا)"

أنا (بصوت عالي): "آآآه! (شاهندا!)"

(خالد)، وهو مبرق: "وطي صوتك!"

أنا: "ليه هي مش عارفة إنك...؟ ما إنت طول النهار متني على مكتبها لحد  
ما بقيت شبه أحذب نوتردام!"

(خالد): "لأ النهاردة أنا نويت أقولها بأة... إنت إيه رأيك في (شاهندا)؟"

أنا: "(شاهندا) دي الشهادة لله أخت"

راح هازز راسه، وابتسم كده ابتسامة (يونس شلبي) في (العيال كبرت).

قالي: "وإنت مش ناوي بأة يا (محمد)؟"

أنا: "لا أنا مبفكرش في الجواز خالص"

وطول ماحنا قاعدين (خالد) عمال يبص على (شاهندا).. أما أنا و(رنا)،  
فعادي جوز أرايل قاعدين، ناقص يظبطنا على (نجوم إف إم).



## حديث الروح

جت الساعة اتنين.. ميعادل(Break).. عشر دقائق اللي عايز يصلي بأة..  
واللي عايزة تاكل.. واللي عايز يتني زي (خالد) مثلاً، ويقعد يكلم في البنات..  
ولأني مش جعان ولا بكلم بنات.. قمت أصلي! (خالد) راح لـ(شاهندا)..  
و(رنا) زي الشاطرة طلعت السندوتشات من كيسها اللي مفيش عليه قلوب  
ولا دباديب.

دخلت أتوضى.. ببص في المرايا اللي قدام الحوض.. إيه ده شعري خف  
وتخت.. إيه ده هو أنا كبرت أوي كده ليه؟! كان لازم أحس إني كبرت لما  
بطلوا يدوني عيديات في العيد.. لما سواق التاكسي بقى بيقولى يا باشا بدل يا  
كابتن!! رحت أصلي وأنا مش مركز خالص.. بصلي في الركعة الثانية ولا  
الثالثة؟! أمشيها الثانية.. أجي في الركعة الثالثة أنسى أنا كنت في الركعة  
الكام.. بدأت أحس إن سجود السهو جزء أساسي من الصلاة بتاعتني..  
سجدت.. ودعيت.. (يا رب!.... يا رب!.... أنا عايز زوجة متدينة يا رب!....  
تكون أخلاق وبنت ناس بس كده يا رب!.... وحلوة بس بس يا رب! عينيها  
ملونة.. طويلة يا رب!).. لقيت نفسي دخلت في تفاصيل.. وشوية وهحدد  
مجموعها في الثانوية العامة.. قمت قايل: (يا رب ارزقني بواحدة تملي عيني  
وعقلي وقلبي يا رب!)



## شيرين سيف النصر

خلصت صلاة، وفي الطريقة راجع المكتب قابلت سكرتيرة المدير.

وسكرتيرة المدير.. ودي من اللي بتحط برفان أوريجينال.. ندهت عليها: "مستر (محمد)".. أنا قلت أكيد مش أنا.. ولا ربنا استجاب لدُعايا ولا إيه؟! دي قلمي عيني وقلبي وعقلي، وكل حاجة ممكن تتملي.. ندهت ثاني: "يا مستر (محمد)".. قلت كفاية تقل بأة! حرام البنت.. لفيتها بالتصوير البطيء زي البنات بتوع إعلانات شامبو سباركل بالمينك الطبيعي، بنظرة اللي مش واخد باله: "إنتي بتندهيلي؟!.." قالتلي: "اتفضل".." وادتلي ظرف في إيدي، وكان معاها أظرف كتير، وقالتلي: "المدير"، مع ابتسامة صفرا من بتاعة مذيغات القناة الثانية (حياة عبدون)، واختفت.

فتحت الظرف، ومشيت أقرأه.. دعوة فرح بنت مدير فرع فيصل علي ابن مدير فرع مصر الجديدة.. امممم.. يا سلاااام! جوازة سقع.. جوازة كلها فلوس.. ده أبوه مدير بنك، ودي أبوها مدير بنك.. دول ميحيوش عيال.. دول.. دول يجيوا فلوووووس! يا ولاد الـ... ببص لقيت (رنا) في وشي، وفاتحة برضه الدعوة تقراها.

أنا: "إيه يا (رنا).. إنتي معزومة ولا إيه!?"

(رنا)، وهي مبوزة: "آآه! ما (أميرة) العروسة أصلاً دفعتي"

أنا: "مالك يا (رنا)?"

(رنا): "ممممم... أصل بصراحة يا (محمد) أنا بحمل هم الأفراح أوي"

أنا: "ليه!؟"

(رنا): "أصل الواحدة لو راحت الناس تحسسها إنها رايحة تتشاف، وتوقع عريس يشوفها، ولو مراحتش يبقى عشان منفسنة من صاحبها اللي هتتجوز"

أنا: "بصي.. اعملي اللي يريحك"

(رنا): "مش هروح، وأريح دماغي"

أنا: "اللي يريحك... يا منفسنة"

قامت ضاحكة، وقالت: "عارف المشكلة إيه؟ إن لا الحرام بيدوم، ولا الحلال بيجي.. خلينا بأة كده واقفين في الأوسايد!!"

ضحكت، وقتلتها بغیظ: "بس حنت جوازة"

(رنا)، وهي بتضحك: "دول مش هيجيبوا عيال دول هيجيبوا فلوس!!"

أنا (مستغرب): "إيه ده هو إنتي سمعتيني، ولا إنتي كنتي معايا في سري ولا إيه!؟"

(رنا): "أصلك سرحت، وصوتك علي، وسمعتك!"

أنا: "مش أول مرة تحصل.. ده العادي بتاعي"

(رنا)، بنبرة صوت الحكمة: "يا (محمد).. الرزق مش كله فلوس"

أنا: "آه فعلاً الرزق مش كله فلوس.. ممكن يبقى أراضی، شقق، قفل، دهب!"



## لانسر بطة

دخلت المكتب، لقيت (خالد) المتني مع (شاهندا دلعو).. قصدي الأخت العزيزة الوقورة (شاهندا دلعو).. احممم.. منسجمين على الآخر هي ماسكة الوردة في إيديها، وعمالة تشم فيها اللي هو قربت تخلص ريحتها! وهو ماسك الدباديب اللي هي جابتها وحاططها حواليه، وعایش دور (كاظم الساهر) في حفلات أضواء المدينة.. بصيت عليهم بنظرة حاسد.. آه يا ولاد اللذينة! قمت راسم الضحكة على وشي وغامزلهم.. قامت (شاهندا) قايلة: "عقبالك يا (محمد)".. قتلتها: "لااااا! أنا مش بفكر في الكلام ده خالص، أنا ارتبط لأاااا! وألف لأاااا! هو فيه أحسن من إن الواحد يعيش مع نفسه!؟ أنا بحب أعيش حياتي".. مكملتش كلامي، وقام الموبايل ضارب، وحظي كنت حاطط النغمة أغنيه (تامر) (الوحدة بتقتلني).. بس إيه.. أنا ولا أكن حصل حاجة.. قتلهم بكل ثقة: "دي أكيد الحنة".. وقمت غامز، وقمت رادد بصوت واطي: "أبوة يا ماما.. عايزة إيه؟؟".. قالتلي: "عندي ليك مفاجأة، أنا جبتلك CD فرح بنت أخت جارتنا (سوزان)".. قتلها، وأنا بجز على سنائي: "ماما! طنط (سوزان)! المسيحية!؟".. قالتلي: "يا ابني وإنت مالك شوف أصحابهم! بقولك إيه يا (حمادة) مفيش حاجة النهاردة في التلفزيون عدلة، وده اللي هنسهر عليه".

وأنا بكلم ماما لقيت واحدة داخله المكتب، لابسة عباية خليجي، وأنا بموت في الاستايل ده بصراحة، زي القمر.. ولقيتها بتقرب على مكتبي، وسرحت.. سرحت جامد الحقيقة.. مافقتش غير وأمي بتقولي: "(حمادة)! (حمادة)!"

مابتدش ليه يا بني؟!.. وأنا حاطط الموبايل على ودي قلت للحتة الخليجي:  
"اتفضلي حضرتك.. اتفضلي".. لقيت ماما بتقولي: "آآآآه! أتاريك مابتدش..  
حلوة يا (حمادة)؟ حلوة؟".. قتلها: "آه تمام.. تمام آخر موديل يا باشا"..  
ماما قالتلي: "أوعى تكون رفيعة!.." قتلها: "لأااا.. دي نازلة بالمواصفات  
الخليجي.. خليجي أوي".. قالتلي: "طب اتأكد مخطوبة ولا متجوزة.. مانا  
عارفاك ذي أوي".. قتلها: "أعرف إزاي؟!.." قالتلي: "اتصرف، حاول تخليها  
تحرك إيديها".. سكت شوية كده، وقمت قايل للحتة الخليجي: "مممكن  
حضرتك تشاوري على اللمة اللي فوق دي؟!.." بصتلي باستغراب بنظرة  
استفسار.. أمي قالتلي: "لمبة!!!".. قلت لازم أفكر بسرعة، عملت نفسي بجيب  
حاجة من الأرض، وقلت بصوت عالي: "حد واقع منه دبلة يا جماعة؟"..  
البنت ما بصتش في إيديها، ففهمت إنها مش مرتبطة، ولقيت واحد واقف  
بعيد بيقولي: "وريني الدبلة كده".. قتلته: "لا ده طلع ربع جنيه مخروم"..  
كل ده، وماما كانت لسة معايا على الموبايل، قلت لماما: "ماما، ما تتكلي على  
الله، وأنا هظبط".. قالتلي: "ربنا يستر"، وقفلت.

بصيت في وشها كده شوية.. إيه الرقة دي كلها؟! دي حتة سوري؟ لا.. لا دي  
روسية.. دي روسية أسلمت أكيد، ده أنا حظي حلو أوي.. ياااه! ياما إنت  
كريم يا رب!

جيت أتكلم بصوت واطي، صوقي مش عايز يطلع، أصلي كنت مديه تون  
حين أوي.. كحيت (إحم إحم!).. واستحضرت شخصية (أسامة منير) مع  
ابتسامة هادية.

- "أقدر أساعد حضرتك؟؟"

وهي بتظبط الإشارب، قامت معدولة وبصالي.



- "أنا اسمي فاطنة حضرتشك.. جيتشليكو حضرتشك ديك النهار.. وديك ديك النهار كمان... حضرتشك عايزة أفك الوتشيعة"

تنحت كام لحظة كده.. أكيد دي الكاميرا الخفية.. والله ما هذيع! إيه البواخة دي؟! والبنت قاعدة تبصلي جامد.

- "الوتشيعة حضرتشك"

قلت في نفسي: "وديعه قطيعة! ده الصوت مش راكب عالصورة خالص! وأنا اللي فارك روسية أسلمت.. ولا يكون ده روسي، وأنا اللي مش فاهم!؟"

البنت كانت اتخنقت مني، بقالها ساعة بتتكلم، وأنا مش برد.. قامت بكف إيديها، وخابطة على المكتب من فوق، وقالتلي بلهجة حادة:

- "حضرتشك سامعني تشيط!؟"

اتخضيت، شهقت، وقتلتها:

- "كده جعزتشييني!؟"

وبضيقة، وهي بتخبط بصوابعها على إزاز المكتب قالت:

- "الوتشيعة!؟"

قتلتها:

- "والنبي منا.. دي مدام (منى).. آخر الطريقة شمال"

قامت عاملة شفايفها على شكل حرف أوه، ولفاها مع حركة عقارب الساعة، وماصة شفايفها، وقامت ماشية.

كانت عيني عليها، وهي خارجة من الباب، وبسأل نفسي هو أنا بقيت الي بيقولوا عليه بيتعلق بقشاية؟! والفرصة الي هي أصلاً مش فرصة، بقت بالنسبالي فرصة؟! طب أنا ليه بعمل في نفسي كل ده؟! وليه وصلت لكده!!؟ هي غلطتي إني سمعت كلام أمي لما كنت في المدرسة، وهي بتقولي عيب تكلم بنات.. ولما دخلت الجامعة بقت تقولي (ترضاهم لأختك؟!؟) ياريتني كنت اتصاحبت في الجامعة.. أنا كده كده ماليش إخوان بنات أصلاً!

وفي وسط سرحاني ده كله لقيت (خالد) المتنبي بيقولي: "يا (محمد)! يا (محمد)!" بصتله وعاييز أقوله "نعم يا ابن بنت المحظوظة".. قاللي: "موبايلك".. بصيت، لقيت ماما بتتصل، خرجت برة المكتب عشان أرد، عشان أكيد هتسألني عملت إيه.. خرجت برة المكتب لقيت (رنا) واقفة، ومعها كيس كده شكله حلو "باين عليه هدية!"، وبتتكلم في التليفون.. قلت في سري: "وعملالي شريفة؟!؟".. ماما اتصلت تاني.. رديت عليها: "أيوة يا ماما".. قالتلي: "إيه يا عم؟! الحنة الخليجي خدتك مننا ولا إيه؟! عشت وشفت ابني بقي كفيل".. قتلها: "لا.. لا دي في الضياع خالص".. قالتلي: "طيب".. قتلها: "سلام"، وقفلت.

ببص لقيت (رنا) واقفة مع بنت أمورة كده.. صحيح قصيرة شوية، بس وشها مريح أوي، وعندها حسنة تحت بقها شبه بتاعت (عبد الحليم علي).. بصيت في إيديها، لقيت مفيش دبله.. ولقيت الكيس الي كان مع (رنا) بقي في إيديها.. لسة رايح نحيثها هي و(رنا).. الموبايل رن.. "أيوة يا ماما" سككت شوية، وقامت قايلة: (أنا أصلاً كنت مكلمك عشان حاجة تانية.. وإنت قفلت في وشي!.. قتلها: "خير؟!؟" قالتلي: "فاكر البنت الي كنا شفناها في الصورة على الفيسبوك؟" قتلها: "أنهي فيهم؟".. قالت: "الي كانت متصورة

مع (مها) بنت (سامية).." قتلها بحماس كده: "آآآه! هاااا!؟".." وبعد ما كان اتجاهي ناحية (رنا) وصاحبته، لفيت وشى تاني، وبقى ضهري ليهم.  
- "بص يا سيدي.. فيه خبرين.. واحد حلو، والتاني وحش.. أبدأ بإيه؟"  
قتلتها: "الحلو طبعاً"

قالت: "البنت دي اسمها (رغدة)، زميلة (مها) في تجارة إنجليش، وهي بنت ناس طبييين جداً.. باباها دكتور.. و(سامية) بتشكر أوي في أخلاقها.. بتقولي يا (حمادة) تحسها زينا كده.. آه والله"

قلت لماما: "طب الحمد لله.. ده خبر حلو أوي.. ده أنا..."  
قاطعت كلامي:

- "الخبر الوحش بأه..."

قلت لماما:

- "إيه يعني لو على أد حالهم شوية؟! مفيش مشكلة.. خذوهم فقراء"  
قالتلي:

- "لا يا حبيبي مش القصد"

قاطعتها تاني وقتلتها:

- "إيه يعني لو مش بيوافقوا بنتهم ترتبط وهي في الجامعة؟! يا ستي نقرا فاتحة.. صبرنا كتير نصر شوية كمان"  
وقلت في سري (دي بت مزه أوي!).  
قامت ماما قايلة، وهي مخنوقة مني:

- "أهلها مش معترضين ولا حاجة، ممكن أقولك إيه الخبر الوحش بأة؟! " قتلها: "إيه يعني لو فيها حاجة وحشة تتغير مع الوقت؟! وبعدين مفيش حد كامل.. أبشري"

كانت جابت آخرها، قامت قايلة بصوت عالي:  
- "يا بني ارحمني من أم (إيه يعني) بتاعتك دي! الخبر الوحش إنها مخطوبة"

سكت ثانية، وقلتها:  
- "شفتي بأة؟ مش قلتك مفيش حد كامل؟ إيه يعني مخطوبة؟! يعني مش متجوزة.. فيه أمل"

ماما قامت قافلة السكة، مش عارف ليه!!  
بص ورايا ألحق (رنا) وصاحبها بأة، لقيت صاحبها مشيت، و(رنا) لوحدها.

جريت على (رنا) اندهلها:  
- "يا (رنا)! يا (رنا)!"

لفت وشها مستغربة من صوتي العالي، وقامت بصالي مستنية أنطق، وصلتها وسكت مش عارف أقولها إيه.. قامت قايلة ليا:  
- "إيه؟ مالك يا (محمد)؟"

قلتها بشوية كسوف:  
- "إنتي كان معاكي بنت دلوقتي"

وسكتت على أساس تفهم الباقي.. قالتلي: "آه".. وسكتت.. قتلها: "آه إيه!؟".. قالت: "آه كان معايا بنت".. قلت في سري: "وبعدين في الملل ده؟".. قلت أجيب من الآخر: "مين البنت دي؟؟".. قالتلي، وهي بتضحك: "آآه! دي (دووو)!" قتلها: "(دووو)! كلميني شوية عن (دووو)".. قالتلي: "يابني ده إنت بتهزر!؟ دي جتلي البنك ١٠٠ مرة.. وماشوفتهاش إلا دلوقتي!؟".. قتلها: "فاجئيني!".. قامت قايلة: "أصل جايلها عريس النهاردة".. قتلها: "تعرفي إن أنا عندي قدرات خاصة؟".. قالتلي: "إزاي!؟".. قتلها: "أنا بقيت بعرف البنت المخطوبة من البنت اللي مش مخطوبة.. من غير ما أبص على دبلتها".. قالتلي: "إزاي!؟".. قتلها: "اللي بتعجبني بتطلع مخطوبة".

ضحكت، وكملت كلامها، وهي بتضحك:

- "وبعدين دي قصيرة.. مش إنت بتقعد تقول عايزها طويلة طويلة؟"

قتلها: "بس مش عارف عجبتني ليه.. عامة لو محصلش نصيب إن شاء الله قوليلي"

قامت ضاحكة، وقايلة:

- "حاضر"

مشيت ومليش نفس أرجع المكتب.. وعمال أفكر إيه كمية القفلات اللي الواحد بيتقفلها دي! الله! طب ماهو الواحد ياما قفل بنات.. بقصد ومن غير قصد، وبرضه اللي من غير قصد ده كان بقصد بصراحة.. كام أم ملّحت عشان تجوز بنتها، وأنا قفلتها.. وكام بنت بعد ما اتخرجنا احلويت في عنيتها، وبدأت تهتم، وأنا كنت بخلع.

ساعات بقعد أفكر يا ترى البنت اللي هتجوزها بتعمل إيه دلوقتي؟ يا ترى قاعدة تفكر فيا؟ مستنياني؟ بتدور عليا؟ يا ترى بتعمل إيه دلوقتي؟ يمكن

بتحب واحد تاني دلوقتي، ومخطوبة، وهيفشكلوا مثلاً كمان سنتين.. نعم! هو أنا لسة هستنى سنتين؟! يا رب لو مراقى مخطوبة تفسخ خطوبتها بسرعة!

## اخترنا لك

"الوحدة بتقتلني.. ولا حد بيسألني إنت عامل إيه"

لا.. لا ده مش أنا طبعاً، ده الموبايل بيرن.. الموبايل هو اللي حاسس بوحدة لكن أنا تمام.. المرة دي مش ماما اللي بتتصل، ده بابا، رديت:

- "ألو بابا"

- "أيوة يا (حمادة) عامل إيه؟"

- "تمام.. خير! فيه حاجة؟"

- "هو لازم عشان أكلمك يبقى فيه حاجة؟"

- "معلش يا بابا"

سكت شوية، ورد عليها:

- "بقولك يا (حمادة) فيه حاجة"

سكت، وكمل هو كلامه:

- "من كام يوم كده قابلت واحد صاحبي من أيام المدرسة اسمه (كامل المصري).. راجل محترم جداً.. كان شغال معايا.. كان شغال معايا في الكويت"

- "طيب يا بابا لو عايز يفتح حساب عندنا ولا حاجة.. ابعتهولي"

- "لا يا (حموءة).. ده إحنا اللي هنفتح عنده حساب"

- "إزاي يا بابا؟ مش فاهم! هو عنده بنك!؟"

- "لا.. عنده عروسة"

رديت، وأنا مضايق:

- "أيوه يعني هو أي عروسة والسلام.. هو أنا مش بني آدم!؟"

رد بابا بصوت متنفز:

- "طب ما إنت أمك بتجييلك عرايس!"

- "أولاً أنا عمري ما قابلت واحدة فيهم.. ثانياً يبقى عارف شكلهم.. فيه

قبول مبدئي مني.. مش واحدة ماشوفتهاش قبل كده!"

رد بابا بهدوء:

- "تعالى شوفها، ومش هنخسر حاجة.. عجبك عجبك.. ما عجبكش بلاش"

رديت:

- "لا يا بابا.. أنا من الآخر مش هتجوز بالطريقة دي.. أنا مش أقل من

(أمير) و(ياسمين).. (شاهندا) و(خالد).."

بابا قاطع كلامي:

- "مين دول يا ابني؟"

سكت، وكمل:

- "بص يا (محمد).. إنت كبرت، وداخل على التلاتين.."

- "إيه يعني؟ ما ناس كتير بتتجوز أربعين.. المهم العمر اللي هعيشه معاها أكون فرحان بيه.. مش حامل همه"

رد بابا بصوت ضعيف مخنوق:

- "يا (حمادة)! لو إنت مش حاسس إن عمرك بيزيد، فأنا وأمك عمرنا بينقص.. عايزين نفرح بيك"

سكت.. ثبتني الحاج.. اتك على الحنة اللي بتوجع.. قتلته:

- "حاضر يا بابا.. أنا هروح أشوفها بس.. ده آخري ومعليش أي حرج لو رفضتها"

- "يا ابني اعتبر نفسك خارج تشرب عصير مانجا"

- "طيب حدد معاد"

- "آه مانا حددت.. النهاردة إن شاء الله بلیل"

- "إيه باللیل؟! وكمان بتقدم المشيئة؟"

- "هبقى أعدى عليك.. سلام"

وقفل!!

نعم! (هعدي عليك.. سلام)!!؟ يا ريتني ما اتعاطفت معاك يا بابا! يعني خلاص.. جواز صالونات.. ده أنا مفيش قعدة إلا ما شتمت فيها جواز الصالونات على اللي بيتجوزوه.. لا.. لا وأنا هعمل في نفسي كده ليه؟! أنا هكلم بابا أقوله يلغي الميعاد.





## طعم إيه؟

كنت لسة مصدوم، ومش عارف أعمل إيه.. قررت أكلم ماما.. لسة بتصل لقيت (سمير) بينادي عليا! (سمير) ده سنه حوالي ٣٧ سنة.. متجوز.

دخلت مكتبة، لقيته بيقولي، وهو مستغرب كده:

- "مالك يا ابني؟! رايح جاي.. رايح جاي.. مالك فيه إيه؟!" دخلت قعدت على الكرسي اللي قدام مكتبه، وسندت ظهري، وقتلته:

- "(سمير)، أنا عندي مشكلة"

(سمير):

- "إيه اختلست من البنك؟"

أنا: "(سمير) وحياة أبوك ما ناقص.. أنا عندي قعدة.. قعدة صالون"

(سمير): "إيه المشكلة؟"

وبصوت واطي كده قالي:

- "طب قوم اقفل الباب"

أنا: "بقولك قعدة صالون مش دخلة!!"

(سمير) قام معلي صوته:

- "يا ابني بقولك قوم اقفل الباب"

قمت قفلت الباب، ورجعت، وقتلته:

- "ها.. اتفضل افتي!"

(سمير):

- "بص يا سيدي.. قبل أي حاجة لازم تبقى عارف البنت دي نوعها إيه"

أنا: "نوعها!؟"

(سمير): "آه نوعها.. بص يا سيدي.. فيه نوع من البنات تعشق النكد.. النوع الـ(تامر عاشوري) ده.. اللي دايمًا بيلاقي في كل فرحة ألف جرح! اللي بتزعل لما تعجبها حاجة ومتلاقيهاش مقاسها.. أو بتزعل لما تعجبها حاجة وتلاقي مقاسها، بس مش نفس اللون.. أو بتزعل لما تعجبها حاجة، وتلاقي مقاسها، ونفس اللون، بس مفيش عليها خصم! أو بتزعل لما تعجبها حاجة، وتلاقي مقاسها، ونفس اللون، وعليها خصم، بس البروفا زحمة! أو بتزعل لما تعجبها حاجة، وتلاقي مقاسها، ونفس اللون، وعليها خصم، والبروفا فاضية، وقاستها، بس لقت نفسها تخنت! بتفضل تزعل.. تزعل.. تزعل.. لحد ما كل حاجة تظبط.. وأول يوم تلبسه تلاقي أنتميتها جايبة زيه بالظبط!"

كنت ميت على نفسي من الضحك.. وميت من الخوف في نفس الوقت لا أقع في واحدة زي دي.. كان (سمير) لسة بيكمل كلامه:

- "فكرك الحكاية هتخلص لحد كده!؟ لا دي هتعيش نفسها في موود فظيع.. هتغير اسمها على الفيسبوك، وتكتب (صرخة أنثى).. وهتعمل تاج للبس اللي جايها، وتشير أغنية (إليسا).. (مصدومة بجد.. ومش بنطق.. ولا عارفة أرد.. مصدومة عشان شكله في عيني بقى مش ولابد)"

وأنا بضحك قتلته:

- "طيب دي أكيد عايزة معاملة حنية!"

(سمير):

- "إياك! دي بتحب تبقى مقهورة.. إياك تحرمها من الجراح!"

أنا: "(سمير)، إنت كده قلقتني أكثر.."

(سمير) ولا كأنه سامعني، وبيكمل كلامه عادي، وكأنه بيلقي محاضرة في ناشيونال جيوجرافي عن حقائق نبات المرأة! كمل (سمير) كلامه:

- "النوع الثاني بأة يا حاج (محمد) اسمها كينونتها"

أنا: "إيه كينونتها دي.. دي زي حيلتها كده!!"

كمل كلامه عادي جدًا:

- "دي بتبقى عاملة نفسها بت دماغ، وليها عمق، وبتبص للأمور من منظور مختلف.. بتمسح لمغنيين مجهولين.. صفحاتهم على الفيسبوك لا تتعدى الخمسين واحد.. لما تسألك "سمعت (شمس النهار)؟" اوعى تفتكر إن ده اسم الأغنية! ده اسم المغني!! كينونيتها دي يا (محمد) لازم تحسسها إنها أد إيه مختلفة.. كلمها مثلاً عن حرية المرأة، وإنك مؤمن بقضية المرأة، وقولها إن المرأة دلوقتي تبوات مكانة عالية، بقت وكيلة نيابة، ووزيرة، ورئيسة جمهورية، زي التشيك مثلاً.."

أنا: "هي التشيك رئيس الجمهورية بتاعهم ست؟!؟"

(سمير): - "يا عم (محمد)، هي جملة محفوظة على بعضها كده.. وبعدين إيه ست دي؟! اسمها مرأة! عايزك تحفظلك كام رواية، واي سؤال تتسأله حط اسم (أحلام مستغامي) فيه.. (أحلام مستغامي) قالت.. (أحلام مستغامي) عادت.."

قاطعته تاني:

- "مممكن سؤال؟ مين أحلام مست.. مستغامتت.. مس.. مس إيه؟!؟"

(سمير): "مس إيه يا ابني.. هي مدرسة إنجليزي!؟ دي كاتبة يا جاهل!"

أنا: "مفيش اسم أسهل؟"

(سمير): - "يمشي معاك (أثير عبد الله)؟"

أنا: "عصير إيه؟"

(سمير): "لو هتهزر قوم شوف شغلك أحسن!"

أنا: "خلاص.. خلاص.. كمل يا عم"

كمل كلامه:

- "كينونتها دي يا (محمد) من النساء اللي بتحب التفاصيل.. اللي لو مثلاً قاعدة في كافيه، وطلبت قهوة، تعرف إذا كانت القهوة تركي، ولا خليجي، ولا ميكاتو، ولا إسبريسو.. هيجيبها في كوباية ولا فنجان!"

أنا: "إيه يا عم ده كله؟ ما تتطلب عصير فراولة وخلاص! ده أنا كل اللي أعرفه عن القهوة إنها بتتشرب سادة في العزا.. مضبوطة في قعدة شغل.. باردة ماتتشربش خالص!"

سرحت في كلام (سمير).. ده إيه الواقعة الطين دي! هو كل واحدة بكتالوج؟! هو الجواز ده مش دلح، واجري وراها، وتجري ورايا على البحر، وشعرها يطير؟! تشتغل في الخلفية أي أغنية لـ(محمد نور).. كان لسه (سمير) بيكمل كلامه بترتيب مذهل من غير ما يقطع في الكلام.. اتأكدت إن دي مش أول مرة لـ(سمير) يلقي فيها محاضرة أنواع البنات! بس هو كده توهني أكثر.

قلتله: "(سمير)، أنا مش عارف لما أقعد أقول إيه وأعمل إيه؟"

(سمير): "لا بص أنا خبرة في الأنواع بس، لكن استراتيجية قاعدة الصالون مش أد كده"

أنا: "طب مين أجمد حد هنا في قعدات الصالون؟"

(سمير): "بص.. عندك (مازن) عامل بتاع اتنين وتسعين قاعدة محلي.. خمسة دولي ما بين سوريا ولبنان وفلسطين.. ده غير إنه -ما شاء الله- ستة فاتحة، وتلاتة خطوبة، لكن عمره ما وصل للنهائي.. الجواز"

قلت في سري: "يا نهارى! كل ده ولسة ماتجوزش؟! وأنا إيه اللي هيخليني أسأل واحد فاشل زي ده؟!.." قتلته:

- "طب مين وصل للنهائي؟"

(سمير): "العميد"

أنا: "(حسام حسن) ولا (أحمد حسن) يا ظريف!?"

(سمير): "(حسن) نفسه!"

أنا: "مين!?"

(سمير): "(حسن العطار)"

أنا: "آه.. آه.. بتاع الـ(HR)"

(سمير): "آه.. ده وصل للنهائي"

قلت في سري: "كويس.. ده وصل للنهائي، واتجوز، واستقر.. هيجيب المفيد.. خليني مع الناجح ده.. ده اللي عنده الزبد"

كمل سмир كلامه: "وصل للنهائي تلت مرات!"

# أوه تحدي

خرجت من عند (سمير)، وأنا تايه أكثر.. هو أنا مكبر الموضوع، ولا الموضوع الي كبير فعلاً؟! طب ما أعتبرها خروجة مع مزة، وما أأزمش نفسي؟! خروجة مع مزة إيه بس؟! دي جاية تشوفني أنفع جوزها ولا لأ.. أنفع أبو عيالها ولا لأ.. نعم! هي دي مين أصلاً؟! ده أنا حتى ماعرفش اسمها! وفي ظل الصراع ده دخلت أوضة غلط! الأوضة دي فيها (أحمد الأشقر).. ٣٣ سنة.. مش متجوز.. من كبار مشجعي الجواز عن طريق الحب.. من الناس الي على طول بتعمل (Share) لصور هيلتون بورا بورا (الي هو أكواخ كتير على البحر ده).. عنده (folder) حاطط فيه صور لأماكن ناوي يروحها هو وحبيبته المجهولة.. صور لقاعة الفرح.. أسعار (حماقي) في الأفراح.. محضر كل حاجة لدرجة إن عنده صور لفستان فرح عروسته! في المقابل معاه في نفس الأوضة (عمرو الإمباي).. ٣٣ سنة برضه.. بس متجوز، ومخلف ولد وبنت.. مشي في جوازات كتير لأصحابه، ومتعصب أوي لجواز الصالونات!!

"شايفك خارج من عند (سمير)، وكنتوا قافلين الباب"

(الأشقر) بيقولي، وهو باصص في اللابتوب.

- "آه يا عم.. كان بيقولي شوية حاجات كده"

- "حاجات إيه؟ إنت هتمثل؟ أكيد بيشرحلك محاضرتة في الحريم.. والكام كلمة الي حافظهم"

- "إيه ده؟! إيه ده؟! إنت ناوي تقابل ولا إيه؟"

(عمرو الإمباي) ببسأل، وهو عنيه على اللابتوب برضه.

- "آه.. فيه مقابلة النهاردة بالليل"

مكملتش الجملة إلا ولقيت الاتنين قاموا قافلين اللابتوب في نفس اللحظة، وباصين ليا كأني قلت "أنا جبت البرنامج اللي بيقولك مين اللي بيزور بروفايلك على الفيسبوك!"

(الأشقر): "إنت عبيط يا ابني؟! حد يتجوز جواز صالونات؟!"

(الإمبائي): "ماله جواز الصالونات يا (أشقر)؟! ما أنا متجوز، ومخلف، والحمد لله، وماشية!"

(الأشقر): "إيه يا عم (عمرو)! هتخلي الواد يعمل كده ليه في نفسه؟!"

(الإمبائي): "يعمل إيه؟"

(الأشقر): "يتحرم من إحساس حلو.. إحساس اعترافه بحبه ليها.. إحساس الحيرة قبل الاعتراف.. إحساس الغيرة.. الارتباك.. إحساس الـ...."

(الإمبائي): "آه.. آه.. غصب عنه!"

(الأشقر): "غصب عنه إزاي يعني؟"

(الإمبائي): "العمر.. العمر بيحددك.. بيغصبك.. وهو هيقابل حب فين؟ حياته قفلت على دائرة معارفها خلاص!"

(الأشقر): "يعني إيه العمر بيغصبك؟! مش أحسن ما يضيع الباقي من عمره بجواز صالونات عقيم؟!"

(الإمبائي): "لا.. يجمد حياته.. ويستني واحدة هتنزله من السما يحبها!"

(الأشقر): "بقولك إيه؟ اتفرج على أول زعلة بينهم، شوف هيكونوا قاسيين على بعض أد إيه.. عارف ليه؟ عشان مفيش بينهم مشاعر يحنوا لبعض بيها"

(الإمبائي): "أنا ماسمعتش عن القسوة، والفرار، والجراح، والكلام ده.. غير في أغاني الحب على فكرة.. قصص حب مصطنعة.. هروب من عقدة الصالون، اللي الأفلام كونتها في عقلهم الباطن!"

(الأشقر): "عمرك ما هتفهم يعني إيه شعور إنك تروح بيتك حبيبتك تفتحلك الباب!"

(الإمبائي): "وإنت عمرك ما هتفهم يعني إيه يفتحلك ولادك بلهفة.. حتى لو كانت اللهفة دي على إنهم بيشفوا إنت جايب معاك إيه في إيدك.. يكفيك إحساس إنك صانع ضحكهم.. بابا نويل دنيتهم"

(الأشقر): "وهو لو اتجوز عن حب مش هيخلف!؟"

(الإمبائي): "إنت عارف العيال اللي أبهاتها كانت بتموت، وإحنا في خامسة ابتدائي.. هو هيبقى أبو حد فيهم.. لو مش حاسس بسنه دلوقتي.. يشوف سنه في كرمشة رقبة أبوه.. ولا في تجاعيد وش مامته"

(الأشقر): "أقولك حاجة؟"

(الإمبائي): "قول"

(الأشقر): "إحساس قعدة الصالون ده بالنسبالي عامل زي.. زي.. إنت عارف أستاذ (نبيل الحلفاوي) في (الطريق إلى إيلات) لما كان بيوسع خرم العسلية؟"

(الأمبائي): "آه.. بتبقى حاسس نفس إحساس (نبيل الحلفاوي)؟"

(الأشقر): "لأ ببقى حاسس نفس إحساس العسلية!"





# كلام من دهب

خرجت من عندهم من غير ما أفتح بؤي بكلمة... ماعرفش المناقشة خلصت على كده ولا لسة مكملة! مش عارف مين صح ومين غلط.. حسيت إنه حاجة زي رهان.. هراهن بعمرى على حاجة غيبية!؟

"إحساسك وحبيبتك بتفتحلك الباب".. "كرمشة رقبة أبوك".. "رعشة إيد مامتك!.." جمل قعدت تتردد في بالي جامد.. مشهد مقسوم نصين: نص فيه حبيبتى بتفتحلي الباب بابتسامة تشرح القلب. ونص فيه أبويا وأمي، وفرحة عندهم بيا! خايف أتحرم من حاجة من الاتنين، أو أتحرم من الاتنين!

"الى واخذ عقلك.. يا عم"

دي (رنا) معدية جنبى، وقامت ضاحكة، ومشاورالى على مكتب الـ(HR).. مكتب (حسن العطار)! إيه ده هو الموضوع انتشر كده؟! طبعاً.. مانا داير على المكاتب أفضح نفسى!



(حسن العطار).. ٣٤ سنة.. قبل ما يتجوز قابل عرايس بالهبل.. فيه ناس بتقول ١٥٠ وناس بتقول ١٦٠ لكن الرقم الحقيقى ماحدش يعرفه، ولا حتى هو.

أنا: "سلامو عليكو"

(حسن)، (شاوري على الكرسي اللى قدامه):

- "تعالى.. تعالى يا (محمد).. اتفضل"

أنا: "والله يا (حسن) كنت عايزك في حوار كده، ومش عارف أبدأ منين"

(حسن): "يا عم تبدأ منين إيه.. ما تبدأ"

أنا: "أصل أنا جالي قعدة صالون مفاجأة كده.. وقالولي إنك دايس في الحوار ده.. أنا عايز منك خلاصة قعدة جواز الصالونات"

(حسن): "مبدئيًا كل واحد فينا حياته عبارة عن فيلم، ممكن تكون بطل في فيلم حد.. وليك دور ثاني في فيلم حد ثاني.. ممكن تبقى اللي بيعدي من قدام الكاميرا ومحدث ياخد باله منه في حياته.. ممكن حد يشوفك في فيلمه (عادل أدهم)، وحد ثاني يشوفك (عبد الوارث عس)؛ أصل كل واحد في فيلمه هو المخرج، وهو اللي بيوزع الأدوار! مستحيل تبقى بطل في حياة الناس كلها.. مستحيل ترضي الناس كلها.. أو ترضى بالناس كلها! وعشان مستحيل.. الحل الوحيد إنك تهتم بفيلمك إنت وبس.. لا فيلم أبوك ولا فيلم أمك، ولا فيلم المجتمع.. فيلمك إنت وبس، واللي مؤكد إنك بطله ومخرجه.. آه القصة مكتوبة ومقدرة مسبقًا، بس اللي عليك إنك تختار أبطال فيلمك بعناية، تختار الكاست.. فريق العمل هو ده اللي هينجح فيلمك أيًا كانت ظروفه! قصة الفيلم لو فرضنا إنها ثابتة، بس إخراجها على إيد (شريف عرفة) مثلاً هتختلف كتير عن أي مخرج درجة تالته.. والنهاردة إنت بتبدأ أهم خطوة في تحضير فيلمك.. اختيار البطلة!"

أنا: "كان نفسي البطلة تبقى لفيلم روماني.. مش مجرد دور لحد مكانه فاضي وبنملاه!"

(حسن): "ليه بتقول كده!؟"

أنا: "جواز صالونات!"

(حسن): "انسى كلمة (جواز صالونات)؛ لأن جزء كبير من سدة نفسك للطريقة دي في الجواز هو المسمى ده.. يمكن ده يكون مثلاً سبب فشل فاكهة الكاكا.. اسمها بيخليك تشمئز.. تخيل لو المانجا كان اسمها كاكا، ولا حد كان هيجبها! المسمى وما يوازيه من إحساس حاجة اتزرعت فيك على مدى عمرك.. فانسى اسم (جواز صالونات)! تخيل كده لو سميناه مثلاً لامبورجيني (Lamborghini).. (جواز لامبورجيني)! شوف وقع الكلمة على ودنك.. "اتجوزت جواز لامبورجيني!".. أو بالنسبة للبنت نسميه مثلاً لازوردي (L'azurde).. تخيل لو قلت لبنت "تتجوزي عن حب ولا لازوردي؟" هتقولك الجواز اللازوردي طبعاً حاجة (Classy).. عارف ليه؟ لأن الكلمة نفسها سايبة أثر حلو على النفس! فبلاش نسميه (جواز صالونات).. كل واحد يسميه على اسم حاجة بيجبها.. يسميه (جواز جالاكسي كراميل).. (جواز ميسي).. (جواز زارا).. (جواز كول سلو).. هو حر.. المهم نخرج برة أي أثر نفسي سيئ متعلق بالمسمى.. (جواز صالونات)"

أنا: "مم بصراحة هي فكرة جديدة.. وعجيبة!"

(حسن): "إلا قولي يا (محمد).. إنت شفت صورة البنت؟"

أنا: "لا والله.. أصل الحوار جه فجأة كده!"

(حسن): "ثانياً: إياك تشوف صورة العروسة! ماتخافش مش هقولك الشكل مش كل حاجة، وعشق الجسد فاني، والكلام ده.. بس الموضوع على بعضه بيفرق.. لو شفت صورتها هتقارنها باللي قبلها.. ولو مفيش قبلها هتقارنها بأحلى واحدة شوفتها.. وهنا المقارنة مش عادلة، دي مش أكثر من صورة صماء! لو كان اهتمامك بالشكل زايد عن حده، فتأكد إن البحث عن الأفضل لا ينتهي! وكل يوم بينزل موديلات جديدة، فعمرك ما هتوصل لمرحلة إشباع

العين إلا لو قللت مجال البحث عن طريق العين.. إنت عارف أنا مثلاً شفت أكثر من ١٥٠ بنت.. الأول كنت بدور على الشكل الخليجي، وبعدها الـ(blond)، وبعدها السمر، وبعدها السوري.. المهم وصلت إن مزاج الراجل متقلب.. وده مش معناه إنك تاخذ واحدة ماترضيش عنيك.. بس قلل دور عنيك في قراراتك شوية"

أنا: "أنا عارف الشكل مش كل حاجة بس برضه.. أصالح مزة زعلانة أحسن ما أصالح واحدة شبه ابن عمي!"

(حسن): "طب إنت ليه مش بتفرض إنها عايزة واحد مز؟! طبعاً زمانك فاكِر إن البنت أهم حاجة عندها الجزمة والساعة، والجو الي إنت حافظه من أيام تانية ثانوي ده.. لا يا حبيبي! البنت بقت بتهتم بعرض الكتاف.. الـ(six pack).. الدقن الطويلة، الشعر الناعم، والسنان البيضاء بتاعة الإعلانات دي.. لكن عشان هي عليها ضغوط مباشرة من البيت، أو غير مباشرة من المجتمع فبتقبل تقابلك! بس ما تتخضش.. رغم إنك مش شبه فارس أحلامها، أو حد من بتوع ستار أكاديمي.. مع أول ضحكة هتضحكها من قلبها ليك، هتكسر حاجز، وتغير ملمح من ملامح فتى أحلامها.. وكل ما تحس بالسعادة معاك هتكسر حاجز جديد.. وملامح فتى أحلامها هتفضل تتغير.. تتغير.. لحد ما تبقى ملامحك إنت"

أنا: "كمل يا أستاذ! ده أنت بتقول درر!"

(حسن): "اهتم بكل كلمة هتقولها، حتى لو شايفها مش مهمة.. أول قعدة دي هي هتتكلم عن الحاجات المهمة بالنسبالها، الي خايفة إنك تضيعها منها بعد كده.. فخليك حذر.. اهتم بكلامها سواء أعربت عن قلقها عن الانشطار النووي ودوره في إبادة الكوكب، أو أعربت عن قلقها إن أغنية

(تامر حسني) اتراجعت مركزين في أجمد سبعة الساعة سبعة مع (جيهان عبد الله).. قلقها واهتمامها في الحالتين واحد متساوي، وبالتالي رد فعلك في الحالتين لازم يكون متساوي"

أنا: "طب لو معجبتيش أعمل إيه؟"

(حسن): "يا ابني لا أنت أول واحد قتلها لأ، ولا أول واحد هي قالتله لأ.. مأزم الدنيا ليه؟! بس ماشي لو عجبك لأول وهلة، وكتتوا في كافيه مثلاً، اطلب نفس الطلب اللي هي هتطلبه.. هي هتفهم.. ولو ماعجبتكش اطلب أرخص حاجة في الـ(menu).. مية معدنية!"

أنا: "آه ده سيم يعني.. طب لو كنا في بيتهم؟"

(حسن): "لو عجبك قولها: (تسلم إيدك) على أي حاجة تقدمها.. حتى لو بتقدملك مناديل!"

أنا: "طيب أنا خايف أروح هناك اسكت.. وماعرفش أكلهم في إيه"

(حسن): "بص.. في جميع الأحوال ماتحطش في دماغك إنك رايح تقابل عروسة.. اعتبر نفسك بتقابل مزة بعد إذن أبوها، وفي بيتها.. وبلاش تفكير يروح لبعيد! أما عن المواضيع.. لا تتكلم عن آخر ألبوم لـ(رامي جمال).. ولا آخر حلقة في مسلسل (يوسف الشريف).. ولا عن طريقة الـ(Make up) اللي بتعجبك.. ولا تتكلم عن (هييتا).. ولا الطريق كان زحمة إزاي وانتو جايين.. وإنك دخت على ركنة.. عشان أكيد الحوارات دي كلها، واللي شها اتهرست في ميت قعدة قبل كده.. وهي ملت منها.. وأساساً مش هتضيف أي حاجة ليكو!"

أنا: "أومال أكلم أمها في إيه؟!"

(حسن): "اتكلم عنك، واسمع منها عنها.. عن حياتها.. عن طريققتها.. عن مشكلتها.. عن هدفها.. عن طموحها.. اللي جي بالنسبالكو فيه حاجة مشتركة ولا لأ.. أسلوبكو في الحياة قريب من بعض ولا لأ"

أنا: "مم.. فيه حاجة تانية؟"

(حسن): "لا.. خد الموضوع ببساطة.. وتأكد إنه كله نصيب.. ونصيحة أخيرة ماتفتحش الیومیین دول page کایرو زووم"



خرجت وأنا مقفول من عنده.. مش عارف ليه! يمكن عشان بدأت آخذ خطوات برجلي.. يمكن عشان الموضوع بقى جد.. يمكن عشان كلامه فيه شيء من الإقناع.. مش عارف! خرجت من عنده تايه مع إن المفروض إن كلامه يرسى!

مشيت وأول كرسي لقيته في طريقي قعدت عليه.. فردت ضهري، غمضت عيني، خدت نفس عميق، وسمعت صوت جهوري بيقولي: "ماتتجوزش إلا حب يا (محمد)!".. فتحت عيني لقيت واحد معروفش مبتسم.. سنه في أواخر الأربعينات كده.. واحد معروفش عارف اسمي.. ده حلم ولا جن؟!

قلتله: "هو حضرتك مين؟"

- "مش مهم أنا مين؟"

- "يعني إيه مش مهم؟!"

- "ما تتجوزش إلا حب"

- "يا عم إنت مين؟"

- ما تتجوزش إلا حب"

- "يا عم أنا كده مش هتجوز خالص.. أنا قطعت الخلف!"

- "يا (محمد) ماتخفش"

- "إنت لو ماقلتش إنت إيه.. هقرا قرآن أحرقك"

- "أنا (جمال إسماعيل)"

- "الله يرحمه"

- "يا (محمد) أنا عميل عندكو هنا، ودخلت عند (عمرو الإمباي) و(الأشقر).. وكان فيه بينهم نقاش حاد عن طرق الجواز وبتاع.. وفهمت منهم إنك عندك مقابلة النهاردة"

- "الله!"

- "ماتتجوزش إلا حب"

- "ماهو مش همزاجي حضرتك.. أنا نفسي أتجوز حب بس أعمل إيه!"

- "نفسك تتجوز حب.. مم.. إنت عارف الأول إيه الحب؟! ولا عايز منه وخلص!?"

- "هو حضرتك جي ترخم عليا وخلص?"

قام قاعد في الكرسي اللي جنبى، وواحد نفس عميق أخو النفس اللي أنا خدته من شوية، وباصلي، وقال:

- "اللي انتو عايشينه ده.. أو اللي بتتمنى تعيشه ده.. ده مش حب.. ده شوية أحاسيس جديدة عليكو ماعرفتوش تسموها إيه.. فاعتقدتوا إنها حب"

- "آه يعني مفيش حاجة اسمها حب؟"

- "فيه طبعًا.. بس إيه هو الحب الحقيقي؟"

- "الحب الحقيقي.. بيعيش يا حبيبي.."

- "كنت متأكد إنك هتقول كده.. الحب هو التكامل.. وصعب إنك تلاقي اتنين بيكملوا بعض بالمللي.. بالمللي.. الحب زي قطعة (puzzle) بتركب في مكان في قلبك ناقص منه الحنة دي بالظبط.. بيقبلها قلبك بدون ماتغير فيها حاجة.. بتستقر فمكانها بدون ألم، بالعكس دي بتكون الراحة.. قطعة الـ (Puzzle) دي مش بتحتاج إنك تقص منها حنة، أو تلبسها حجاب، أو تبطلها تروح الشغل، أو أي تعديل، سواء كان بالإيجاب أو السلب.. هي بتبقى مريحاك كده أيًا كان شكلها.. العقل مش بيكون ليه أي سيطرة أو رأي.. الحب الحقيقي ده بيتغلب على أي عقبة.. ده مش بيشوف أصلًا عقبات! عمرك لقيت حاجة زي كده قبل كده؟"

- "تصدق أنا بدأت أكره الجواز على البنات على اللي عايزين يتجوزوا!؟"

- "ليه بس يا (محمد)؟"

- "والله يا أستاذ (جمال) مشنت بشكل رهيب.. وعشان مين؟ مفيش حد أصلًا.. وفي الأول والآخر مسؤولية وقرف، سواء حب بأة ولا زفت!"

- "يا ابني البنت دي أحلى حاجة في الدنيا، وتستاهل حيرتك.. عارف زمان لما كنت تعمل شريط كوكتيل، وتحط فيه أكثر أغاني بتحبها، وماتسمعش غيره طول الصيف؟! البنت كمان كده"

- "إزاي؟ مش فاهم!"



- "البنت شريط كوكتيل.. بحس إن ربنا جمع فيها أجمل مخلوقاته.. حتى هتلاقى نفسك بتوصف شفايفها بالتفاح.. صوتها بالكروان.. عينيها بعين الغزلان.. ريحتها بالياسمين.. شعرها بالليل.. طلتها بالشمس.. وهي كلها على بعضها زي القمر"

- "ممم.. أنا بوصفها على إنها فرس، وأهو من الطبيعة برضه!"

رد، وهو بيضحك:

- "كل واحد وحسب رؤيته بأة!"

- "طب حضرتك قلتلي ماتتجوزش إلا حب.. ماتتجوزش إلا حب.. وطلعت إن الحب الحقيقي صعب، وشبه مستحيل!"

- "بص يا (محمد)، الحب عكسه الكره، مش جواز الصالونات.. ما بين الحب والكره فيه أحاسيس كتير ومشاعر.. إنت لو شفت الـ (emotions) اللي عندك على الـ (what's app) مش هتلاقى واحد بيضحك، وواحد زعلان، وبس.. لا.. لا.. فيه أشكال كتير! آه إنت ممكن ماتوصلش للحب الحقيقي اللي هو ملوش مدى ده.. دي حاجة مابتحصلش كتير أصلاً، لكن ده مش معناه إنك تتجوز جواز عقلاي بحت! الدنيا مش يا أبيض يا إسود، زي ما قال (نظيم شعراوي) في (شاهد ماشافش حاجة).. لا.. في ألوان كتير في النص! الإعجاب لون.. المودة لون.. العشرة لون.. الجاذبية لون.. يمكن لو الألوان دي وغيرها اتجمعت في لحظة تديك لون أقرب للحب بصفائه وعمقه.. ماتنساش إن قوس قزح سر جماله في تعدد ألوانه!"

سكت.. بفكر في الكلام.. بحاول أستوعب هل ممكن أتنازل عن حلم الحب.. لا.. لا.. بس هو قال ما تتجوزش إلا حب.. آه هو قصده أتجوز واحدة تفرح

قلبي، لكن مش لازم قصة حب تقشعر لها الأبدان.. بس صح أكيد فيه أحاسيس حلوة ترتقي للشعور بالحب.. إيه أحاسيس اللي أنا قلتها دي؟! - "طب بعد إذنك بأة يا (محمد).. أصل دوري جه ورقمي اللي اتنده ده" - "والله يا أستاذ (جمال) أنا اتشرفت بحضرتك" - "بالتوفيق يا (محمد)، وإن شاء الله نسمع عنك كل خير"



## العلم والإيمان

بصيت في الساعة.. يااااه! الساعة بقت أربعة.. الواحد لا صلى العصر، ولا كل حاجة من الصبح.. أنا أنزل أصلي العصر في الجامع، وطيран على البيت بأة.

دخلت الجامع، كان فيه درس.. تقريباً كان من العصر للمغرب.. صليت العصر، ودعيت كثير.. بعد ما خلصت لقيت ولد في سن العشرين بلحية خفيفة اللي هو ولا سلفي ولا إخوان، تحسه مهذبون، وبيسمع (حمزة مرة) عن اقتناع.. بيديني ورقة وقلم وبيشاورلي على الدرس.. قتلته: "معلش أصلي عندي كذا مشوار.. يوم ثاني إن شاء الله".. قالي: "المغرب كمان عشر دقائق.. اسمع الدرس وصل.. عشان حتى ربنا يباركلك في مشاويرك".. وقام ضحك ضحكة اللي هو (اٲكنت منك).. قتلته: "طيب"، ورحت.



الشيخ في آواخر الثلاثينات.. وشه سمح.. حوالبه حوالبى قمن شاب.. أول ما دخلت ابتملى.. قعدت.. وبعدين قالنا:

- "كل واحد يكتب فى الورقة البلى معاه الحاجات بى لو سمحتوا: الأب، الأم، الزوجة، الأولاد، الأصحاب، الصبة، العمل، السبارة، الببب، الوطن، الغربة، علاقتك بربنا، علاقتك بالمجتمع، الفبسوك.. اجمع البلى عنبك منهم، واطرح البلى مش عنبك.. وشوف المصبلة! لو بلساوى سعباء ببقى إنت ماشى صح.. لو مش بلساوى ببقى إنت محتاج تعبب حساباتك"

فضل كل واحد ببص فى الورقة سرحان.. رفبب شاب كبب إببببب، وأذن لببب الشببب بالكلام.

- "أنا أبوببا ابوفى من وأنا فى صمسة ابببببب.. ووبب مش بببببب"

ربب الشببب:

"آب با (بمر) ببب حاجات باربة عن سبببببب، والببب ربمك منها، لكن عببب فى باربة اببببب.. الرببب -بببب الصلاة والسلام- بببب كان بببببب.. ببببب الرببب كان ببب وببب!؟ با (بمر) ربنا بببببب باربة ابببب سواء البلى كبببببب فى الورقة أو ربنا كبببببب، وبببببببببب.. المببب إنك برببب البببب بى، وببببب ببببب."

رفبب وبب ببب كبب إبببب، وسأل:

- "بو البببب سعباء؟"

فضببببب كلببب، بس أنا لأ، ماببببببب؛ عبببب أنا شبببببب إن السؤل بببب.

ربب الشببب:

- "لو كل الجواز سعادة مطلقة مكنش يبقى فيه طلاق.. الجواز هو مشروع سعادة، لكن ساعات الشُّركا مع الوقت بيختلفوا في إدارة المشروع.. فبيقلب لحزن، فملل، فتعاسة.. الشركة عشان تنجح لازم الشُّركا يكونوا مناسبين لبعض"

- "طب وأختار الشريك المناسب إزاي؟"

- "واظفر بذات الدين"

- "صدق رسول الله.. بس برضه.. وأنا آسف يعني يا شيخ.. أنا بلا حظ إن مش كل المتدينين على وفاق.. بشوف كثير مش مرتاحين أو بيطلقوا وكده.. ولا إيه رأي حضرتك؟"

- "وإنت بتحكم عليه إنه متدين إزاي أصلاً، ودي علاقة بينه وبين ربنا؟! تأكد إن التدين بيخلي الروح في أصفى صور ليها، والروح الصافية دي حالتها دائماً مطمئنة مستقرة، فبالتالي عند حدوث أي شائبة أو خلاف.. هتسعى جاهدة للرجوع لحالتها الأولى.. للصفاء.. الشكل الأساسي ليها.. لكن لو روح جامدة قاسية هتتعايش عادي مع الخلافات والخصام والعند.. طب هو فيه ناس بتكون أرواحهم صافية نقية، ومش متدينين! آه ممكن.. لكن الأكيد إن المتدين اللي بجد روحه صافية.. عشان كده الرسول قال واظفر بذات الدين"

- "طب يا شيخ هو الواحد يقدر يعيش مع واحدة مابيجهاش حتى لو متدينة!؟"

سكت الشيخ للحظات، وقال:

- "إنت سؤالك عن الحب من الآخر؟"

فضحك الشباب، وأنا كالعادة ماضحكتش؛ عشان شايف إن السؤال بجد..  
كمل الشيخ كلامه:

- "بصوا.. الممنوع مرغوب.. والرغبة بتتحكم في الإنسان.. يعني مثلاً لو إنت جعان ممكن لما تجري تشبع؟ أو لما تذاكر تشبع؟ إنت عندك رغبة إنك تاكل، ومش هترتاح إلا لما تاكل.. وهتفضل تتألم لحد ما تاكل.. أهى الرغبة دي ممكن تكون شخص.. مش هترتاح إلا لما تبقى معاه.. بتزيد الرغبة، والرغبة هنا بتكون على مراحل سريعة.. الرغبة إنك تشوفه من بعيد.. المرحلة اللي بعدها الرغبة إنك تكلمه.. اللي بعدها تكلمه أكثر.. تقابله.. تمسك إيديه.. رغبات متعددة في تطور مستمر؛ لأن الرغبة الأولى اللي هي بتاعة تلمحه دي مابقاش فيها إشباع.. بتنتهي لآخر رغبة اللي كلنا عارفينها.. وعشان إحنا نيتنا حسنة هنقول الزواج.. بعد الزواج بيكون خلص كل رغباته.. ويبدأ يشوف طبيعة الشخص اللي قصاده بدون أي تأثير"

- "بس اعذري يا شيخ.. في زواج عن حب، ونجح عادي ومبسوطين"

- "آه طبعاً؛ عشان لما زال تأثير الرغبة.. الطرفين أنفسهم كانوا مناسبين لبعض بينهم توافق.. بس هل ده كان صدفة ولا هم كانوا شايفين أنفسهم مناسبين من الأول؟ حالات.. حالات!"

- "طب هو مش (الطيبون للطيبات)؟ ليه بأة بنلاقي واحدة طيبة، وقعت في واحد استغفر الله العظيم يعني أو العكس"

- "طيب أنا هجاوب على السؤال، ونكمل الدرس القادم -إن شاء الله- عشان يدوب صلاة المغرب... قال تعالى: ﴿الْخَبِيثَاتُ لِلْخَبِيثِينَ وَالْخَبِيثُونَ لِلْخَبِيثَاتِ وَالطَّيِّبَاتُ لِلطَّيِّبِينَ وَالطَّيِّبُونَ لِلطَّيِّبَاتِ أُولَئِكَ مُبَرَّءُونَ مِمَّا يَقُولُونَ لَهُمْ مَغْفِرَةٌ وَرِزْقٌ كَرِيمٌ﴾ إنت هنا بتعتقد إن ربنا بيقول إن نصيب الطيب للطيبة

والخبيث للخبیثة.. طب لو هو ده المقصود لیه ربنا قال: ﴿الطیبات للطیبین  
والطیبون للطیبات﴾؟ لیه التکرار مھو النصیب واحد للطرفین؟! عشان هنا  
ربنا صنف البشر رجال ونساء لأربع أصناف.. وقالھم اختاروا الی زیکو الی  
شبهکو، عشان یكون فیہ توافق.. ربنا ما یتکلمش عن النصیب، ربنا یتکلم  
عن طریقۃ الاختیار.. اختار الی زیک"

الأذان أذن.. وانفض المجلس.. قاموا یستعدوا للصلاة.. وفضلت قاعد أنا..  
بفکر هو الجواز نصیب ولا اختیار؟ ولا هو اختیار النصیب؟! وكانت لسة  
عینی علی الورقة.. مش عارف أحسبھا.. هو أنا مرتاح، ولا لأ؟



## فقرة إعلانية

<<الوحدة بتقتلني ولا حد بیسألني...>>

- "ألو أیوة یا ماما"

- "(حمادة)، إنت فین یا حبیبی"

- "أنا تحت البیت، وطالع أھو"

- "لا یا حبیبی.. خلیک.. عایزة أنزل أشتری شویة حاجات من المارکت"

- "لا یا ماما.. أنا مش قادر خالص.. وكمان العربیة مع بابا"

- "یا ابني التلاجة فاضیة.. مش هناخد ربع ساعة.. وبابا جه.. خد عربیتھ"

- "بس عایزین ننجز عشان المعاد.. أنا جعان، ولسة مش عارف هلبس إیھ!"



وصلنا هايير ماركت.. ونفسي أعرف إيه اللي بيحصل للستات لما بيروحوا هايير.. بيهيروا؟! فجأة بيصيبهم داء الطرش مش ييسمعوك.. بيتحركوا ببطء شديد قدام المنتجات.. حركة راسهم قدام رف المكرونة بتشبه حركة رواد الفضاء.. جاذبية رف التونة أقوى كثير من الجاذبية الأرضية! بس أنا فعلاً متأخر، ولو سبت ماما (يوري جاجارين) مش هنخلص.. لازم أدخل!

- "ماما حبيبتي إحنا بقالنا نص ساعة بنجيب كيس مكرونة!"

- "...." ( مابتدش ومركزة على أم رف المكرونة)

مسكت كيس، وقتلتها:

- "ماما لقيتها أهى الحمد لله"

- "لا أنا بدور على مقصوفة!"

- "مقصوفة؟! طب ما تاخدي دي، وقصيتها في البيت قصة حلوة على مزاجك!"

- "....." (مابتدش ومركزة على أم رف المكرونة)

قعدت أدور بعيني بسرعة.. مم.. اسباجتي لأ.. لسان عصفور لأ.. صغيرة لأ.. شعرية لأ.. مق.. مق.. مقصوفاااااااااا!!

- "ماما! ماما! لقيتها أهى الحمد لله!"

- "لا أنا عايزاها روجينا مش الملكة!"

- "إيه الفرق يعني؟ ما كلها مكرونات!"

- "نص جنيه"

- "نص جنيه!؟"

- "أنا حاسة إن أنا ناسية حاجة.."

بعد شوية وقفنا قدام تلاجة الخضروات المجمدة!

- "ماما حبيبتى إحنا بقالنا نص ساعة بنجيب كيس ملوخية!"

- "...." (مابتدش ومركزة في ديب أم الفرزر)

- "ماما! ماما! لقيتها أهى الحمد لله"

- "لا أنا عايزاها بسمه!"

- "إيه الفرق ما هي كلها ملوخيات!؟"

- "نص جنيه"

- "نص جنيه!؟"

- "أنا حاسة إن أنا ناسية حاجة.."

- "طب بقولك إيه يا ماما.. أنا هروح أقعد في الركن البعيد الهادي ده.. على ما تخلصي"

(مابتدش ومركزة في الرفوف) وقامت قايلة تاني:

- "أنا حاسة إن أنا ناسية حاجة.."

قعدت، وسرحت في الناس الي حواليا.. الأطفال.. الشباب.. الأبهاء، والأمهات، والعواجيز.. ودورة الحياة الي بتجري أسرع مما تخيلت.. أنا



تاعب نفسي بجواز، ووجع دماغ وبالآخر عمري هيزيع في روتين الحياة..  
لقيت ماما جت قعدت جنبى، وسألتني:

- "مالك يا ابني؟ سرحان في إيه؟"

- "مفيش"

- "وشك مقلوب.. مالك؟ انطق!"

- "والله الواحد حاسس إنه اتضحك عليه في موضوع العمر ده.. أول عشر  
سنين راحوا في طفولة هبلة من (تاتا).. لـ (كُل بإيدك اليمين).. لـ (سلم على  
عمو سلام رجالة يا (حمادة).. (بتحب مين بأة أكثر؟ ماما ولا بابا؟).

وبعدها عشر سنين تانيين (Teenager)، ودول ضاعوا في سلاح التلميذ،  
وكراسة الأول، وحل امتحان كفر الشيخ عام ١٩٩٧ اللي كله من برة المنهج!

ومن ٢٠ لـ ٢٩ ودول ضاعوا في محاولات بتحاول تشتغل.. بتحاول تخطب..  
بتحاول.. بتحاول حاجات كتير مش فاهمها، بتحاول تفهمها، بتحاول توصل  
لنقطة البداية اللي ترضيك، وفي الغالب بتوصل لنقطة نهاية حلمك، ونقطة  
بداية الرضا بالأمر الواقع.. ومن ٣٠ لـ ٣٩ بيضيعوا في الشغل، وإنك ترضي أم  
العيال.. شغل أم العيال.. شغل أم العيال لحد ما بتوصل لمرحلة أم الشغل  
لأم العيال! والأربعينيات بتضيع كلها في سؤال (هو أنا كنت صح؟) وغالباً  
بتبقى إجابته (يا ريتني..!).

والخمسينيات هي بداية دخول حرف الدال في حياتك.. أسماء جديدة في  
(Contacts) عندك كلهم اسمهم بيبدأ بالدال.. الدكاترة! وهتبدأ تمسح  
أسماء ثانية عندك؛ لأنهم مش هيردوا عليك خلاص.. صورك مع أصحابك كل  
يوم هتنقص واحد! والسيتينيات هو الانتظار.. وتخيل شكل النهاية!

هو ده العمر"

وديت وشى الناحية الثانية، وماما قامت مطبطة عليا، وقالتلي، وابتسامة على وشها:

- "لأ مش هو ده العمر.. العمر مش بيتحسب كده.. يوم نجاحك مش ده يوم بالعمر كله؟ يوم اعتزافك بحبك ليها مش ده يوم بالعمر كله؟ يوم ما قبضت أول مرتب ليك وعزمتنا، مش ده يوم بالعمر كله؟ يوم جوازك، وكل حبايبك فرحانين بيك مش ده يوم بالعمر كله؟ يوم ما تطلع عمرة مش ده يوم بالعمر كله؟ يوم ما اتجمعت إنت وولاد خالتك وافتكرتوا أيام زمان؟ أيوة في اللمة لما صوت ضحكة العيلة بيعلى بالتدريج، لحد ما سمع الجيران.. يوم ما أول مرة يقولك (بابا)، وإنت قتلته: (بتحب بابا أكثر ولا ماما؟) ورد قال: (ماما) عادي.. ده.. مش.. يوم.. بالعمر كله؟ ويوم ما ضحكت من قلبك في لحظة نسيت فيها مشاكلك يوم ما بتنزل مع أصحابك تلعبوا بلاي ستيشن؟ لما طلبت معاك تسمع (منير) مع واحد نسكافيه، ويوم أما تنزل مع حفيدك صلاة العيد مش يوم بالعمر كله؟ فيه لحظات في العمر بالعمر كله.. شوف كام مرة قلت لواحد صاحبك فاتك نص عمرك على لحظة ما فاتتش عليك.... شفت بأة إنت عشت كام عمر!؟"

بصيت ماما، وقتلتها:

- "ربنا يخليكي ليا!"

ماما قالتلي:

"مش يلا بأة عشان تلحق معادك؟"

قتلتها:

- "طب يلا نحاسب بسرعة"

قالتلي:

- "أنا حاسة إني ناسية حاجة"

الكاشيير: "حمد الله على السلامة يا فندم"

حسيت إن إحنا وصلنا الكارثة بتاعت مصر إسكندرية الصحراوي.

الكاشيير: "الحساب يا فندم ٨٧٩.٣٤ جنيه"

أنا: "٨٠٠ وكام!!؟"

ماما: "مش بقولك حاسة إني ناسية حاجة؟ بيكنج باودر.. شفت عشان صرعتني!"



## ماما نجوى وبُقلظ

وصلنا البيت أخيراً.. بابا كان لسة نائم.. يا دوب قعدت على الكرسي، وقلت لماما:

- "ماما أنا هموت من الجوع"

- "هضرلك الغدا حالاً.."

- "هو الغدا إيه صحيح؟"

- "بيض ورنجا وهقطعلك بصل!!"

- "نعم!! بيض ورنجا؟! وبصل!! ده أنا يتقبض عليا بتهمة ارتكاب جريمة أكل!"

- "ما أنا قتلتك مفيش أكل... عشان كده نزلت اشترى شوية الحاجات دي"

- "طب اعميلي ساندوتش جبنة!"

- "بقولك إيه.. بقولك إيه.. ألبس ده ولا ده؟"

- "ممممم.. ماما إنتي أصلاً مش هتيجي"

- "ليه بآة إن شاء الله!؟"

- "عشان أول ما هخرج هتقلبوها استديو تحليلي.. هتعملي فيها (مدحت شلبي)، وبابا (فتحي سند).. وتقعدي تشكري فيها، وتقولي بصوت (مدحت شلبي): "البت دي عليها مشية هالله هالله هالله! من البنات اللي في منتهى الشياكة.. منتهى الأنافة.. وأحب أقول بمنتهى الشفافية، ومن وجهة نظري المتواضعة، والتي لا قيمة لها إطلاقاً، إن ماماتها ست في منتهى الشياكة.. منتهى الأنافة.. وناخذ تلت أربع رسائل من خالتك وجدتك يقولوا: (يا كابتن (حمادة) العروسة قمر يا ابني.. اتكل على الله).. والدوري لازم يرجع، ولو حتى من غير جمهور، مش مهم، ولا حتى من غير لعبية مايجراش حاجة!"

- "بتتريق على أمك يا حبيب والديك؟! طب مانت بتعملنا فيها (علي جابر) بتاع (Arab Got Talent)، ومش بيعجبك العجب.. ده إنت وشك بقى شكل زرار الـ (BUZZ)!"

دخل بابا الصالة، وفأيده طبق جيلى عمال ياكل منه، وهو بيضحك، وقال:

- "إنت عامل فيها بَرَم، وبترد على أمك؟ أما نشوفك قدام العروسة هتبقى كده، ولا هترتعش زي البتاع اللي في إيدي ده؟" .. ودخل تاني أوضته.

قلت لماما: "اتصرفي.. أنا هموت من الجوع"

دخلت ماما، وشوية لقيت في إيديها جزمة حريمي بكعب، وبتديها لي!  
- "إيه ده يا ماما؟ هاكل جزمة!! آآآه هو ده بأة اللي اسمه هتاكل بالجزمة القديمة!!؟"

- "(حمادة) يا حبيبي.. أنا عارفة إن أنا كنت بكرهك في البنات من صغرك.. وعارفة إن علاقاتك بالبنات محدودة! وأصيع حاجة عملتها في حياتك إنك ركبت جنب سواق تاكسي بيعاكس بنات! عشان كده عايزة أفهمك حاجة.."

- "آآآه يبقى ده اللي اسمه هتفهم بالجزمة القديمة!!"

- "أنا عايزة أفهمك الست أو الأنثى باختصار"

- "الحمد لله أنا النهاردة خدت كورس مكثف في البنت واللي جابوها.. ماما أنا جعان!"

- "(حمادة)! البس الجزمة دي"

- "نعم ياختي! ألبس إيه!!؟"

- "البس الجزمة!"

- "مسستحيل! أنا عارف إنك كان نفسك تجيبي بنت.. بس مش أنا يا ماما.. لا.. لا.. مش أنا!" (بصوت علي ربيع)

- "يا حبيبي اسمع كلام أمك ربنا يهديك، والبس الجزمة أم كعب"

- "والله لو حصل إيه ما هلبس أم الجزمة أم كعب!!"

- "قول كده يا (حمادة)!"

- "أقول إيه؟"
- "إنت عايز تقلص دوري في القصة بتاعتك!"
- "يا ماما حرام عليكي! ده إنتي في نص المشاهد اللي كتبتها!!"
- "لا خلاص ولا تقولي (ماما) ولا نيلة"
- وبدون أي حبكة درامية.. ردت ولبست الجزمة أم كعب.
- "أديني لبستها"
- "قوم اقف"
- "أديني وقفت"
- "ها؟"
- "ها إيه؟ أرقص؟؟"
- "ها! فهمت حاجة؟"
- "مافهمتش حاجة"
- "حاسس بإيه؟"
- "حاسس... حاسس إن لأول مرة في التاريخ الصابع الكبير يبقى جنب الصابع الصغير.. ده إيه العذاب ده!!؟"
- "عذاب.. أيوة كده.. قربت تفهم!"
- "أفهم إيه؟"
- "امشي كده.."
- "حاضر" (وأنا همشي بقع.. رافع إيدي عشان أوزن نفسي.. كنت شبه العروسة الماريونت)

- "ضم رجلك عشان تعرف تمشي"

- "أضمها إزاي يعني؟! إنتي نسيتي إني راجل ولا إيه!!!"

- "طبعاً راجل وسيد الرجالة"

- "قصدك سيس الرجالة!!"

- "طب اسكت وركز.. وقولي حاسس بإيه؟"

- "ألم في كعب رجلي.. وجع في بطن رجلي.. عذاب في صوابع رجلي.. وحاسس إن جسمي مشدود.. وبقي عندي سمانة رجل ولا سيد معوض"

- "هي دي الفكرة يا (حمادة).. الست ممكن تعذب نفسها عشان تحس بأنوثتها.. أ ب ست حسسها بأنوثتها.. الجزمة الكعب دي بتديها ثقة زيادة.. خليك إنت ثقتها في نفسها.."

- "آه يعني أكون ليها جزمة بكعب!!?"

- "خمسة سنتي بتعلاهم عن الأرض.. بتكون بيهم في قمة السعادة.. تخيل!! مش بتاخذ بالها من أي وجع في ضهرها، ولا رجليها، ولا جسمها لمجرد إنها حاسة ببهجة.. آه بهجة!! إنت كمان دورك تعليلها.. خليكها توصل للسما مش خمسة سنتي بس.. وهي مش هتحس منك بأي وجع أو تقصير حتى لو موجود!"

دخل بابا علينا.. والماردي كان ماسك طبق فاكهة.. باصلي من فوق لتحت وأنا لابس الجزمة الكعب.. وقام مقرب مني، وواخذ صباع موز.

وقالي:

- "خد!"



## إخراج رائد لبیب

ركبت العربية أنا وبابا متجهين للحدث التاريخي.. بس أنا كنت متضايق من بابا.. مع إني كنت أقلمت نفسي خلاص.. بس حاسس إنه دبسنني.. ضحك عليا.. هو إيه اللي (عندك معاد بالليل)!!؟

أنا: "بابا هو حضرتك مش شايف إنك قلتني في آخر لحظة!! على فكرة أنا رايح عشان ما حرجش حضرتك.."

بابا: "لأ أخرجني عادي يا روح أبوك.. لو عايز نلف نرجع معنديش مانع"  
أنا: "بعد إيه بأة!!؟"

بابا: "اوعى تكون فاكِر الجواز قميص النوم أبو ريش ومفرش سرير حرير تتزحلِق عليه طول الليل!! لا ده الجواز ده مسؤولية.. عارف يعني إيه مسؤولية؟ يعني تبقى راجل كافي بيتك من كافة الشيء.. دي مهمة ولازم تكون أدها.. مهمة بتبدأ من أول ما بتخبط على بيت العروسة لحد عمر طويل.. مهمة شاملة مجهود ذهني، مادي، وجسدي"

أنا: "ده كده أصعب من (مهمة في تل أبيب)!!!"

بابا: "إنت هيتعمل فيك أكثر من اللي اتعمل في (نادية جندي)"

أنا: "بابا، إنت كلامك بيخوف مايشجعش"

بابا: "بيخوف! إنت شوية يابني وهتعدّي الثلاثين.. الراجل أدأوه بيقل، وهتبقى خيبتك على انت ومراتك كاتبة (feeling unsatisfied).. وريني كده ركبك!! ده إنت شطبت يا عالمي! إنت رايح ليه أصلاً؟ أنا بقول نلف ونرجع!"



أنا: "بابا، إنت مالك النهاردة صادم كده!؟"

بابا: "إنت فكرك مرتبك ده يفتح بيت!؟ يشتري ثلاثين سنتي في شقة!! يدخل عيل مدرسة!؟ يطّلع سفريّة ساحل كل سنة!؟ إنت مش هتشوف الساحل غير كل أربع سنين زيه زي كأس العالم!! إنت عارف إحنا دافعين كهربا كام الشهر ده!؟ ابقى سيّب بأة التلفزيون جمبك مفتوح، وإنت قاعد على اللاب!!"

أنا: "بابا حضرتك مالك مُحبط!؟"

بابا: "لا.. ولا محبط ولا حاجة.. أنا بقول تخليك في الكرّش بتاعك اللي إنت متبنيه ده.. والدليفري بتاعك.. الفراخ البيضاء ما شاء الله خلت صدرك ولا بنوتة عندها 14 سنة.. إنت أثبتّ لي إن الـ (dinner box) ممكن يقطع على السليكون في المستقبل!!"

صمت..

صمت..

صمت...

أنا: "طب هما إني داخل على يوم مهم وحضرتك أب وكده.. مش هتنصحنى نصيحة!؟"

بابا: "ما تاكلش من برّة عشان بطنك"

أنا: "يا بابا انصحنى"

بابا: "ابقى ذاكر بورقة وقلم عشان المعلومة تثبت"

أنا: "هو أي نصيحة وخلص!؟ حضرتك دست جامد في البيض والرنجة ولا إيه!!"

هو بابا ماله؟! ده كان غاوي ينصحنى! هو خلاص بقى بارد من نحيتي، وفقد الأمل فيا؟! معقول رمى طوبتي!! ولا بيهاجمني قبل ما ألومه على الموقف المنيل بتاع النهاردة!! ولا عايز يحسسنى إني مخير؟ عايز يرفع من عليا أي ضغوط من نحيتي.. عايز يوصلني إن الموضوع في الأول والآخر ليا!!

دخلنا وسط زحمة ميكروباصات، ولقيت بابا بيشاورلي على ظهر ميكروباس، وبيقولي: "اقرأ كده".

أنا: "أبو تريكة؟"

بابا: "اللي تحتها يا ذكي"

أنا: "هي بتيجي برزقها؟"

بابا: "أيووااااه! هي.. بتيجي.. برزقها! فهمت؟ هي بتيجي برزقها يا (محمد)..

اقرأ اللي هنا كده"

أنا: "(اهدا يا حيلتها.. تمنها بسيغتها)!!"

بابا: "خدت بالك؟ باعت سيغتها ووقفت جنبه!!"

بص ثاني من شبك العربية زي ما يكون بيدور على حاجة، وقال: "اقرأ ده".

أنا: "(الفرصة.. بنت جميلة.. راكبة عجلة ببدال)!!"

بابا: "والعاقل.. لو يلحقها.. يتبدل بيه الحال!! الحق أمها بقى يا ابني واركبها!!"

أنا: "حلوة منك دي يا بابا"

بابا: "اقرأ اللي هناك دي بأة"

أنا: "(أنا بابا يله)!!؟"

بابا: "أيواااا!... أنا بابا يله"



## نهاية الإرسال تششششش

وصلنا عند بيت العروسة.. كنا مستنين الأسانسير ينزل.. لقيت بابا يقول:  
"أومال فين يا ابني التورته؟! إنت نسيتهها في العربية!؟".. قلت لبابا:  
"تورته!؟".. قالي: "آه أنا جبت تورته.. اجري هاتها من العربية".. كان  
الأسانسير نزل.. بابا قالي: "هسبقك أنا عشان ما نتأخرش على الجماعة".

رحت جبت التورته من العربية، وقلت أجيب بالمرة نعناع من الكشك الي  
قدام البيت.. لقيت الراجل بيديني الباقي ومن ضمن الباقي خمسة جنيه  
مكتوب عليها.. "حبيبتى.. لذكرى لا تنتهي.. لأيام حلوة بينا.. يارب دائماً  
سوا.. (أمير) بيحب (ياسمين)".. (أممبيير) بيححب (ياالاسممين)! هم  
ورايا ورايا؟! بس إيه ده؟ لحظة واحدة! هم سابوا بعض؟! أكيد (ياسمين)  
مش هتصرف الخمسة الجنيه إلا لو كانت مش طايقة الي جابوا (أمير)!! لا..  
لا.. بلاش ظن سيئ.. ما يمكن ضحت بالخمسة جنيه عشان تساعد في شرا  
السفرة! ياااااااااه! الواحد وقع في إيديه كام جنيه عليه رسائل حب! معقول  
العلاقة الي بينهم ماتسواش جنيه! جنيه اتشروا بيه فريسكا! هي دي قمة  
الاندهاش بصراحة!

وصلت عند الأسانسير، ولقيت نفسي بطلع السلم.. سرحان في اليوم ده.. هو  
ممکن يطلع حلم.. وشوية وألاقي ماما بتصحيني!! بس لأ.. ليه حلم؟ أنا

استفدت على فكرة.. أنا اكتشفت بعد اليوم الطويل ده إن رغم خبرتي إني مكنش عندي أي خبرات!! كنت صفحة بيضا عليها شوية شخبة مهتم بالشكل.. سطحي زي سواق التاكسي اللي قابلني في أول اليوم.. مافرقتش عنه حاجة غير لغة التعبير! اكتشفت إن الواحد لو متفتح فعلاً يدي لنفسه فرصة لأي حاجة.. مش يحدد نفسه في إطار.. الإطار مهما كان واسع برضه ليه حدود! لازم أتخلص من حدود تفكيري إن لازم أتجوز بطريقة معينة! آه مفيش حد كامل.. لكن فيه اتنين بيكملوا بعض.. ولو فيه مساحة بينهم مش كاملة صغيرة نسبياً.. المساحة دي هي اللي اسمها التنازل.. أيوة بتكمل بالتنازل! اكتشفت إن فيه طرف تاني ليه فتى أحلام، ومش سهل تكون فتى أحلام! دلوقتي الصفحة البيضاء اتملت.. اتملت آمنيات.. بقى عندي أمل.. بقيت عارف عايز إيه.. مابقتش خايف ولا معقد! هدور على نصي الثاني أياً كان مكانه.. حتى ولو في الصالون... الحب رزق اسعى ليه.. لاقيه.

قربت على الباب.. خت نفس عميق.. سميت بالله.. قريرت الفاتحة.. توكلت على الله.. توكلت على الله.. هو أنا ليه محسس نفسي إني داخل أعمل عملية استشهادية!؟

خبطت على الباب...



## ( ٢ )

ساد الصمت فجأة في المكان، بعد أن انتهى (هاني) من آخر كلماته.. "خبطت على الباب".. نظر (منير) إلى (هاني) نظرة تعجب، وقال مستفهماً:

- "إيه يا ابني سكتّ ليه؟! حصل إيه بعد ما خبط على الباب!؟"

رد (هاني) بصوت مرتعش، رافعاً كتفيه دافساً رأسه بينهما:

- "أصل الورق خلص على كده"

قالها (هاني)، وبعدها تذكر أن الأوراق قد تناثرت في مكتبه من قبل، فمن الممكن أن يكون قد نسي باقي القصة هناك.. تنفس الصعداء، وقال:

- "ممکن تكون بقيت القصة دي في مكتبي"

رمقه (منير) نظرة غاضبة.. نظرت (روزا) إلى (منير)، ثم التفتت إلى (هاني) قائلة:

- "روح يا (هاني) إنت دور على اللي ناقص، وارتاح شوية من القراءة، وعشان ننجز هات القصتين اللي في إيديك دول نقرا واحدة فيهم"

انصرف (هاني) بعد أن أنقذته (روزا) للمرة الثانية.. ابتسمت (روزا) ابتسامة هادئة لـ(منير)، وقالت:

- "ها! تحب نقرا إيه؟"

يبدو أن (روزا) دائماً تحل محل عصير الليمون لـ(منير)؛ فقد تحول مئة  
وثمانين درجة.. قال لها مبادلها الابتسامة:

- "طبعاً بصوتك يبقى قصة البنت"

وبدأت روزا القراءة.

~~~~~

صحيت من النوم على صوت موبايلي، ببص في موبايلي لقيتها (هبة)
صاحبتي، (هبة) صاحبتي دي مش ستايلي، ولا نفس دماغي، بس بموت
فيها، دمها خفيف أوي بنت الإيه.. هي مخطوبة عن حب، مسكت الموبایل،
وأنا لسة نائمة في السرير، ورديت عليها بوشوشة: (ألو) ردت (هبة): "أيوه
يا ضنايا إنتي فين؟" .. آه شكلها عايزة ترغي.. رديت، وبصوت ضعيف؛ عشان
تفهم إني نائمة لو مافهمتش من (ألو) الأولانية: (أنا فين؟ أنا في البيت)..
ردت (هبة): (مانا كمان في البيت.. أومال مش شايفاي يعني!)

خت نفس عميق، وخرجته.. قلت ليها:

- "أوووووف! شكلك فايقة، وأنا مش قادرة، وعايزة أناام"

(هبة): " تنامي إيه الساعة واحدة؟!"

رديت: "بجد؟"

(هبة): "إيه مالك؟ اتخضيتي كده ليه يا ضنايا؟"

قلتله: " أصل عندي كذا مشوار"

قالتلي، (وحسيت إنها بتغمز في الموبايل): "انتوا فيه حد جايلكوا النهاردة الساعة ثمانية ولا إيه؟"

اتوترت لحظة كده، وقلت: "اممم"

(هبة) قالت: "ها! كملي.. أنا هشد الكلام من بؤك يا (دينا)"

قلتله: "معنديش معلومات عنه أوي"

(هبة): "يا مسهل.. وحد ثاني يعرف غيري؟"

قلتله: "أبدًا.. أنا مش قايلة لحد.. إنتي، و(سالي) و(جودي)، و(كارلا)، و(ماري)، و(رنا)، و(سوو)، وبس.. عشان عايزة الحوار يظبط المرادي بأة"

(هبة): "آه كده أحسن.. ماتقوليش لحد"

قلتله، وأنا بحاول أغير الموضوع.. قال يعني واعية بأة:

- "وإيه الأخبار ثاني؟"

(هبة): "اسكتي! مش شوفت عروسة (أحمد علاء)!"

قلتله: "بتهرجي! فين؟"

وقمت أنا قاعدة عالسرير كده..

(هبة): "على الفيسبوك.. لا.. لا.. ضايعة يا بنتي.. أنا مش متخيلة إن (علاء) يقع الواقعة دي!"

قلتله: "كانت لابسة إيه؟ احكي لي"

قالتلي: "أولاً كده مش محجبة.. مش ده الي كان عمال يقول مراقي هنقبتها،
ومش عارف إيه؟! وجسمها ضايع.. مليانة موت، زي (مروة [أما نعيمة])..
تحسيها بتهرب سيليكون في مناطق معينة كده"

قعدت أضحك موت.. قتلتها: "بس بس.. ده إنتي شوهتيها"
وكملنا ضحك، وبعدين قطعت ضحكتي، وقالت: "اسكتي! مش (منة)
اتحجبت!"

قلت: "لا.. لا.. بتهرجي"
قالت: "والله! عشان يجيلها عريس وتتجوز.. (منة) اتحجبت، و(سارة) بأة
قلعت الحجاب.. عشان برضه يجيلها عريس"
وفجأة لقيت ماما داخلة عليا، مقتحمة الأوضة، وكأنها كانت شغالة في أمن
الدولة قبل كده!

وقالت بصوت عالي: "إنتي صحيتي أهو.. طيب يلا بأة قومي عشان عندك
ميت مشوار".. وبتجز على سنانها.
قتلتها: "هقوم أهو"

قالتلي بصوت واطي خالص، وهي خارجة من الأوضة:
- "أختك (ندا) حامل"

قتلتها بصوت عالي: "تاني!؟"

لقيت (هبة) على السماعة بتقولي بفضول: "إيه؟ إيه؟"
قتلتها: "مفيش.. ده (ندا) أختي حامل.. وعندها أصلاً ولدين وبنت"
قالتلي: "لأ.. بعد كده ماتخلوهاش تقعد هي وجوزها لوحدهم"

وقعدنا نضحك، وبعدين قتلها:

- "إنتى ملكيش إلا (هشام) خطيبك اللي بيعرف يسكتك"

قالت: "لاااا!! بلاش (هشام).. ده مطلع عيني كل يوم خناقة من الهوا"

قتلتها: "ليه بس؟"

خدت نفس عميق، وقالت:

- "كل ما نخرج يقلب وشه.. لبسك ضيق.. الميك أب أوفر.. متضحكيش

بصوت عالي.. غطي قصة شعرك، وقتله ميت مرة (يا (هشام) يا حبيبي أنا

بحب أبقى شيك، ومش هلبس أنا عبايا.. مش هبيع لبن أنا)"

قعدت أضحك..

وبعدين كملت كلامها: "هتقولي إيه بأة؟! تفكير شرقي ذكوري متعفن!"

رديت بصوت عاقل كده، وقتلتها:

- "سبحان الله.. الولد لما يقول (وسعي لبسك، وخفي ميك أب) تتهمه البنت

بالتخلف.. وهي نفس البنت اللي بتضايق لما مايكلمهاش يوم، ولا يكون

مشغول في شغله عنها، مع إن برة في بلاد الفرنجة.. البنات اللي مش متخلفة

مايتضايقوش من الكلام ده"

لقيتها سكتت.. خفت تكون اتضايقت.. قلت أوضح وجهة نظري.. قتلها

بصوت هادي:

- "يا (هبة)، الولد بينجذب للبنت عن طريق عينيه أما البنت بتنجذب

للولد عن طريق ودانها لما تسمع منه كلمتين حلوتين.. عشان كده هو

بيضايق لما تبقي مزة مع إنك شايفها شياكة.. هو بيضايق عشان عارف

تأثير ده على أي ولد ثاني.. زى ما إنتي بتتضايقي لما يقول كلمتين حلوين، ولا يهزر مع بنت، ولو حتى مع بنت خالته، مع إن بنت خالته دي كانت مرزوعة قدامه من قبلك بسنين، واختارك إنتي في الآخر.. هو شايف إن الكلام الحلو لباقه.. لكن ده بيضايكك عشان إنتي عارفة تأثيره على البنت"

لسة ماکملتش كلامي، ولقيت اقتحام ثاني من أمى على الأوضة، ومن غير ولا كلمة بصتلي البصة إياها.

قلت لـ(هبة): "طيب يا (هبة)، تقريباً دي آخر دقيقة.. الموبايل هيفصل"

قالتلي: "يا بنتي أنا اللي متصلة بيكي أصلاً!"

قلتلها: "هشحن وأكلمك.. سلام"

وقفلت.

شلت الموبايل من الشاحن.. الموبايل ده بالنسبالي من أهم تلت حاجات في حياتي: الموبايل، الشاحن، والفيشة اللي بيتحط فيها الشاحن! خدت الموبايل من الشاحن، وقلت لما أ(Check) بسرعة الفيسبوك! مم (رودي) (In Relationship with) (أحمد)! بعدها (زينا) [ادعوا لبابا عشان تعبان! بعدها (رامي) عامل Page لـ Like (صافيناز)، و Page لـ Like [يللا نخلي صفحة الكعبة أكبر صفحة في التاريخ] في نفس ذات اللحظة! وبعدها (زينا) اللي كانت باباها تعبان، وبتبوس إيدنا ندعيه عاملة شير لأغنية (إليسا).. (عيشالك أحلى سنين)! بعدها (عمرو) كاتب Status على رئيس الوزراء.. السـComments اللي تحتها كلها تظييط في (هند) اللي معاه في المكتب! مم.. إيه ده؟! (رودي) رجعت Single! (رودي) listening to (مصدومة بجد)! (رودي) كتبت Status.. (فيه حاجات بتيجي عشان تفرحك يومين، وتتعبك بقيت العمر!).. (رودي) listening to (نسيته خلاص)! (رودي) ...is إيه!

معقول؟! ... (رودي) is engaged ... إيه ده يا (رودي)؟! ده أنا لسة
ماقومتش من على السرير!!

أنا مكسلة أقوم بصراحة! لقيت صوت جاي من آخر الشقة.. "قومي يا....!"
هي شتيمة كده بتجمع بين كلمة زفة وفتة! ماما بتحب تدليني! قمت وأنا
بكتب على الـ Facebook.



خرجت من أوضتي.. أوبأا!! أنا سامعة برة صوت طنط (جيجي) جارتنا! دي
لو شافتني مش هنخلص رغي رغي! لا وطنط (جيجي) ليها طريقة في الكلام
غريبة، بتضحك أوي.. كتر قعدتها قدام التلفزيون غير لغتها خالص!

لقيت ماما وهي واقفة برة بتقولي، وهي حاطة إيديها في وسطها: "أخيراً
قمتي! اعملي لي أنا وطنطك (جيجي) نسكافيه"

قلت لماما من غير صوت، بحركة شفايف بس: "حاضر"

دخلت الحمام غسلت وشي في السريع.. ببص في المرآة.. ده منظر واحدة
جايلها عريس بالليل؟! بحواجب (تامر حسني) دي! لا أنا لازم أظبط نفسي
عشان مايرفضنيش... وأنا اللي أرفضه.. نياهاهاهاها! (ضحكة الساحرة
الشريرة في أي فيلم كارتون)!

عملت النسكافيه، ودخلت بسرعة لميت شعري، وخرجت للصالة!! لمواجهة
رغي طنط (جيجي).. لغة طنط (جيجي).. بجاجة طنط (جيجي)! تربون
طنط (جيجي) الي ما بتغيروش!

طنط (جيجي): "أهلاً أهلاً بـ(دودو)!"

أنا: "إزيك يا طنط؟ اتفضلي" (وقدمتلها النسكافيه)

طنط (جيجي): "جرا إيه يا (دينا)؟ عايزين نفرح بيكي بدل ما إنتي (زينات
صدقي) كده!"

قلت في سري: "آه بدأنا الفقرة".. وقامت باصة لماما، وكملت حكاية كانت
بتقولها قبل ماجي..

- "البت بنتي شقية أوي.. كل شوية أقولها اقعدي (حازم إمام).. اقعدي
(حازم إمام)، وهي تفضل تتـ(رامز جلال) برضه.. آخرة ما زهقت قتلتها
(هجيلك (أحلام) الي بيخوف!) الواد (عمر) ابني الي دلوقتي -ما شاء الله-
بقى (هاني رمزي).. كان خارج من كام يوم، وفاتحلي القميص ومبين (تامر
حسني).. أبوه كان قاعد جنبي، اتفرز، وقام (لميس الحديددي) فيه حسه كان
جايب آخر الشارع.. قاله: (شكلك [شريف مذكور] أوي.. خليك بريل!!)
أصل جوزي مايحبش الحال الـ(فيفي عبده) أبداً! ده أنا فاكرة حتى أيام
الخطوبة كنت لابسة بنطلون ضيق من عند الكيم كاردشيان وحلف ما
أخرج كده أبداً.. أصله بيـ(هشام الجخ) عليا.. أيوة بيـ(هشام الجخ)!"

بسمع طنط (جيجي)، ومش مصدقة أد إيه القعدة قدام التلفزيون أثرت
على لغتها! لقيتها قامت بصالي، وقامت باصة لماما، وقالت:

- "اسكتي.. صحيح ده أنا نسيت أقولك.. ده أنا جايبة لـ(دينا) عريس..
الواحد يا شيخة بقي عنده (محمود بكر)!"

قلت لها: "يا طنط اسمه AL (محمود بكر)!"

ولا كأني رميت إفيه، وكملت كلامها:

- "عريس إنما إيه! عينيه لونها (مصطفى قمر).. الواد معاه ساويرس في البنك.. أخلاقه (مصطفى حسني).. ودمه (باسم يوسف)!"

وقامت بصالي، وقايله:

- "بس إنتي يا (دينا) ماتزعليش مني يعني.. عايزة تدرة شوية.. آه ابدئي اعملي (مها رادميس)، ويبقى فيه يوم في الاسبوع (مها أحمد).. كلي الي إنتي عايزاه!"

طبعاً أنا كنت في قمة الغيظ من كلامها.. ماما لاحظت فقامت مغيرة الحوار، وقالت:

- "صحيح يا (جيجي) ياختي.. إيه الدوشة الي كانت في الشارع امبارح بالليل دي؟؟"

طنط (جيجي):

- "يا ساتر! الشارع بقى حاجة تقرف.. امبارح مسكوا واحد بيـ(حمدي الوزير) واحدة.. وقام البواب مديله بـ(أحمد السقا) في راسه، وسابب له (مرتضى منصور) أمه!"

وبعدين طنط (جيجي) قامت واخدة بق من النسكافيه.. وسألاني باستغراب، وهي بتستطعم:

- "النسكافيه ده.. على إيه؟"

قلتلهما: "ما أنا مالاقتش الـ(صافيناز) في التلاجة! فعملته نسكافيه بميكس شوكولاتة.. وعلى فكرة ميكس شوكولاتة دي بجد مش استعارة مكنية!"

ماما قامت مبرقالي.. بس أنا ما كنتش فاهمة عايزة إيه! عمالة تبرق.. تبرق.. وأنا مش فاهمة! هل هي بتبرق عشان أنا عملت النيسكافية بميكس شوكولاتة؟! ولا بتبرق عشان أخرجت طنط (جيجي)? ولا يمكن بتبرق حركة عصية جديدة جتلها النهاردة الصبح?! لا بتبرق عشان أقول Kent! ولا يمكن بتبرق عشان...



♥♥♥♥♥

"هو إنتي مش عندك مشاوير يا (دينا) أد دماغك!?"

ده ماما قاطعت تفكيرى، وهي بتجز على سنانها!

"آه يا ماما يا حبيبتي عندي مشاوير أد دماغي"

رديت بمنتهى الهدوء..

"طب مش نستأذن بأة، ونشوف ورانا إيه؟"

مش عارفة ليه ماما محسساني إني حابة القاعدة بتاعة طنط (جيجي)!!
دخلت أوضتي.. أول حاجة عملتها وزنت نفسي على الميزان.. مم.. الله! إيه
ده أنا زائدة اتنين كيلو؟! ده أنا لسة وازنة نفسي امبارح قبل ما نام.. هو أنا
بتخن وأنا نائمة، ولا بتخن لما بفكر في الأكل؟
رن الموبايل..

(ندا) أختي بتتصل..

- "عرووستنا.. ها! جاهزة؟"

- "لا والله يا (نودي) لسة"

- "طب ماتجهزي"

- "صحيح.. ألف مبروك على الباي الجديد"

- "الله يبارك فيكي.. الدكتور بيقول بنت"

- "وهتسميها إيه؟"

- "مش عارفة.. اقترحي عليا يا (دينا)"

- "إيه رأيك في (هالة)؟"

- "لا عايزة اسم مركب كده!"

- "(هالة تورز) مثلاً!"

- "لا ده مفهوم وسهل!"

- "إيه رأيك في (جرفينيو)؟"

- "تحفة.. معناه إيه؟"
- "ده رأس الحربة بتاع روما!"
- "إيه! ده اتسمى قبل كده!"
- "طب إيه رأيك في (هالفينيو)!"
- "اسم تحفة!! بس حاساه ناقص حاجة!"
- "تجبي نزود حاجة في الآخر تديه طابع عصري؟"
- "يا ريت!"
- "ممم.. (هالفينيو جرام)"
- "يا بنت الإيه.. جاية من الانستجرام!"
- "آه إيه رأيك؟"
- "طب مانزودش حاجة إسلامي كده، عشان البت ربنا يبارك فيها؟"
- "إيه رأيك في (هالفينيو جرام الدين)!!"
- قعدنا نضحك على الهري اللي بنقوله ده، وبعدين (ندا) قالت:
- "طب بقولك هنعدي عليكى أنا و(رامي) والعيال كمان نص ساعة"
- "ليه؟"
- "إنتي يا بنتي مش عايزة تشتري حاجات لبس وبتاع؟! هو هيوصلنا City stars!! وهيقعد بالعيال في ال kids zoon!!"
- "طيب تمام، أنا هجهز حالاً... سلام"

أحلى حاجة في مقابلات العرسان إن كل قعدة مع عريس بطلعلي بطقم جديد.. لما ببقى محتاجة أجيب جزمة ولا حاجة.. بوافق إني أقعد مع أول عريس يتقدم!

- "يشيلك ويحط عليكي! إنتي لسة قاعدة؟ مالبستيش؟!"

- "يا ماما لسة قافلة مع (ندا).. هتعتدي عليا!"

- "طب شهلي يللا.."

- "حاضر!"

- "ماتنسش تجيبي الجاتوه.. وروحي للكوافيرة.. و..."

- "طيب إيدك على فلوس!"

- "خدي اللي إنتي عايزاه من البوك!"

- "بوك إيه يا غسل؟! الموضوع أكبر من كده"

- "ليه إن شاء الله؟!"

- "هجب لبس إن شاء الله!"

- "مم.. ماشي يا (دينا).. بس ياريت توافقي بأة على العريس اللي جايلك

ده.. عشان طولتي.. الصيني اللي تحت سريك اشتكى!"

- "طولت!"

- "ده العريس رقم كام يا (دينا)؟"

- "هو كان جه حد مناسب، وقلت لأ يعني؟! مش كفاية بوافق على طريقة

المعاينة دي؟!"

- "ليه وهو فيه طريقة تانية وأنا ماعرفهاش؟"

- "آه فيه"

- "إنتي عارفة لو أبوكي سمعك هيعمل فيكي إيه؟"

- "....."

- "ما إنتي اللي مايعجبكيش العجب.. ماله (أحمد) ابن خالتك؟ عيبه إيه؟"

- "إنه ابن خالتي!!"

- "و(تامر) ابن (إصلاح)؟"

- "بيتفتف وهو بيتكلم!"

- "واللي كان جاييهولك خالك؟"

- "بيلبس بنطلونات skinny بتبرز مفاته!!"

- "وإيه المشكلة؟ واحدة واحدة هينغير"

- "آه وماله! وهقوله أنا بغير عليك.. إنت مش عارف تفكير البنات عامل

إزاي؟! وأكيد بعد الجواز جسمه هيبوظ، وهيلبس غصب عنه واسع أو

عبايات!"

- "آه إنتي بتتريقي بأه! ماله الدكتور اللي أبوكي جابه؟ أظن مايتعيش!"

- "الصبح في الجامعة.. الظهر في العيادة.. وبالليل في المستشفى! أتجوزه

وأتفرج عليه هو نايم بأه ولا إيه!!؟"

- "إنتي أصلاً مايعجبكيش العجب!!"

- "لا فيه اللي عجبني ومجاش ثاني.. عادي نصيب!!"



رن الموبايل.. (كارلا) صاحبتى بتتصل....

- "عرووستنا... لسه أحلى يوم ماجاشي وبتاع.. هم جايين إمتى؟"

- "أنا عارفة! على الساعة ثمانية باين!"

- "طب بقولك..."

- "قولي"

- "عارفة الـ Application بتاع الـ Facebook بتاع هذا هو شكل زوجي

المستقبلي؟"

- "ممم.."

- "أعمل إيه عشان يطلعلي (حسن الشافعي)؟"

- "تعملي إيه عشان يطلعلك (حسن الشافعي)؟!!"

- "آه كل مرة يطلعلي (وائل كافوري)!"

- "طب ما (وائل) حلو.. حد طایل!!"

- "أصله طلع لـ(جودي سمير).. ومش هيبقى إحنا الاتنين نفس الزوج

المستقبلي!"

- "بت إنتي هبله! هو أنا نقصاكي!؟"

- "يا (دن دن) بفكك.. قریت ال Status بتاعتك حسيته متضايقه"

- "آه مانتى فاهمه بأه الضغوط بأه بتاعت اليوم الجميل ده!"

- "ولا تحطي في دماغك.. خلي عندك ثقة في نفسك..

سرح بخياله، وقالك بحب شكل (Scarlett Johansson) بجسم

(Kim Kardashian) .. قوليله بحب شكل (خالد سليم) بجسم (Kim

Kardashian) برضه عادي!! قالك كان نفسي أتجوز دكتوره.. قوليله وأنا

كان نفسي أتجوز رائد فضاء!! كل ما يصعبها عليكي.. خليها مستحيله عليه!!"

- "والله إنتي عسل!"

- "اسكتي والله ده أنا مخنوقه"

- "ليه يا (كارلا)؟"

- "بصي أنا معجبة بواحد.. بس مش عايزة أخط الحوار في دماغي أوي عشان

كده كده هيبوظ!"

- "نصيحتي ليكي.. أولاً تفاءلي.. ثانياً ماتحطيش الحوار في دماغك أوي عشان

كده كده هيبوظ!!"

قعدنا نضحك، وبعدين (كارلا) قالت:

- "ماقولتليش بأه.."

- "إيه؟"

- "يطلعي (حسن الشافعي) إزاي؟"

- "يا بت يلا عشان مستعجلة!!"

- "مستعجلة أوي.. مستعجلة خالص!"

- "سلام بأة عشان (نادو) أختي على الواتينج.. وأكيد واقفة تحت! أبوس إيديكي سلام"



لبست بسرعة، وأنا عمالة بفكر.. هو أنا ليه مش مخيرة حتى في إني أختار أتجوز حب ولا صالونات؟! وهو أصلاً في حد مخير يختار صالونات! وهو عريس الصالونات ده إيه غير واحد شغال في الخليج، وراجع مصر في الصيف يعاين كام بنت فالإنجاز؟! أو واحد بعد ما عرف بنات، وعاش حياته معاهم صحى من النوم فجأة لقى نفسه عدى الثلاثين بكام سنة!! هم مش فاهمين إحساس البنت، وهي بتقابل واحد غريب، وبتتخيله وهو بيلمسها.. مش حاسين بخوفي فاللحظة دي؟! وفالمقابل في بنت تانية قاعدة على تراييزة قصادي.. نظرة عينين حبيبها ليها حزن.. لمسة إيده حلم!! كل همهم يخلصوا من التهمة اللي عندهم في البيت.. كأني المسدس اللي عليه البصمات!!

لقيت ماما بتخبط عليا..

"خدي الفلوس اللي إنتي عايزاها يا حبيبتي، وهاتي اللي نفسك فيه"

وقامت مدياني الموبايل، وقايلالي:

- "خالتك عايزاكي.. ردي"

- "ألو.. يا خالتو"

- "عرووستنا"

- "إيه ده يا خالتو.. حضرتك عرفتني؟"

- "لا ماعرفش ولا حاجة"

- "أومال إيه عرووستنا دي؟"

- "أصل أمك نبهت عليا ماقلش لحد إني عارفة إن جايلك عريس الساعة
ثمانية"

- "آه يا ما شاء الله على النباهة!"

- "إبقي عدي على (رنوش) يا حبيبتي في الشغل"

- "ليه؟"

- "عشان تاخدي الجزمة الكعب!"

- "طيب حاضر"

- "إياكي تنسي.. وإن شاء الله يطلع العريس ابن حلال"



ونزلت جري لأني كنت متأخرة على أختي.. وزمان جوزها بهدلها.. نزلت
لقيت (صباح) مرات البواب بتبتسملي وبتقولي:

- "عروستنا نهارك فل وليك شربات بإذن واحد أحد"

ولسة هتزرط..

قلتلها:

- "بس! بس! جبتي الكلام ده منين؟"

- "الحاجة قالتلي أطلع أساعدها في ترويق الشقة يا أبله العروسة"

- "وهو معنى إن إحنا هنضف يبقى فيه عريس!؟"

- "مانتوا كل مابتزوقوا الشقة الصبح.. بيجلكوا شاب بعلبة شكولاتة بالليل"

- "يا سلام على المفهومية"

- "شوفتي إزاي يا أبله العروسة!"

لقيت صوت كلاكسات بالهبل جاي من عربية جوز أختي (رامي).. كأن مصر خدت كاس أفريقيا.. شاورتلهم من بعيد إني جاية.. كان معاهم العيال قاعدين ورا في العربية.. (موني)، و(تيمو)، و(بيري).. (موني) تسع سنين لمض.. (تيمو) أربع سني لمض.. (بيري) تلت سنين لمضة.. دخلت العربية، وكأني داخلة أولى تالت.."

أنا: "معلش يا جماعة والله غصب عني!"

(ندا): - "يا بنتي إحنا بقالنا ساعة واقفين!"

أنا: "ساعة إيه؟" (طلعت الموبايل).. "شوفي إنتي رنيتي عليا أهو الساعة واحدة وعشرة.. ودلوقتي ونص أهو.. آه والله!"

(رامي): "ولا يهمك يا عرووستنا!"

أنا: "عروسة!"

(ندا): "وهو (رامي) غريب؟ أنا قتلته!"

(موني [ابن أختي]): " (دودو) إنتي هتبقي عروسة؟"

أنا: "آه ممكن يا (موني)"

(موني): "هو جوزك اسمه إيه؟"

أنا: "تصدق يا (موني) معرفش!"

(موني): "(دودو) هو أصلاً عرفك إزاي؟ يعني.. يعني.. عرف إزاي إنك عروسة؟"

(رامي): "بس يا (موني)! بطل كلام شوية!"

(موني) فضل ساكت شوية، ومش بيتكلم.. حسيت جواه أسئلة.. الأطفال في الفترة دي بيبقى عندهم أسئلة كتير.. زي الوجود؟ ربنا؟ بابا أنا جيت إزاي؟ (شريف مدكور)؟ أسئلة كتيرة زي كده.. قام مطلع دماغه بين الكرسيين اللي قدام بتاع باباه ومامته، وقال لباباه:

- "بابا ممكن أسألك سؤال؟"

- "اسأل يا حبيبي"

- "هو إنت وماما عرفتوا بعض إزاي؟"

- "يااه يا (موني)! صدفه رهيبة.. هيبج! الجواز ده فعلاً نصيب"

- "احكي لي يا بابا"

- "بص يا سيدي.. أنا كنت نازل من عند الدكتور بعدي الشارع.. هب سمعت صوت فرملة.. هب مامتك لقيتها بتخبطني بعريبتها.. هب قامت نازلة، وفي إيديها ساندوتش.. بتسألني (إنت كويس؟).. قتلها: (المهم الساندوتش جواله حاجة؟)"

- "بابا، ده فيلم (كده رضا) بتاع (حلمي)!"

- "يا حبيبي فيلم حلو أوي.. استنى أما أكملهولك!"

- "يا بابا بجد بأة قولي قابلت ماما إزاي؟"

- "يااه يا (موني)!... صدفة رهيبة.. هيبّيح! الجواز ده فعلاً نصيب"

- "احكي بأة يا بابا!"

- أنا قابلت مامتك في شرم الشيخ، وكان اسمي (خالد المصري)، وماكنش فيه حد في شرم مايعرفش (خالد المصري).. وباباها كان رافض جوازنا.. هربنا، وقعدنا نجري، وأغنية (حببي يا عاشق) كانت شغالة، وماتقوليش ده فيلم (شورت وفانله وكاب)!"

- "آه ده (شورت وفانله وكاب)... مش عايز تحكي بلاش!"

- "يااه يا (موني)!... صدفة رهيبة... هيبّيح! الجواز ده فعلاً نصيب!"

- "احكي يا بابا!"

- "مامتك كان معاها خريطة لكنز تحت البحر!"

- "إيه ده بجد!؟ كنز!"

- "دهب... وجاتلي هي وواحد اسمه (بيبرس) كانت محتاجة غطاس... جاتلي أعلمها الغطاس... وسافرنا الجزيرة اللي فيها الكنز، وحيبتها هناك، وأظن مكنش على أيامك فيلم (جزيرة الشيطان)!"

- "يووووه! خلاص يا بابا!"

- "خلاص يا زفت!... أنا كنت بدور على واحدة طويلة، وعمتك شافتها وهي عند دكتور السنان، واتفقتلي على معاد، ورحت شوفتها عند دكتور السنان برضه... وخلاصة القعدة إن إحنا الاتنين كان بينا كام حاجة مشتركة... بنحب (حمافي)، والبسلة، و(كريستيانو)! وخدنا بالأسباب دي واتجوزنا! ارتحت يا

ابن الرخمة!؟ اتفضل اقعد عدل بأة وماتتكلمش لحد ما نوصل! ومفيش فرجة على تليفزيونات.. أنا عرفت دلوقتي درجاتك الزفت دي بتجيبها ليه!"



وصلنا سيتي ستارز.. (رامي) قعد بالعيال في الكيدز زوون.. وبدأنا أنا و(ندى) رحلة الشوبنج، واللي بعنوان (مش بدور على حاجة معينة).. دخلنا محل كده...

أنا: "مفيش حاجة عدلة"

(ندا): "طب شوفي البنطلون ده كده"

أنا: "لا.. لا.. ده ضيق أوي"

(ندا): "هو إنتي مالك قافلة كده ليه!؟"

أنا: "هيكون ليه يعني!؟"

(ندا): "يا بنتي والله ما فارقة!"

أنا: "الواحد كان نفسه يعيش قصة حب كده.. مش جو بضاعة وجواري"

جه جنبنا ولد كده عمال يقلب في البنطلونات.

وشوشت (ندا): "شايقة الرومانسية؟ ماهموش إنه وسط بنات، وجاي

يجيب لحبيته هدية Valentine.. بقى بالذمة جوزك يعملك كده؟"

(ندا): "بقولك إيه يا (دينا) يا بتاعة قصص الحب إنتي؟"

أنا: "إيه؟"

(ندا): "[قيس] و(ليلى).. (ليلى) ماتت من المرض، و(قيس) مات من الزعل

عليها.. [(جاك) و(رووز)] بتوع (Titanic).. (جاك) اتجمد، و(رووز)

اتجوزت وخلفت.. [(روميو) و(جوليت)].. (روميو) مات مسموم،

و(جوليت) انتحرت.. واللاتنين في الآخر بقوا رسمة على الصالون الإبيسون

الي بتقابلي فيه العرسان!"

وبعدين قامت ماسكة بنطلون، وقالتلي:

- "طب إيه رأيك في ده؟"

أنا: "مش عاجبي"

(ندا): "الكلام ولا البنطلون؟!"

أنا: "مش هلبس أنا أحمر.. بقولك إيه إنتي مش ملاحظة إن الولاد كترت

حوالينا؟"

(ندا): "بقولك إيه لو حد قرب صوتي!"

أنا: "لا.. لا.. إحنا ننده على حد من اللي بيشتغلوا في المحل!"

(ندا): "طب شاوري للواقف هناك ده... بسرعة!"

البياع: "تحت أمرك يا فندم"

أنا: "هو انتوا إزاي تسيبوا الولاد يدخلوا قسم البنات كده؟! مش عارفين
ناخد راحتنا!"

البياع: "لا يا فندم.. إحنا ماعندناش أصلًا قسم حريمي!"



خرجنا من المحل كاتمين الضحكة بالعافية من الكسفة.. وأول ما خرجنا
ضحكنا ضحك كان هيغمى علينا! لاقينا محل مكتوب عليه أحلى كلمة
ممكن تسمعها أي بنت.. الكلمة اللي بتخلينا كلنا حيوية ونشاط.. الكلمة
اللي كلنا بنسناها.. (Sale).. الكلمة دي كافية لأي بنت إنها تدخل المحل
ده.. حتى ولو بيبيع مكن حلاقة رجالي!

(ندا): "بقولك إيه الحاجات اللي هناك دي عليها ٧٠%"

أنا: "أوبا! تعالي نشوفهم"

(ندا): - "بصي الكارديجان ده تحفة!"

أنا: "مممم.. بس على الله ألاقي مقاسي.. sale المقاسات كلها بتبقى
صغيرة!"

(ندا): "بقولك قصة الجواز دي في الأول والآخر نصيب وعلم غيب!"

أنا: "يا ستي هو أنا قلت حاجة؟! بس أنا كنت عايزة نصيبي حاجة تفرح قلبي كده! الرجل لو ممكنش حنين الحياة هتبقى صعبة أوي، وإنتي فاهمة"
(ندا): "يا بنتي أنا مخلقة ثلاثة، وحامل، ومش متجوزة (رامي) عن حب... عارفة أهم حاجة في الرجل إيه؟"
أنا: "إيه؟"

(ندا): "أهم حاجة في الرجل إنه يكون راجل!"
أنا: "مش لاقية!"

(ندا): "المقاس ولا الرجل؟"

أنا: "لما بشوف (سارة سمير) مع خطيبها وإزاي منسجمين! ولما يرخموا على بعض، ويموتوني من الضحك بحسهم مش مجرد couples بحسهم دويتو! بقول ليه أتجوز واحد وخلص، وما نتألقش كده زيههم!"
(ندا): - "والله يا بنتي بعد الجواز الأمور بتهدى"

أنا: "مم.. وإيه اللي هيهديها يعني؟!"

(ندا): "هفهمك.. علمياً فيه هرمون اسمه الدوبامين!"

أنا: "وده ماله ده يا أبله الحكيمة؟"

(ندا): - "الدوبامين ده هرمون السعادة.. الهرمون ده مثلاً بيوفرز عند الأطفال بشكل كبير، ويبقى كل ما الواحد كبر.. عشان كده تلاقي الاطفال بيضحكوا على أي حاجة..."

أنا: "طب ده إيه علاقته بأمي؟"

(ندا): "هرمون الدوبامين ده بيفرز بشكل رهيب في بداية أي علاقة إعجاب بشخص.. بتبقى فرحتك زي فرحة الطفل بلعبة جديدة.. لكن مع التعود على الشخص ده الدوبامين إفرازه بيقل.. زي تأثير المخدرات كده.. بعد فترة ما بتأثرش زي الأول.. فيقل انبهارك.. سعادتك.. وتبدأ تبان العيوب.. العيوب دي موجودة أصلاً.. لكن إنتي بيتهيا لك إنها ظهرت فجأة.. حتى تلاقي المعظم يقولك كان بيمثل في الأول.. هو ولا مثل ولا حاجة.. إنتي اللي كنتي عامية! السؤال بأة الدوبامين بيقل خالص بعد أد إيه.. بيقل بعد أول أسبوع تعارف؟ ولا بعد سنة مثلاً؟ ولا بعد مائتلسي وتنجوزي!؟"

أنا: "أنا مالي ومال هرمون الدوبامين!؟ أنا عايزة هرمون الدوبامين.. الشوكولاتات وبوكيه الورد.."

(ندا): "تقريباً كده.. مش هتلاقي"

أنا: "إنتي قصدك المقاس ولا العريس؟"



خرجنا أنا و(ندا) عندنا حالة يأس من ال X-small! (ندا) قالتلي: "هروح أطمئن على (رامي) والعيال".. طبعاً زمانه (موني) ابنها زانق جوزها بأسئلته! قلت أروح أقعد في أي Cafe أشرب نسكافيه بدل النسكافيه الميكس شوكولاتة بتاع طنط (جيبي)!

في الـCafe.. كله لابس لبس أحمر.. كله ماسك نفس الدبدوب الأحمر.. كله
بيسبل نفس التسبيلة.. كله عليه نفس الجليتر.. قلبي اتقبض من المنظر
الرومانسي ده اللهم اجعله خير! ثم إني ماعرفش إزاي كائن المترهل بكرش
وعينه بتصغرلك -بيبرق يعني- نفس تريقة أبوك وأمك ليك وانتوا عندكوا
ضيوف، وعازب تشوف إيه اللي ضيوف جايينه.. حيوان الدبدوب ده إزاي
يبقى رمز الفلانين.. ده رمز الهالوين!

قرب مني الـwaiter، وقال:

- "مساء الخير يا فندم .. أنا (كريم).. حضرتك تحبي تقعدي.. Smoking
area ولا non smoking?"

قلتله:

- "لا non smoking طبعاً"

وعيني بتبص على الترايبيزات.. ماهو هما إني هقعد لوحدي عايضة أقعد في
ترايبيزة حلوة جنب اتنين بيحبوا في بعض، وأرمي ودني معاهم أسمع شوية
كلام حب من بتاع (محمد إبراهيم).. كان لسة الـwaiter ماشي قدامي،
وبيشاوري أقعد على ترايبيزة.. ببص جنبي لقيت اتنين بيتخانقوا..

- "(سالي) حبييتي أنا آسف!"

- "....."

- "(سالي) حبييتي معلش ماعرفش إنك هتضايقني!"

- "طيب أنا مش قادرة أتكلم دلوقتي يا (عمر).. نتكلم بعدين لو سمحت!"

- "والله ما أعرف إن الموضوع هيزعلك!"

- "يا (عمر) قلت بعدين، عشان بجد مصدومة فيك"

- "معقول يا حبيبتى نزل من بعض يوم زي ده!"

- "(عمر) أنا عايزة أروح لو سمحت.. وميرسي أوي إنك نكدت عليا في يوم زي ده"

لا.. لا.. مش طالباكوا خالص.. أقعد وسط الخناقة دي ليه.. أنا عايزة حاجة رومانسي.. حاجة كمانجات كده.. لقيت اتنين قاعدين مندمجين أوي..
شاورت للwaiter، وقلت:

- "أنا هقعد هناك"

قالى: "بس دي حضرتك دي smoking area"

قلتلها، وأنا باصة على الـcouple اللي يجننوا دول:

- "قررت أبداً أشرب سجائر يا (كريم) من ساعة ما غليت"

قعدت هناك على الترابيزة اللي جنبهم.. ورميت ودني في الطفاية اللي في نص
ترابيزتهم بالظبط.. يلا سمعوني حاجة حلوة..

- "حبيبتى الهدية عجبتك؟"

- "تحفة يا عمري.."

(ياخد نفس عميق من السيجارة.. ويخرجه بشويش وهو بيتكلم)

- "حبيبتى أنا فيه حاجة مهمة لازم أقولها لك!"

- "قول يا حبيبي!"

- "أنا مش...."

[يدخل (كريم) مقاطعهم]

- "تشربوا إيه يا فندم؟"

- "اتنين ليمون.. اتنين ليمون!"

- "حبيبي إنت مادتنيش فرصه أختار العص..."

- "أنا من الآخر كده مش هعمل فرح.. أنا آخري زفة عربيات! لكن فرح بقى.. ونقعد نسقف على أسماء الله الحسنى أستغفر الله العظيم... أنا مش هد..."

- "ونرقص يا بيبى على (سامي يوسف)"

- "ماتقطعيش كلامي لو سمحتي.. أنا مش هدفح ٢٠٠ جنيه في الكرسي لـ(مروة) بنت خالتك الزفتة اللي بتكرهني، اللي كل ماجي أمد إيدي أسلم عليها تقولي مابسلمش على ولاد، وهي أصلاً بتسلم! ولا طنط (زوزو) عمتهك اللي مش عارفة اسمي إيه! وكله كوم وساعة البوفيه كوم.. لما بيتحولوا لآكلي لحوم الرومي!"

- "لا ده إنت بخيل بأه!"

- "لو قاطعتيني مرة تانية مش هقولك هعمل إيه!!"

- "إيه هترميلى الدبلة!؟"

- "أو هلغي عصير الليمون! أنا مش هعمل فرح، ونتصور عند أي ابن لذين photography، وأدفعله أد كده عشان يصورنا في أوضاع مخلة، ويحطها على الـ page عنده، ويأخذ لايكات على قفايا! ومش عايز أشوف وشك بـ make up عبارة عن علبة foundation على شكل عروسة!"

- "وده بأة كلامك، ولا كلام مامتك!؟"

- "ليه ترمي بوكيه ورد ب ١٠٠٠ جنية من ورا ضهرك؟ وترميه لمين؟ لـ(مروة) بنت خالتك الزفتة!؟ اللي بتقولي مابسلمش على ولاد وهي أصلاً بتسلم!؟ قال يعني مش متفقين مع بعض ومتفاجئين.. احلفي كده إنكو مش متفقين.. احلفي!"

- "مالها (مروة)؟ تعباك في إيه!؟"

- "مانا بنات خالتي مايبقوش بيـ download طقم الإشارات على دماغهم قبل الفرحة بتلت أربع تيام.. وتيجي بنت خالتك (مروة) الزفتة -اللي بتقولي مابسلمش على ولاد وهي أصلاً بتسلم- بحتت كتف ولا قميص نوم سواريه يتقلب الفرحة عشانها.."

قلت لنفسى: (لا.. لا.. إيه وجع الدماغ ده؟).. أنا إيه اللي هيخليني أسمع في خناقهم... شكل كده فيه حد حسدهم ماعرفش مين! خدت ودني من الطفاية اللي عندهم وقمت! وأنا ماشية كان اللي اتنين اللي بيتخانقوا في الأول [(عمر) و(سالي)] لسة شغالين في الخناقة وماخلصوش....

- "والله العظيم عملتلها لايك من غير قصد!!"

- "مممكن أعرف أحلى مني في إيه دي يا (عمر)!!"

- "(سالي) حبييتي.. إنتي عارفة صوابعي تخينة وعملت لايك لوحدها!!"

- "أيوة (شيري عادل) دي أحلى مني فيه إيه نفسي أفهم عشان تعملها لايك على صورتها!!"



(ندا) جت.. دخلنا أنا وهي محل عجبني فيه شيميز لونه Pink بس مكنش فيه مقاسي.. واضح إن الـ medium شاح في السوق.. البنت الي بتشتغل قالت هتشوفلنا في الـ store مقاسي بس لون تاني.. قالت فيه منه الـ tiffany والـ maroon.. قلت لها تجيبهم.. مش عشان بحب الألوان دي .. بس عشان أعرف إيه الـ maroon والـ tiffany دول!! وكملنا أنا و(ندا) كلامنا.

- "فبقولك قصة الجواز دي في الأول والآخر نصيب وعلم غيب"

- "أنا نفسي في proposal كده أتفاجئ بيه.. نروح أنا وهو نتفرج على ماتش في استاد القاهرة.. وألاقي بيتذاع على الشاشة بتاعة الاستاد صورتنا، وهو نازل على ركبته، وبيقولي ويترجاني: "تتجوزيني؟".. وصوت الجمهور يعلى، وعمالين يقولوا: "دينا! دينا! دينا!".. وأقوم قايلة: "موافقة!" ألاقي

شماريخ وفرحة عارمة تهز أرجاء المكان!! ولا يعزمني على مطعم شيك كده، وألاقيه داخل عليا بـ(سامو زين) بالجيتار، وبيغني (قري لي)، وبعد ما يخلص يقولي: "تجوزيني؟".. أبتسم، وعيني مليها الدموع.. وأقوله.. أقوله "لأ طبعاً".. حد يطلب إيد واحدة وجنبه (سامو زين)؟! إيه الغباء ده؟! ده هيبقى حنت فيديو يجيب لايكات وviews بالهبل!"

و(ندا) بتضحك قالت: "ماهي دي المشكلة!"

- "الي هي إيه؟"

- "الفيسبوك!"

- "ماله؟ ما هو جميل خالص أهوه وأزرق"

- "لا.. لا.. متيالك"

- "إيه مش أزرق؟!"

- "يا بنتي الفيسبوك حول الارتباط لعلاقة استعراضية check in مش عارفة فين.. صورة سيلفي سوا وهم بيعملوا إيه.. قال يعني فرحانين والعشق سيطر على حياتهم.. والخروج بتبقى زي الزفت!! بس المهم الصورة تاخد لايكات! وبالمرة توصل بيها رسالة لصاحبتها المتغظة منها عشان تثبتلها أد إيه هي مبسوفة مع (أحمد).. وتبعت رسالة ثانية لصاحبة (أحمد) القديمة أد إيه (أحمد) متهني!"

- "يا سلام! يعني كل الناس الي مغيرة البروفایل بيكتشر ناس بتغيظ في بعض؟!"

- "لا طبعاً مش الكل، بس المعظم.. النوايا بنسب مختلفة فيها show! وإلا ليه هيقولها (حبك) على الملأ وهي متلقة قصاده؟ وليه تعمله تاج في

صورة شوكلاتة؟ ماتشتريها ليه! فيه فرق بين واحد جاب لحبييته BMW وواحد جاب لحبييته BMW وصورها ونزلها على الإنستجرام! إحنا لو واحد عزم واحدة على هاي ميل هيعملها تاج، وهي تقوله ربنا مايحرمني منك يا عمري! اللي هو تحرش بالحب وخلص.. عشان الناس.. لكن الفعل مش حب pure"

- "يا سيتي ما جايز بيعبروا بينهم وبين بعض.. وكمان بينهم وبين بعض وبين الناس"

- "يا بنتي من النحية الثانية الفيسبوك خلى علاقتها بيه يبقى فيها جمود!!"
- "إزاي؟"

- "تخيلي إنها ممكن تحس إحساس حلو من حد غيره!"

- "لا دي تبقى قليلة الأدب"

- "وما تبقاش قليلة الأدب!"

- "إزاي بأة إن شاء الله!!؟"

- "كتبت status ولا غيرت صورتها خدت لايك من قريبها اللي كان راسم عليها.. على زميلها.. على صاحبها اللي كانت نفسها تاخدها لأخوها في ظل إن أخت جوزها بتتريق عليها، وعلى أفكارها، ودائماً بتنتقدها!! اتكون عندها شخصية جديدة بمعنيين بتستنى ردود أفعالهم سواء في شكلها في صورة، أو في دماغها وأفكارها في رأي في status! بقى ليها جمهور.. بقت نجمة.. كل ده وجوزها وهو ولا هنا.. شايف مراته عادية لأنه بقى من جماهير واحدة تانية متابع صورها! النجمة اللي آراءها بتعجب الناس دي، في أول نقاش مع

جوزها هتبقى واثقة إنها صح، هتتمسك برأيها بشدة مفيش تنازل.. هو
كمان نجم شباك لزميلته في الشغل هتتمسك برأيه.. النتيجة.. جمووووود!!"

- "أو النتيجة علاقة (عمرو أديب) بـ(لميس الحديدى)!"

دخلت البنت معاها الشيميز الـmaroon والشيميز الـtiffany.

- "معلش يا فندم أنا ملقيتش من الـmaroon غير Large"

- "لأ Large هيبقى واسع"

- "ما هو حضرتك هيكش مع الغسيل، وهيظبط عليكي"

- "طب والتاني لقيتي منه medium؟"

- "للأسف يا فندم ملقيتش من الـtiffany غير الـsmall"

- "لا ده هيبقى ضيق أوي"

- "ما هو حضرتك هيوسع مع اللبس وهيظبط عليكي!"

- "ما شاء الله الشميزات عندك بتفهم اللي لابستها!!"



قررنا أنا و(ندا) ندخل محل مش Brand عشان واضح إننا مش وش برندات.. وبرضه عشان نفاصل براحتنا بأة.

- "نسيت أسألك صحيح.. (موني) عامل إيه مع (رامي)؟"

- "مغلبه.. ده أنا دخلت عليهم وهو بيسأل أبوه (ليه أنا بتزحلق من فوق لتحت).. وكان شبطان إنه يتزحلق من تحت لفوق!!"

- "ما شاء الله! ده كان عايز يعكس قانون الجاذبية.. لأ.. الله يكون في عون (رامي) الحقيقة!"

- "فبقولك قصة الجواز دي في الأول والآخر نصيب وعلم غيب!"

- "بس قصة إن الواحد يحكم على شخصية حد في ساعة واحدة دي صعبة أوي.. دي عايزة فراسة.. والواحد يكون دارس علم أبراج وفلك وكواكب عند كاهن صيني من اللي بيعدي وسط النار ولا يتبلش ده"

- "يا بنتي هو فيه أسهل من الأبراج؟ إنك تعرفي صفات اتناشر برج.. بيحب إيه وببيكره إيه وأيامه المفضلة.. ألوانه المفضلة.. أكلاته المفضلة.."

- "للاتنااااشر!!"

- "أرقام الحظ.. نوع البرج.. الأحجار الكريمة المناسبة.."

- "نعم يا اختي؟! أحجار كريمة!! طب مش عايزاني أعرف نوع الشاي المفضل؟ طعم الشيبسي؟ بيحب يلعب PES ولا فيفا!"

- "يا جاهلة علم الأبراج ده مهم جدًّا!"

- "مهم إيه بس؟ بصي.. أنا شايفة إن إحنا مش محتاجين يبقى عندنا اتناشر برج!! كفايا أوي برجين واحد للولاد وواحد للبنات! برج الولاد ده مثلاً

نسميه (برج فاكر نفسه).. فاكر نفسه فاهم في كل حاجة.. قدام الماتشات
فاكر نفسه (مورينيو).. في العلاقات العاطفية فاكر نفسه (أسامة منير).. في
السياسة فاكر نفسه (مصطفى الفقى).. في الدين فاكر نفسه من الصحابة،
وبيتكلم بثقة أوي وهو بيفتى!! فاكر نفسه دمه خفيف!! فاكر نفسه لو راح
في أي حنة في العالم يقولك التوانسة بيموتوا فيه أول ما يسمعه بيتكلم
مصري! من مشاهير البرج (رامي صبري) عشان فاكر نفسه (عمرو دياب)!"

- "طب والبنات؟"

- "البنات بأة فالبرج بتاعهم هيبقى اسمه برج (آه هو كده، وأنا حرة بأة يا
أحمت) نظراً لأن مفيش بنت في مصر ماقلتش الجملة دي، ومن مواصفات
برج (آه هو كده، وأنا حرة بأ يا أحمت) إن كل مواصفاتها قبلها نكدية..
نكدية في الحياة.. نكدية في الفيسبوك.. نكدية في مشيتها.. نكدية في
فرحتها.. بتحب تلعب نكدي كراش! شكاقة.. شكاقة في الحياة.. شكاقة في
الفيسبوك.. شكاقة في مشيتها.. شكاقة في فرحتها.. وبترقص على (شيك شك
شوك)!! من مشاهير البرج جارتها اللي في التالت عشان جوزها جابلها
عربية.. وده طبعاً بعد ما قالها: (هاتعملي بيها إيه؟) قالتله: (هو كده، وأنا
حرة بأة يا أحمت).. أو ممكن حتى ندمج البرجين في برج واحد، ونسميه
(برج المراقبة) نظراً لأن كلنا مركزين مع بعض، وكلنا بتراقب تحركات بعض..
على الفيسبوك كومنتاتنا.. لايكاتنا.. أو في الشارع.. الناس اللي بتراقبك في
العربيات اللي جنبك على ما الإشارة تفتح.. أو نظرة البواب للكيس اللي
إنتي شايله، وإنتي طالعة بيتكو.. كلنا بتراقب تحركات بعض.. من مشاهير
البرج المراقبة أمن الدولة ومرات البواب!"

- "إيه يا (دينا) الجنان اللي بتقوليه ده؟!"

- "عارفة يا (ندا) أنا نفسي بجد في إيه؟"

- "آه.. تتجوزي حب.. عارفينها دي"

- "لأ.. إيه الهيافة دي؟"

- "أومال؟"

- "نفسى أدخل بروفة بأة.. إحنا بقالنا ساعتين يا مؤمنة بنلف ماوصلناش
لمرحلة البروفا!"



لقيت كده شيميز عجبنى مكتوب عليه ٣٠٠ جنيه.. قلت لـ(ندا): "تعالى
نشوف آخره كام"

أنا: "على فكرة إحنا زباين المحل.. آخره كام؟"

الراجل: "٢٥٠ يا فندم عشان انتو بس زباين المحل"

(ندا): "لأ هم ٢٠٠ بس.. إحنا أول مرة نيجي، واكسب زبون!"

الراجل: "لأ مش هينفع ٢٠٠ خالص"

طلعت ٢٠٠ جنيه واديتهم للراجل.

الراجل: "ليه كده يا فندم؟"

أنا: "هو كده وأنا حرة بأة يا أحمتم!"



ركبت العربية.. كنت مرهقة جداً.. وكنا في طريقنا للكوافير.. عيني غفلت من التعب شوية.. صحيت كانت العيال نائمة برضه.. و(رامي) و(ندا) كانوا فاكريني لسه نائمة، وكانوا بيتكلموا..

(رامي): "إنتي عارفة الكوافير الحريمي ده بالنسبالي عامل زي الصندوق الأسود كده.. أسمع عنه لكن ماعرفش فيه إيه!! إنتي عارفة أيام المراهقة من أسعد لحظات حياتي اللحظة اللي بتصادف إني أبقى معدي وواحدة داخله الكوافير.. أووبا! على بشوفه أول ما الباب يتوارب.. بلمح اللي لابسة cut واللي عاملة شعرها أصفر، واللي ماسكة سيجارة.. كنت بحس إني دخلت شقة دعارة!"

(ندا): "اتلم يا (رامي).. (دينا) تسمعك.. تقول إيه! جوز أختها المحترم قضى مراهقته قدام باب الكوافير!!!"

(رامي)، وهو بيضحك: "مناسبة المراهقة... فكرتيني لما كنت بسهر على فيلم فيديو ولا حاجة.. كان أبويا دائماً بيقوم يشرب بالظبط على اللقطة اللي فيها البوسة.. ويبقى أقسم بالله فيلم حربي، وناس محروقة، وطول الفيلم مفيش حتى واحدة عدت مشمرة كامها.. ويقوم أبويا باصلي من فوق لتحت،

ويقولي: (اقفل الزيت ده واتخمد!) فبقيت بأة أول ما تيجي البوسة أعرف إن بابا هيقوم يشرب.. أجري بإزاة المياة عليه قبل ما يطلع من أوضته!"

(ندا)، بتضحك: "وكان فعلاً مش بيقوم تاني؟"

(رامي) محبطاً: "لأ كان بيقوم يدخل الحمام ساعة الرقصة"

(ندا)، بترخم عليه: "ما هو ده آخرك يا روميو رقصة"

(رامي): "اسكتي.. إنتي ماتعرفيش أنا قبل الجواز كنت مقطع السمكة وديلها"

(ندا)، بنبرة (جتك نيلة): "لأ أنا شوفتك بعد الجواز.. ما بتعرفش تقشر سمك يا روحي"

(رامي): "اللل.. لل.. لللل.. لا.. وبالنسبة لطابور العيال اللي عندنا ده.. ده أنا بفكر أجيبلك هدية الفلانيتين جهاز سونار!"

(ندا) قامت غامزة: "صحيح يا بيبي فين هدية الفلانيتين؟"

(رامي)، بنبرة (حلاوتك يا فايضة): "بالليل يا نونة"

لقيت لازم أتدخل.. خفت يحصل بعد كده اشتباكات بالأيدي!! قمت قارصة (تيمو) و(موني) عشان يصحوا، ويعيطوا ليهم.

وصلنا عند الكوافير.. قتلتهم مش هتأخر.. اعتذرت لـ(رامي) إني ضيعته النهار كله، واحتمال من التعب اللي تعبته النهاردة أكون ضيعته الليل كمان.



دخلت عند الكوافيرة.. كانت زحمة شوية.. بس معظم الزباين عارفاهم من قبل كده! مدام (إيمي) حوالي ٣٨ سنة.. منفصلة عن جوزها، بس إيه ست مزة ودلع أوي تحسها (غادة عبد الرازق) كده.. مدام (صفاء) حوالي ٥٠ سنة، متجوزة، ومش طايقة نفسها على طول.. (سلمى) ٢٩ سنة، حامل، وأكيد متجوزة.. (نور) ٢١ سنة، مخطوبة، وأكيد مش حامل غالباً يعني.. وأخيراً (فيروز) الكوافيرة اللي ضاربة القصة أوكسيجين، وعلى طول وهي بتتكلم عاملة إيديها على شكل واحدة بتنشف المونوكير.

دخلت قعدت.. وكانت مدام (سلمى) الحامل هي اللي قاعدة بتقص شعرها.

(سلمى) الحامل: " (فيروز)، أنا عايزة حاجة تمنع تساقط الشعر "

(فيروز): "يا مدام (سالمة) هو الحمل كده"

(نور) المخطوبة: "أنا كمان شعري بيقع جامد كل ما أغسله"

(فيروز): "تلاقيكي بس متوترة عشان الفرح قرب يا آنسة (نور).. هي الخطوبة كده!"

طنط (صفاء): "طب ما أنا متجوزة بقالي ١٥ سنة، وبرضه شعري بيقع كل ما أسرحه"

(فيروز): "لا يا مدام (صفاء) كتمة الايشارب بتعمل كده.. الشعر لازم يتنفس"

(إيمي) المطلقة: "طيب أنا مش محببة، وبرضه شعري بيقع عادي!"

(فيروز): "لا يا مدام (إيمي) تعرضه للشمس كتير بيعمل كده"

أنا: "أنا مش متجوزة، ولا مخطوبة، ولا مطلقة، ولا مرتبطة، ولا حتى بسلم على ولاد، وشعري بيقع جامد!"

(فيروز): "ما هو عشان مش متجوزة، ولا مخطوبة، ولا مطلقة، ولا بتسلمي على ولاد شعرك لازم بيقع جامد"

(فيروز) كانت بتقنع الكل، والكل بيقتنع عادي! (فيروز) كانت عارفة إن كل واحدة فينا عندها هاجس مستخبي وراه وسواس بيسوسلنا إن هو ده سبب المشكلة.. (فيروز) كانت بتواجهنا بالوسواس ده.. فكنا بنقنع بالسبب بسهولة.. (فيروز) كانت فاهمانا كويس أوي.. عارفة إن كلنا واحد.. وتقريباً الفرق بينا شعرة.

طنط (صفاء): "وهتعملي إيه يا (نور) بفلوس نقوطك إن شاء الله؟"

(نور) المخطوبة: "مش لما تبقى تيجي يا طنط"

(سلمى) الحامل: "لا خدي بالك.. إياكي تجيبي سيرتهم لجوزك"

(إيمي) المطلقة: "دخلهم دورة رأس مال الست المتجوزة"

كلهم سكتوا وبصوا لـ(إيمي) عشان يعرفوا إيه دورة رأس مال الست المتجوزة دي.. وبدأت (إيمي) في شرحها.

أول سنة جواز هتكون العروسة قاعدة زهقانة، هيجيلها الرسالة بتاعة (عايزة تشتغلي، وإنتي في البيت، وكمان تكسبي ٤٥٠٠ جنيه في الشهر؟ ادخلي على اللينك ده وأنا وإنتي هنكبر مع بعض).. طبعاً هتفشل عشان ده هبل.. مكنش حد غلب يعني! ثاني سنة جواز هتعمل page اسمها (copy original بربع التمن)، وهتحلف إن كل الحاجة الي عندها أورجينال، وجايبها من أمريكا بحركة معينة هي الي بتعرف تعملها بس، وهتبيع لولاد خالتها بس! ثالث سنة جواز هتكون خلقت.. هتفتح حضانة وتجب لعب (عمر) ابنها الي جدو جيبهاله وتفرش بيها الحضانة.. وهيجيلها ولاد أختها، و(جودي) بنت جارتها (رانيا).. بس (جودي) هتمشي من أول أسبوع عشان (رانيا) مامتها هتفتح حضانة عشان بيقلوا بتكسب دهب! رابع سنة جواز هتشارك حد من صاحباتها، وهتفتح محل اكسسوارات، أو ميك أب، أو هدايا، أو عبايات، أو التلاتة مع بعض، وتسمية آخر العنقود، أو ست الحسن، أو مستورة، أو بنت الحنة الي أنا حبتها! خامس سنة جواز هتتخن، هتفتح gym حريمي عبارة عن أوضة مفروشة موكيت، وتريد ميل واحدة.. جوزها كان جايبهاها في عيد الأم عشان تخس.. وهتجب فيه مدربة تخينة في تامن سنة جواز! سادس سنة جواز هتفتح مطعم هتعمل منيو فيه يجي ثلاثين ساندوتش كلهم عبارة عن تشيكن كرسبي فرجلو! سابع سنة جواز هتبدأ تبقى خبرة.. هتعمل جمعيات كتير، وتقبضها الأول! تامن سنة جواز هتشتغل مدربة gym عند واحدة لسة في خامس سنة جواز! تاسع سنة جواز.. غالباً جوزها مش هيطيقيها وهتتطلق.. وتقعّد في

عند كوافيرة تحكي لشوية ستات دورة رأس مال الست المتجوزة، وهم مش هيتعلموا الدرس وينفذوها عادي!"

كنا هنموت من الضحك، وبالذات لما عرفنا إن (سلمى) الحامل بتفكر تفتح حضانة بعد ما مشروع اللبس الكويي أورجينا بتاعها فشل!

طنط (صفاء): "إلا يا (سلمى).. مفيش حاجة في السكة؟"

(سلمى) الحامل: "بالنسبة لبطني اللي أد كده يا طنط؟"

طنط (صفاء): "يعني مفيش حاجة في السكة؟"

(سلمى) الحامل، وهي ماسكة بطنها: "والله ما مخدة، أنا كبرت على اللعبة دي"

طنط (صفاء): "يعني مفيش حاجة في السكة؟"

(سلمى) الحامل: "والله حامل.. ده أنا حملت مخصوص عشان السؤال الشهري بتاعك ده يا طنط (صفاء)"

قامت طنط (صفاء) باصة لـ(نور) المخطوبة: "مفيش حاجة جاية في السكة؟"

(نور) المخطوبة: "أنا اتخطبت بس يا طنط.. بس لو فيه حاجة جاية تانية في السكة هقولك طبعًا.. أنا ما بحبش أتחסد إلا عندك"

قامت طنط (صفاء) بصالي: "مفيش حاجة جاية في السكة؟"

أنا: "فيه واحدة ستافت كراست جاية في السكة!"

(إيمي) المطلقة: "قبل ما تسأليني.. اللي كان جاي في السكة.. خد سكة"

عمري ما فهمت ليه طنط (صفاء) مهمة بتفاصيل حياتنا.. تطور علاقاتنا.. هيفرق معاها إيه! ده أسلوب ضغط زي أمريكا كده لما تقولك إحنا بنراقب الموقف! إيه ده دقيقة واحدة.. هو أنا لما أكبر وأخد لقب طنط هبقى زيها؟ هههم ميين إتجوز.. ميين خلف.. ميين غيرت لون المونيكير! لأ دقيقة واحدة تانية بأة مانا برکز في ميين عمل لايك لميين.. وإيه ده هم رجعوا لبعض.. إيه ده هم سافروا.. إيه ده بيلعبوا اسكواش.. إيه ده سمت بنتها جلاش.. إيه ده أنا في مرحلة يرقة الطنط!

(فيروز) كانت لسة بتشتغل في (سلمى).. بصتلي، وسألتنی:

- "هتعملي إيه (دینا)؟"

أنا: "حواجب وكده"

(فيروز): "حواجب مع (رشا)، وأنا هحطلك ماكياج خفيف كده بعد حمام البخار"

طنط (صفاء): "لا يا شيخة بلاش مياصة.. ولا إنتي بتحبني تتعاكسي يا (دینا)؟"

أنا: "لا والله يا طنط ده لو فيه ميزة في الارتباط هو إن يبقى مع الواحدة راجل وماتتعاكش"

(نور) المخطوبة، وهي بتضحك: "ساعتها هو اللي هيتحرش بيكي.. صحيح تحرشه رومانسي.. بس تحرش.. موضوع بتاع التحرش ده البنت بتخلص منه بعد الجواز"

(سلمى) الحامل: "ولا بعد الجواز حتى.. ده الواحدة بتملی، وتدور أكثر، وتحلو، والنظرات الحيوانية تزيد!"

(إيمي) المطلقة: "أنا يا ريت بأة بيتحرشوا بيا بس.. دول بيعاملوني معاملة (هييفا) في (حلاوة روح)"

بضرب بعيني على أجسامهم.. من أول رشاقة (نور) المخطوبة، لحد مدام (سلمى) الحامل.. وكأني بشوف بالتصوير البطيء مراحل تطور جسم البنت من (سارة سلامة)، لـ(عماد الدين أديب).. ياه! ده الجواز والخلفة بيعملوا فينا كتير.

قعدت مع (رشا) عملي حواجبي.. بعد توصيات ليها من السيد رئيس الوزرا بنفسه إنها ماترفعهمش أوي! عشان أكثر حاجة بتعصبي في العالم إني أبقى عاملة حواجبي، وشكلي عاملة حواجبي!

أنا: "إيه ده يا (رشا) إنتي اتجوزتي؟"

(رشا): "آه يا طنط"

أنا: "ليه إنتي عندك كام سنة؟"

(رشا): "١٦ سنة"

أنا: "لا يا (رشا).. أنا بصراحة ضد الزواج المبكر"

(رشا): "بس إحنا ماتجوزناش الفجر!!"

أنا: "مممم.."

(نور) كل شوية خطيبها يتصل يسأل عليها.. شكله بيحبها أوي..

أنا: "(نور) هو إنتي اتخطبتني عن حب ولا معارف وكده؟"

(نور) المخطوبة: "لأ عادي"

أنا: "عادي إزاي يعني؟ ده نوع جديد من الجواز؟"

(نور): "أنا قصدي عادي مش فارقة.. ده زي ده المهم يكون فيه توافق"
فهمت إنه حب، و(نور) خايفة تتحسد، أو يمكن صالونات ومكسوفة تقول،
قلتلهما عشان أوضح:

- "إنتي عارفة نسبة الطلاق زادت، وبقت أكثر من عدد مشاهدات (بشرة
خير) على اليوتيوب!"

(إيمي) المطلقة: "على فكرة الطلاق ده نعمة.. آه والله.. ده فيه ناس
متجوزين، وكأنهم مطلقين.. الطلاق ده نعمة من عند ربنا للأزواج اللي ماتوا
.. الطلاق بيبحيهم"

(نور) المخطوبة: "أنا كنت قريت مقولة عجبتني أوي لـ(عمر طاهر) بتقول
الجواز مش إنك تلاقي الشخص المناسب، المهم إنك تكون الشخص المناسب"
(سلمى) الحامل: "بصي مش كفاية إنك تكوني الشخص المناسب، أو إنك
حتى تلاقي الشخص المناسب.. المهم التوقيت.. إنك تلاقيه في الوقت
المناسب! معظم حب اليومين دول بيبقى الشخص غير المناسب في الوقت
المناسب.. بمعنى إن الحب غالباً بيبقى مع شخص لينا علاقة بيه.. بيجي
وقت بنكون محتاجين إحساس.. صحة.. ونس.. ضحكة.. محتاجين (أسامة
منير) نفضفضله.. أو حتى انت قاطع وزهقانين.. ولأن الشخص ده موجود
طول الوقت جنبنا.. فبيكون ليه فرصة كبيرة إنه يجي في الوقت المناسب..
بيكون طوق النجاة من الغرق في الوحدة فبنتعلق بيه.. فبنحبه.. بعيداً عن
إنه مناسب من عدمه.. لحظة الغرق إنتي بتتعلقين بقشاية، مش بتركزي في
جمال أم القشاية!"

أنا: "طب وجواز الصالونات؟"

(سلمى) الحامل: "العكس في الصالون.. ممكن أوي يكون شخص مناسب.. لكن غالباً بييجي في وقت ضغوط.. أو وقت متعلقين بحد ثاني راح.. أو حتى متضايقين لسبب عبيط زي انت قاطع برضه.. مش في المود.. فمش بتركز في الشخص ده.. فبتكون روحنا مش مهيئة لأي تعارف مناسب أو حتى مش مناسب"

(إيمي) المطلقة: "البنت لازم يكون عندها ليستة أمنيات.. ممكن يبقى في مقدمتها الجواز.. لكن ماتفضلش تدور عليه بس! كإنها نزلت كارفور تشتري حاجات كتير، وأول طلب في الليسته كان تفاح مثلاً، وتضيع اليوم وعمرها وهي بتدور عليه! حققي أمنياتك في بقيت الليسته مش بالأولوية! غلطة كبيرة لو ضيعتي عمرك في تحقيق أول طلب.. وغلطة أكبر لو كان هو ده الطلب الوحيد في الليسته"

طنط (صفاء): "الرجالة دول كلهم مايستهلوش.. تفضلي تدعليه، وتهنئنيه، وتأكله زي الخروف.. وأول ما يستقوى ينطحك"

ضحكنا كلنا.. وعملت حمام البخار.. و(فيروز) حتطلي الحمد لله من كل علب الماكياج اللي عندها، ونصحتنى كالعادة إنها تقصلي الأطراف، وسرحت مع المقص وبقيت شبة مدام (رجاء الجداوي).

كلهم اختلفوا على رأيهم في الرجالة وأهمية الجواز.. لكن الغريب كلهم اتجمعوا عند الكوافيرة اللي بتضطبطهم عشان يعجبوا الرجالة.



ركبت العربية.. (ندا) كانت فاجأت (رامي) إن إحنا عندنا مشوار محترم..
 والمهمة لسة ماخلصتش.. هنروح نجيب الجزمة الكعب من عند (رنوش)
 بنت خالتي في الشغل.. (رامي) شغل الـ FM وعلّ الصوت يمكن عشان
 (موني) مايتكلمش أو يمكن عشان يقول لـ (ندا) "إيه المشوار ابن اللذينة اللي
 دبستيني فيه" وأنا ماسمعش!!

ركزت مع الراديو.. والمذيع كان بيقول: "مكملين معاكو مستمعينا سؤال
 الحلقة النهاردة (تفتكروا إيه أكثر دولة فيها عنوسة؟؟) ابعتولنا على صفحتنا
 على الفيسبوك... وعلى ماتعرفوا الإجابة.. (حسام حبيب) (زي الأيام دي)"

مش عارفة ليه افكرت أيام الجامعة.. لما (سيف) مكنش بينزل عينيه من
 عليا.. وكان بيحاول يقرب.. ولّا (عمر) اللي كان ساكن قصادنا لما كان
 بيستناني عشان نتقابل صدفة عند الأسانسير.. كان أقصى طموحه يقولي
 (صباح الخير).. ولا تبادل النظرات بيني وبين (يونس)... كان ممكن أوي
 أعيش قصة حب.. يا ترى أنا غلطت لما ضيعت الفرص دي؟! تجربة جواز

الصالونات ممكن تكون سهلة نوعاً ما على حد ماجربش يحب قبل كده.. لكن فكرة إنه داق طعم الحب، أو شكل من أشكال الحب، ويتجاوز بالطريقة دي.. حاجة مش سهلة!! بس هو معنى إنك دقت حاجة، وعجبتك تدفع منها من عمرك.. تفضل تستنى وتستنى صدفة!! طب ما الصدفة جت قبل كده كنت عملت بيها إيه!! يمكن الحكمة من أي تجارب سابقة ليك في الحب إنك تعرف قيمة اللي جي لو كان اللي راح ظالم.. أو تعرف قيمة اللي راح لو كنت انت الظالم.. وأهو لو اللي راح كان ظالم أهو راح.. ولو كنت إنت الظالم أديك عرفت.. عرفت نفسك.. آه التجارب السابقة بتخليك تعرف نفسك أكثر.. تعرف عيوبك تعرف ميزاتك.. تعرفك!!

<<رجعنا ليكوا مرة ثانية في حلقة جامدة جداً.. يا جماعة لو ولد عجبتة بنت يبروح يقولها.. بيبعت صاحبته.. بيطلب إيدها.. بيعرف يتصرف.. يا ترى لو بنت عجبتها ولد تعمل إيه؟ مستنين رأيكو في الموضوع الجامد ده.. (نانسي عجرم).. (حاجات تتحس وماتتقالش)>>

صحيح لو الولد بيدور على الحب ممكن يسعى ليه.. أنا كبت أسعى ليه إزاي! أدخل أعمله لايك على أي هيافة كاتبها.. ولا أتلحك بتليفونات ليه ملهاش مغزى.. دي حاجة لو بانتي إنها مصطنعة ترخصني قدامه أو على الأقل قدام نفسي.. أسعى ليه إزاي؟ كل ولد عنده ترموميتز لو حس بيه إن البنت اللي قدامه محتاجة ليه ولا بترسم عليه.. يا بيستغلها يا بيبعد عنها! أنا قليلة الحيلة ما مملكش إلا الدعاء!.... وهو الدعاء ده شوية! لازم أدعي.. أدعي وأنا واثقة إن ربنا هيستجيب! أيوة دي دعوة محتاج.. محتاج قلب حنين.. دعوة مسافر.. مسافر عن الناس.. دعوة مريض.. مريض بالوحدة.. دعوة مظلوم.. مظلوم من نظرة مجتمع.. أيوة أنا الناس دي كلها اللي ربنا بيستجيب لها.. ربنا هيستجيب لي إن شاء الله.

<<رجعنا ليكونا مرة ثانية مستمعينا.. (سوزان) باعثة بتقول إنها راحت قالت لولد مرة إنها بتحبه ونفضلها.. و(مارينا) باعثة بتقول الولاد كلهم صنف واحد خاينيين.. خاينيين.. خاينيين يا (معتز).. طب يا جماعة يا ترى ممكن تتجوزوا من غير حب؟ مستني ردودكو ورسايلكو على صفحتنا على الفيسبوك .. (جنات) (حب جامد)>>

إزاي من غير حب؟! الجواز من غير حب.. الجواز من غير حب زي صلاة من غير وضوء.. جرب تصلي من غير ما تتوضى.. هتبقى عامل نفسك بتصلي.. عامل نفسك بتسجد.. عامل نفسك بس.. لكن مابتصليش!! الجواز من غير حب برضه هتبقى عامل نفسك متجوز.. بتعمل حركات المتجوزين بس.. متجوز من برة بس.. الجواز حلاوته في التواصل الروحي مع الطرف الثاني!! أيوة وأنا عمري ما هتجوز من غير حب.. بس هسمح للحب يدخلي بأي طريقة ترضي ربنا، وترضي روحي، وترضي نظري لنفسي!!

<<رجعنا لكونا ثاني.. ويبقى سؤال الحلقة الأهم: (إيه أكثر دولة فيها عنوسة؟؟؟).. ناس بتقول مصر للأسباب الاقتصادية.. وناس بتقول السعودية للأسباب إنه مجتمع مغلق.. طيب مبدئياً أقل دولة عربية فيها عنوسة هي فلسطين، ودول عشان أصحاب قضية لا فرق معاهم أسباب أمنية، ولا اقتصادية، ولا مهر، وشبكة! أكثر دولة فيها عنوسة بأه مش هتتخلوا.. لبنان.. تخيلوا المزدي مش بتتجوز.. يا جماعة الموضوع ملوش علاقة بشكل ومقاسات الحاجات.. المشكلة في التحرر الزائد، والحب من غير قيود.. المجتمع هناك قعد يفتح يفتح لحد ما اتفشخ منهم!! رمان خلاص انفرط.. حبك ولا همي.. إنت اتماديت في الغلط ولا جوتلش لمني.. اتلموا بأه واتجوزوا! (محمد منير).. (يا حمام بتنوح ليه)!!>>



وصلنا عند شغل (رنوش).. كلمتها تنزلي.. قالت مش هتعرف تنزل، ولازم
أطلعها أنا، عشان عندها شغل.. المهم اتقابلنا..

أنا: "إيه يا بت كمية الولاد اللي انتي شغالة معاهم دول؟"

(رنا): "بس يا هبله وطي صوتك"

أنا: "كل دول ولسة ماطلعتيش بعريس!?"

(رنا): "الله يخربيتك هتفضحيني!"

أنا: "لا بجد ده وأنا داخله البنك عندك شفت حته طويل كده، وجايب
شعره على جنب كده إمّا إيه!" (صوت مصمصة شفايف).

(رنا): "آه آه ده (شريف).. جتك نيلة فقيرة ده بيشغل بيرد على
التليفونات"

أنا: "آه يعني زي (ميمي جمال) في أول أي مسرحية كده!! مم طب غيره ما الخير كتير أهوه!!"

(رنا): "فين ده ياختي؟"

أنا: "المكتب اللي جنب السلم لمحت حته شعر أسود سايح نايح كده"

(رنا): "آه آه ده (جلجل).. مش بقولك فقرية ده اللي بيصور"

أنا: "أوووه! فوتوجرافر يعني زي (سيد محمد) كده"

(رنا): "بيصور ورق ارحمي أمي!! ومين (سيد محمد) ده أصلاً؟"

أنا: "حد مايعرفش (سيد محمد)؟! ده أحسن واحد بيصور رجلين بنات.. بيطلعها أحلى من إيزي سويت!"

قعدنا نضحك، وبعدين قتلها:

- "يعني البدل دي كلها مفيش فيها حد أعمر عجبتيه!!"

(رنا): "المشكلة هنا شايفيني زي أختهم .. شوفتي الخيبة!!"

أنا: "لا ده إنتي كده حالتك صعبة.. فین الأمانة يا عسسسل؟"

(رنا): "على الله يعجبك بأة؟"

أنا: "العريس ولا الكعب؟"

(رنا): "بقولك قصة الجواز دي في الأول والآخر نصيب وعلم غيب.. بس أنا حاسه إنها هتتبط المرادي"

أنا: "هي الجملة دي بتتوزع عليكو ولا إيه؟!"

(رنا): "إنتي ايه المواصفات اللي عايزاها يعني؟"

أنا : "مم.. عايزاه يبقى ذكاؤه مزيج من (شيرلوك هولمز) على (سكوفيلد) بتاع بريزون بريك.. وأخلاقه مزيج من (أبو تريكة)، و(حازم أمام).. وشكله مزيج من (آسر ياسين) و(أحمد سعد) أو أي حد في آخر اسمه (خوري).."

(رنا): "لسة فيه شخصيات تعرفيها في حياتك هتخطيها في مهرجان القاهرة السينيمائي بتاعك ده؟"

(ضحكت)

(رنا): "بصي.. تخيلي يا (دينا) كده لو جيتي أجمد حاجة من كل مطعم.. يعني مثلاً البطاطس بتاعت ماك جامدة جيتيها.... ربع مشكل من أبو شقرة.. شوربة سي فوود من البرج.. ستافت كراست من بيتزا هت.. كول سلو من كنتاكي.. هتعرفي تاكلي الأكل ده مع بعضه؟"

أنا: "لأ طبعاً.. ده عك!!"

(رنا): "مع إن ده أحسن حاجة في كل مطعم فيهم.. لكن المحصلة أقل بكثير.. مش هتعرفي تستطعمي حاجة.. مش هتعرفي تتهني بكل الميزات اللي بتحبيها دي.. الكمال لله وحده.. والنقصان كمال الإنسان!"

أنا: "يرضيكي يبقى فيه في الدنيا (شاروخان) (براد بيت) (طوم كروز)، و(باسم مرسي) وأتجوز كرش!؟"

(رنا): "بعيداً عن باسم مرسي.. هقولك حاجة"

أنا: "إيه؟"

(رنا): "لما الواحد بيغير صورة البروفايل.. يفضل يختار من وسط صور كثير أحلى صورة ليه.. أحلى زاوية ليه! أهى أحلى زاوية دي هي اللي على طول عدسة عيني بتشوف بيها حبيبك! هم مش بيقولوا مراية الحب عامية.. في

الحقيقة عدسة الـ photographer الي جوة عنيكي هي الي ثابتة...
بتشوف كل زوايا حبيبك من زاوية واحدة.. فيبقى أحلى واحد!"

خت الكيس الي فيه الهاي هيلز ومشيت.. وبعد ما مشيت بشوية افكرت
إني عايضة أقولها تعدي عليا بالليل تاخذ الجزمة.. رجعت ثاني.. ببص لقيتها
واقفة مع ولد.. شكله عادي، بس وشه مريح، وضحكته حلوة، وعينيه مليانة
حيرة.. اتكسفت أروحلها.. بأة كده يا (رنا)، وعملاي فيها شريفة قال زي
أختهم قال.. بس واد عسول والله.. البت (رنا) دي حظها إيه (صوت
ممصصة شفايف ثاني)!!

صحيح الشغل ييفرق مع البنت مش قصة إنها بتقابل ولاد وبتوسع دايرة
معارفها بس! لكن البنت الي بتشتغل ميزتها إنها بتحتك بشخصيات جديدة
في حياتها بتعرفهم عن قرب.. بتعرف المطلقة، وأسلوب حياتها، وإيه الي
وصلها لكده.. بتعرف التعيسة الي وصلت للـ dead line في جوازها.. البنت
الي بتشتغل بتشوف مراحل مختلفة في الجواز.. والأهم من ده إن حياتها
مش بيبقى محورها الجواز، أو على الأقل واخد حيز قليل في تفكيرها! مش
زي البنت الي مش بتشتغل الي مقضاياها CBC سفرة وفاشون شو..
وبرامج مسابقات وتصويت من أول إكس فاكتر لحد برنامج الراقصة.. بعد
فترة بتمل، وبتكون المحصلة عندها طريقة عمل أكل غريب.. حب تركي..
وعاطفة جياشة.. ده كله هيخليها ماتفكرش غير في الجواز.. عشان ده الفعل
الوحيد الي هتخرج فيها شحناتها!



~~~~~

احتلت الدهشة وجه (منير)، بينما كانت (روزا) تسرد القصة.. أشار لها (منير) بيده كي تتوقف، وقال:

- "إنتي ماخديش بالك من حاجة؟"

رمقت (روزا) الأوراق، ثم نظرت له مرة أخرى.. اضيقت عينها، وقالت بنبرة متعجبة:

- "مش ده (محمد) بتاع القصة الأولى؟"

أشار لها (منير) بإصبعيه السبابة والوسطى، وكأنه يشير بعلامة النصر، وقال في هدوء:

- "حاجة من الاتنين: يا إن (محمد) و(دينا) الاتنين قدموا في المسابقة بقصتين، ودي طبعا تبقى صدفة مايتحصلش إلا بنسبة صفر في المية!!"

صمت لبرهة.. أومأت (روزا) برأسها موافقة على استبعاد هذا التعليل، أكمل (منير)، ولكن بنبرة غاضبة:

- "يا (هاني) بااااشا بيدور بقاله ساعة على حاجة معنا أصلا، واللي في إيدك ده يبقى بقيت أم القصة، ودي بتحصل بنسبة موظف غبي في اللجنة!!"

جذب الهاتف من فوق سطح المكتب، اتصل بـ(هاني)، ثم قال له ساخراً:

- "ها! يا (هاني) لقيت بقيت القصة"

صمت (منير)، ويبدو أن (هاني) قال له أنه مازال يبحث، ثم قال له بحدة:

- "إنت تكلم مؤلف القصة دي، وتخليه ييجي حالاً.. عشر دقائق يكون عندي"

قالت له (روزا) مستفهمة:

- "المؤلف ييجي ليه؟"

قال (منير)، وهو مازال غاضباً:

- "عشان نفهم القصة دي واحدة، ولا فيه حاجة ضايعة؟ نحكم إزاي كده؟"

سألته (روزا):

- "طيب نكمل قصة البنت على ما المؤلف ييجي؟ ده خلاص مش فاضل كتير"

أشار برأسه بالموافقة.. عاودت (روزا) القراءة.

~~~~~

روحنا البيت.. (ندا) وجوزها والعيال طلَعوا معايا يتغدوا، لأن طبعاً (ندا)

معايا من أول اليوم.. قلت أترفج على التلفزيون على ما تيجي ثمانية.

بقلب سريعاً في التلفزيون.. لاحظت إن مفيش راجل مكتفي بوحدة..

(مصطفى شعبان) كل حلقة بيتجوز واحدة.. (أحمد عز) كل فيلم بيتجوز

البطلة بس برة الفيلم.. مفيش مسلسل مافيهوش راجل مش متجوز اتنين،

أو بيخون مراته، أو مرتبط بزميلته، أو.. أو.. الوحيد اللي مش بيدخل في حوارات الحريم دي هو (يوسف الشريف).. بس يا عيني بقاله تلت أربع مواسم تايه ومتوهنا معاه! هو الراجل عايز إيه؟ إزاي الواحدة تقدر تملك الكائن ده.. الكائن اللي ملوش مسكة.. ده إزاي الواحدة تسيطر عليه ولا ترضيه!

لقيت (موني) بيندهلي ألعب معاه play station

(موني): "تعالى العبي معايا"

أنا: "مش بعرف يا (موني)"

(موني): "تعالى.. هعلمك.."

رحت مسكت دراع البلايستيشن.

أنا: "قول يا سيدي.. أعمل إيه؟"

(موني): "أنا وإنتي فريق واحد، وهنضرب الجيش ده كله.. امشي ورايا بس، ولما أقولك اضربي تضربي"

أنا: "أمشي وراك ليه؟ امشي إنت ورايا"

(موني) متعصب: "إنتي مش عارفة الطريق أصلاً.. وممكن الجيش الثاني يموتك"

لعبنا، وأنا بفكر في كلام (موني) بدقة... الراجل بيعب البنت تبقى وراه.. مش تقليل لقيمتها زي ما البنت فاكدة.. لا ده لسببين: الأول خوفه عليها بفطرة إنه مخلوق بمسؤولية حمايتها.. ويمكن ده بيخليه دايماً تحت ضغط.. السبب الثاني إنه شايف إنها مش عارفة الصح.. هو بيعتقد ده من واقع خبراته بالحياة.. البنت لازم تكون عارفة ده، وفاهمة إنها لو عارفة عنه في

حاجة ماتحسسوش إنه حمار.. تنصحه بس ماتتخطاهوش.. هيقبل هو النصيحة، وده اللي خلى وراء كل رجل عظيم امرأة.. وراء.. مش جنب ولا قدام.. وراء!

(موني): "جري إيه يا (دودو)؟ إنتي مش بتعرفي تلعبى وعمالة تخسري"

أنا: "أصلها لعبة صعبة يا (موني).. مانغيرها نلعب لعبة تانية"

(موني): "لا نلعب دي.. اللعب التانية أنا قفلتها كلها وخلصتها.. مش هلعب لعب خلصتها"

هنا (موني) نبهني لنقطة مهمة أوي.. الرجل لو قفل لعبة بيشوف غيرها.. حسيت إن (موني) بيقولي ماتخليهوش يقفلك.. خلي دائماً في مراحل جديدة.. صعبى المراحل عليه.. طول ما هو حاسس إنه ماوصلش للآخر هيفضل مستني لحد الآخر! ولو قفلك.. خليكي إنتي برضه اللعبة الجديدة.. غيري من شخصيتك.. طوريتها.. غيري من شكلك.. لون شعرك.. غيري من المكان.. من الروتين!



الساعة جت ثمانية.. قمت ألبس وأجهز.. العريس قرب بيجي، والفصل الثاني قرب يخلص، وأنا لسة ماقتنعنش بجواز الصالونات!

طلعت الشيميز الجديد.. بس ماحسيتوش كده! فتحت الدولاب لقيت شيميز فوشيا.. قديم صحيح، بس بحبه! قعدت نص ساعة مش عارفة ألبس إيه! طحيت الشيميزين على السرير متنحة قدامهم زي ما أكون مستنياهم يتكلموا معايا يقنعوني بنفسهم!

قلت أروح لماما أسألها.. دخلت عليها لقيتها بتتكلم في التليفون.

ماما: "تؤ.. تؤ.. تؤ.. يا ساتر يا رب!"

أنا: "إيه يا ماما فيه إيه خير؟"

ماما: "لأ.. لأ.. مش ممكن"

أنا: "إيه يا ماما خير؟"

ماما ردت عليا: "ده خالتك كان عندها طقم كاسات.. كاس منهم وقع
اتكسر"

أنا: "طب وإيه المشكلة؟! حصل خير يعني"

ماما: "الكاس ده بأة كان عاجب مين! مرات خالك من تلت سنين.. واتكسر
النهاردة.. عينها وحشة!"

أنا: "من تلت سنين.. يا سلام! شوفي إزاي!"

ماما: "إنتي مالبستيش ليه؟ الناس جاين.. اجرري يا بت!"

رجعت تاني أوضتي.. وقفت قدام الشيميزين.. محتارة ألبس إيه؟ هو
النهاردة يوم الحيرة العالمي ولا إيه؟! أنا عاملة في نفسي كده ليه؟ ما ألبس
أي حاجة هو أنا هقابل أمير كان؟! جت قدامي صورة قعدة الطنطانات اللي
كلها مصمصة وأسى... طنط (إيناس): "هم اتعموا"... طنط (منى): "معلش
يا حبيبتي"... طنط (إيمان): "قلبي عندك"... صورة ماما.. "ماتشيليش ولاد
أختك في الفرحة لا يفكروه ولادك"... صوت ردود صاحبتى لما فجأة لقيتها
اتخطبت، وخافت تقولي لأحسدها: "لأ.. والله أنا كنت كده كده هقولك..
الموضوع بس جه بسرعة.. هو اتقدم امبارح، وكان جايب معاه الجاتوه،
والورد، والشبكة، والمعازيم، وهو جي"... صورة بابا.. "ومين هيوديكي
ويجيبك.. لأ مفيش نزول"... صوت اللي بيعاكس.. "أموت أنا"... نظرات

أسى.. صعبانيات.. مصممة شفايف.. طبطبة.. زعيق.. ضغط.. حبس..... لأ!
لأ! لأ! لأ!!!!!!!!!!!!!! بس! العب غيرها يا ضميري.. هو أنا هتجوز عشان
كده؟! هو ده أخرك يا ضميري؟! عايز تقنعني إن عشان أهرب من دول
أتجوز؟! لأ.. شوف غيري.. أنا مابخافش إن القطر يفوتني.. ولا حد هيزقني
على القطر.. القطر يفوتني أحسن ما يوصلني محطة مش عايزة أروحها!

دخلت ماما عليا، وأنا لسة واقفة متنحة قدام الشيميزين، وقالتلي:

- "ينيلك! إنتي لسة مالبستيش!؟"

بصتلها..

قالتلي: "الجماعة جم"

قلتله: "مش عارفة ألبس إيه!"

ردت ماما: "البسي اللي تلبسيه.. المهم تلبسي!"

صح هم ميههممش ألبس إيه.. المهم ألبس وخلص.

خدت الشيميز الفوشيا، وقلت:

- "أنا هلبس اللي يريحني"

الباب خبط!



(٣)

دق الباب، مال (منير) برأسه يميناً ناحية الباب المغلق، في حين أن (روزا) قد انتهت من قراءة الأوراق التي بين راحتيها.. مال (منير) ناحيتها مرة أخرى متجاهلاً الباب، وقال لها:

- "إيه كده خلصت؟"

أومأت برأسها، فقال (منير) في تعجب:

- "أنا مش عارف إيه حكاية القصة اللي بتخلص على إن الباب بيخبط دي!"

دق الباب مرة أخرى.. تذكر (منير) أنه لم يجب في المرة الأولى، قال بصوت مرتفع:

- "اتفضل"

دخل (هاني)، وخلفه شاب في أواخر العشرينيات، قال (هاني) بصوت منهك مشيراً إلى الشاب:

- "أستاذ (محمد) المؤلف، رحت جفته من بيته يا فندم"

ابتسم (منير) لـ(محمد)، ومد يده لمصافحته، ثم أمسك بالأوراق، وأعطاهما له، وقال:

- "أولاً إحنا آسفين إن إحنا تعبناك معانا.. ثانياً هي قصتك كده يا (محمد)، ولا ناقص منها حاجة؟"

تصفح (محمد) في أوراق القصة سريعاً، ثم تعجب، وعاود تصفحها مرة أخرى، ثم قال:

- "آه ناقصة.. فيه جزء فصحي في الآخر ناقص"

مدت (روزا) يدها بالجزء المكتوب بالفصحى، وقالت مستفهمة:

- "هو ده؟"

نظر له (محمد)، وهو مازال في يدها، وحرك رأسه بالإيجاب، تدخل (منير) في هذه اللحظة، وقال:

- "وليه تعملها عامية على فصحي؟"

رد (محمد) بثقة:

- "أنا كتبت شخصية الولد والبنت عامية، وقلت أعمل شخصية راوي القصة شخصية تالته، وقلت بصراحة عشان أوري حضراتكو إن ليا قدرات أدبية"

صمت (منير).. لم يفهم (محمد) ما يجول بخاطر (منير)، ثم سأله (منير) ليكمل قراءة الجزء الفصحى، أخذ (محمد) الجزء المتبقي، وشرع في قراءته.

~~~~~

دق الباب.. هي على يقين من إنه هو... فهي لا تختلط عليها الأمور، فلا تستطيع أن تفرق بين دقات قلبها ودقات الباب، إلا حينما يكون هو من يطرق بابها... وهى بالفعل في انتظاره، فقد قضت ساعتها السابقة في محاولاتها للتزين، حتى تبدو في أبهى صورها، لتليق بنظرة عينيه العاشقة... أشارت لوالدتها بأن تتراجع، فهي من ستجيب الطارق... أوقفتها مرآة في طريقها، فلم تستطع تجاهلها حتمًا.. فعلاقة المرأة بالمرآة ربما تكون أقوى من علاقاتها ببعض أفراد أسرته، حتى إن أحرفهما متطابقة، فرمما سميت باسمها، وحرفت همزتها قليلًا، ونطقت بشكل مختلف... ألقت نظرة سريعة

حتى يطمئن قلبها... عدلت هندامها، وعندما تأكدت من أن كل شيء على ما يرام فتحت الباب... تلاقت أعينهم التي اختفت ملامحها خلف ستائر الأشواق... لا تدري ما الذي يحدث لها حينما تراه... وهو كذلك لا يعرف ما الذي ينتابه حينها... لو أنها كانت تؤمن بتلك الأساطير الخرافية القديمة لجزمت بأنه هو نصفها الذي تحدثت عنه الأسطورة اليونانية... فقد قرأت يوماً أن إحدى تلك الأساطير تقول بأن الإنسان خلق في البداية على هيئة واحدة.. جسد واحد برأسين، وثمانية أطراف... وكان يشعر بالاكتمال والسعادة... إلى أن غضب عليه كبير الآلهة (زيوس)، وشطره إلى نصفين.. رجل وامرأة.. وعاش كل نصف فيهما يبحث عن نصفه الآخر الذي يكمله... وكلما رآته شعرت أنه نصفها الذي أكملها... وهو كذلك لم يشعر باكتماله حقاً إلا عندما وجدها... شعر أنها ضلعه الذي فقده... شعر أنها حواؤه التي خلقت من أجله.

كان يبدو عليه الإرهاق الشديد... وكأن النوم لم يزر أجفانه منذ أيام... وإن لم يمنعه ذلك من مداعبة شعرها الأسود الطويل.. لف ذراعيه حول خصرها، فابتسمت، وهمست:

- "حبيبي.. وحشتني... اتفضل يا حبيبي... اتفضل في الصالون"

جلسا متلاصقين... لا يسمحان حتى لنسمة هواء أن تعبر من بينهما... صامتان... فقد خلق الصمت لمثل هذه اللحظات... فقط يتأمل عينيها... فقط تتأمل عينيها... تاهتا في تفاصيل ملامحهما... يستمع بإنصات شديد إلى نغمات أنفاسها الثائرة... إلى دقائق قلبها الصاخبة... وهي كذلك تفعل... هربت أنامله، لتبحث عن يدها... تداعبها بلمسات ناعمة، وكأنها تطلب موافقتها أولاً، قبل أن تقبض عليها يده... ترك أصابعه تحضن أصابعها الرقيقة... تركها تنعم بنعومة ملمسها، فيحسدها باقي أعضاء جسده... إلا

أن شفتيه لم تكتفي بالحسد، فدفعته غيرتها لتطبع قبلة ناعمة على هذه اليد التي يعشقها، ويعشق صاحبها... فيتلاشى الزمان والمكان، وتتبدل كل الأشياء حولهما... فكأنهما ينتقلان إلى عالم آخر، وزمن آخر.. فتبدل هذا الصالون الذي يجمعهما بمكان مليء بالسحر... مكان أكثر إشراقاً... فأصوات الشارع المزعجة أصبحت في أذنيهما أصوات أمواج تتسابق لتصل إلى الشاطئ... ورائحة طهي والدتها أصبحت في أنفيهما رحيق الياسمين... ونبت أشجار عالية أحاطتهم بظلالها... حتى ذاك النيش المزعج بدا في أعينهم كوخاً صغيراً من الخوص يعدوان للاختباء داخله... كل الأشياء تبدلت... تحول هذا الصالون المذهب القديم إلى شاطئ لجزيرة من جزر اليونان الساحرة.. نعم، فالحب يحول الواقع خيالاً... بل إن شدة الحب وقوته قادرة على الإتيان بهذا الخيال مسحوباً من ياقة قميصه عنوة، وإجباره على أن يكون واقعاً.. فليست هناك قوة في العالم بقادرة على ردع خيال عاشقين أو تقييده... ابتسم إليها، وداعب صوته أذنيها هامساً.

(محمد): "أنا مش مصدق كلها كام يوم وجمعنا بيت"

نظرت إليه، وهي مازالت هائمة يطل من عينيها بريق العشق، وأجابته:

(دينا): "هو معقول أنا هصحى كل يوم أفتح عيني عليك!"

فطبع (محمد) قبلة ثانية على يدها التي مازالت محتفظة بموقعها بين يده.. وعاد للحديث ثانية.

(محمد): "أنا أصلاً لسة مش مصدق مفاجأة إن إحنا اتكتب كتابنا"

(دينا): "إنت عارف إن كمان أسبوع هيبقى عدى سنة على أول مرة اتقابلنا فيها"

(محمد): "ياااه!... إنتي عارفة أحسن حاجة في الموضوع ده إيه؟"

أجابته بنظرة متسألة، فأكمل حديثه:

- "أول يوم اتقابلنا فيه هو نفسه يوم الفلاتين يا حياتي... يعني مش هجيب إلا هدية واحدة"  
فأجابته ضاحكة:

- "ده كل همك يا (البخيل وأنا)"

مر قرابة العام على لقائهما الأول... عام واحد فقط كان كفيلاً بأن يحول  
تردده في التحدث إليها إلى عدم الكف عن تقبيل يديها... عام واحد فقط  
كان كفيلاً بأن ينبت في قلبه شجيرة عشقها التي تزداد نضارة كلما مرت  
الأيام... عام واحد فقط كان كفيلاً بأن يحوله من ذاك الوحيد المنسي الذي لا  
يدق هاتفه إلا برقم والديه، وتتملك الغيرة منه كلما رأى عاشقين... إلى هذا  
الذي يحظى باهتمام تلك الفتاة التي ملأت حياته سحراً وعشقا، ولونت  
بفرشاتها حياته الرتيبة بألوانها المبهجة، فجعلته فرحاً، سعيداً، منطلقاً، قادراً  
على أن يتحمل كل سخافات الحياة، بل ويقاومها بابتسامته، وبإصراره على  
أن يكون سعيداً....

ثم فجأة قملكته نوبة من الضحك الهستيري، مما أثار فضولها واستغرابها  
كذلك، فسألته.

(دينا): "مالك يا (محمد)؟ فيه إيه؟"

(محمد)، وهو يلتقط أنفاسه: "أصلى افكرت يوم ما كنت مستنيكي في  
العربية تحت وقمتي... قمتي راكبة عربية واحد تاني"  
فانتقلت عدوى الضحك إلى (دينا) كذلك قبل أن يكمل كلماته وأجابته  
ضاحكة.

(دينا): "أنا كنت ماسكة الموبايل مش مركزة، وركبت، ولقيت الرجل مبرقلي... كنت فاكدة إنك بتبصلي عشان اتأخرت في اللبس.. ومردتش أبصلك، وفضلت باصة في الموبايل"

(محمد)، وقد اعتلت علامات الجد ملامحه:

- "أنا كنت نازل مش عارف أزعلك، ولا أزعل للراجل، وأول ما قربت من العربية بتاعت الراجل السلفي ده..." (ثم عاد للضحك من جديد)... "لقيته عمال يقولك (أستغفر الله العظيم)، وبعدين بفتح بابك لقيتك بتبصلي بصة"

خبأت (دينا) وجهها بكفيها، فشعرت بالخجل الشديد، وحاولت أن تخبئ ضحكتها كذلك، وأجابته:

- "ما أنا قلت أومال مين اللي جنبني ده؟!... عفريت؟!... هو في عفريت بيستغفر!!!"

وأكمل (محمد) ضحكه، وهو يعاود الإمساك بيديها ثانية، ثم قاطعته (دينا) بجدية قائلة:

(دينا): "استنى.. استنى.. أنا مش ناسية يوم ما طلعتنا في الأسانسير، والنور قطع"

فأكمل (محمد) حديثها، وهو يحاول كتمان ضحكه..

(محمد): "وأبوكي قام خارج من الشقة، وعمال يقول: "أنا شايفك.. إياك تلمسها"

(دينا) مكلمة حديثه: "قام بابا يا عيني من لخبطته قال (أنا نازل أجيب النور أهوه)"

(محمد) منفجراً من الضحك: "انتو مبتزدوش ليه؟... بؤك مشغول في إيه يا ابن الكلب!؟"

(دينا): "مه داش إلا لما أنا قتلته (دي [صباح] مرات البواب معنا)"

(محمد): "ساعتها عم (سعد) البواب قال (يا سنة سوخة! مبتزديش ليه يا بت يا (صباح)؟ بؤك مشغول في إيه!؟"

استمروا هكذا في الضحك، حتى راجت أعينهم بالدموع... ليست دموع الفرحة بقدر ما هي دموع الاستقرار... دموع الطمأنينة... دموع السكينة... كان يشعر في تلك اللحظة شعور ذلك المستلقي أمام البحر مسترخياً يتأمل البحر، ويداعب أذنيه صوت (نجاة) الملائكي ممتزجاً بصوت الأمواج... كان يشعر في تلك اللحظة بشعور العائد إلى بيته أخيراً بعد رحلته الشاقة في الصحراء، فضمته والدته إلى صدرها، ثم ألقي بجسده المتعب على سريريه ليرتاح... كانا يشعران بإحساس البيت، فكانت هي بيته، وكان هو بيتها... الآن فقط أدرك المعنى الحقيقي للآية الكريمة: ﴿ومن آيته أن خلق لكم من أنفسكم أزواجاً لتسكنوا إليها﴾... كانت توقفه دائماً كلمة (تسكنوا)، وتساءل لماذا استخدم رب العالمين لفظ السكن تحديداً؟؟ لماذا لم يقل (لتعيشوا).. لتهنؤوا.. لترتاحوا.. لتتعايشوا.. لتسعدوا؟؟... والآن أدرك المعنى، وتوصل للإجابة... فالمرأة حقاً هي السكن، وفي طيات هذا السكن توجد كل تلك المعاني النبيلة الأخرى.

ذهبت (دينا) لتحضر بعضاً من الشيكولاتة التي يفضلها (محمد)... لم تغب كثيراً... بل أتنه بعد لحظات قليلة... ولكن تلك اللحظات القليلة التي غابت فيها عن عينيه كانت كفيلة بأن تجعله يشفق إليها، فخطر بباله هاجس شيطاني مزعج... تلك الهواجس التي تأتينا عندما تتملكنا السعادة، فنخاف



أن نفقدها، أو يحدث لنا شيء سيئ، فدائماً نسيء الظن بهذه الحياة... فعندما تضحك لنا هكذا نشعر وكأنها تضع قطعة السكر في فمنا، لتمهد لنا أن مرارة الصبار قادمة لا محالة... يتساءل هل هذا ما تخطط له الحياة حقاً؟؟... ولكنه ينفذ رأسه من هذا الهاجس السخيف، ويطمئن ذاته بأنه تناول الصبار أولاً، وليس من العدل أن يتناوله ثانية... ويدعو ربه أن لا يحرمه من تلك السعادة.. ألا يحرمه من (دينا) يوماً.

تسير نحوه في دلال، فيتأملها بنظرة المشتاق الضمآن الذي قارب على الوصول إلى مائه التي يريدتها... يبتسم، فهو تقريباً لا تفارق البسمة ثغره أثناء وجوده معها، فكلما رآها تخرج البسمة من بين ثنايا وجهه، لتحتل موقعها على شفثيه، وتأتي أن تتزحزح عن مقعدها.

وبينما تناوله الشيكولاتة تسأله:

(دينا): "بالنسبة لشهر العسل.. هنروح فين بأة؟"

(محمد): "إن شاء الله هيبقى في جزر المالديف"

(دينا)، ضاحكة: "إنت لسة مقتنع إن إحنا هنكسب في المسابقة؟"

(محمد)، واثقاً: "طبعاً متأكد"

(دينا): "يا ابني دي مسابقة أجمل قصة رومانسية"

(محمد)، مستنكراً: "طب ما إحنا قصتنا رومانسية... مش معنى إن إحنا اتقابلنا في الصالون إنها متبقاش رومانسية!"

فأجابته (دينا) بنظرة غير المقتنع بالحديث، فأكمل (محمد) حديثه ثانية...

(محمد): "فيه رومانسية أكثر من اتنين بيبقى في بينهم تزامن في إحاسسهم.. تطابق في أحلامهم... أنا بسكت معاي أكثر ما بتكلم... إنتي عارفة كل الي

الكلام الي متقالش... فيه رومانسية أكثر من إننا نكون على طبيعتنا، مفيش تكلف، مفيش تمثيل؟؟ إحنا كده ولا مش كده يا (دينا)؟"

ثم أكمل (محمد) كلامه بنبرة أقل حدة، وأكثر حنانًا، وقال

- "أحلى حاجة في الدنيا الحاجة الي بتيجي ومش متخطلها.. سفريه.. فلوس.. شوكلاتة.. أي حاجة مش معمول حسابها.. حب بالصدفة! الحاجات الي بتبقى ماشي عادي في روتينك، وعرقان، وحالتك بالبلا، وتفاجأك بتبقى حلوة أوي.. هدايا ربانية! إنتي كنتي هديتي يا (دينا)"

وشعرت (دينا) بضيقه، فحاولت احتوائه، فقالت مداعبة:

- "بس.. تعالى هنا أحمادة أحبيب قلبي... مين (شاهندا دلعو) دي؟!... إنت شكلك هتخليني آجى معاك البنك.."

فعادت الضحكة ثانية لتشرق وجهه، ثم أكملت هي حديثها...

- "عجبنى أوى المشهد الي كتبتة بتاع... الجزمة الكعب... تحفة"

(محمد)، متحمسًا:

- "على فكرة إنتي الي طلعتي كاتبة شاطرة جدًا"

(دينا)، متفاخرة: "بجد!؟"

(محمد): "آه والله.. ده إنتي عديتي أحلام مست.. مست.. مسسغت... مين؟"

(دينا)، ضاحكة: "(أحلام مستغامي).. (مستغامي) وحياة أمي"

ضحكا كثيرًا... فأبسط الأشياء مع من نحب تضحكنا، حتى وإن بدت للآخرين سخيفة... ثم عادت تقول:

- "طب إنت ناوي تعمل النهاية إيه؟"

(محمد): "لسة مش عارف"

(دينا): "يا ابني ده معاد المسابقة كمان كام يوم.. فاضل يومين على الفلانتين!"

(محمد): "المسابقة دي كنت هموت وأدخلها السنة اللي فاتت.. بس الحمد لله هدخلها السنادي، وهنكسب"

(دينا): "إن شاء الله يا حبيبي.. بس برضه ماجاوبتنيش. ز إنت وقفت لحد ما خبط على الباب، وأنا وقفت عند نفس الحتة.. هتنهيه إزاي؟"

(محمد): "طب إنتي رأيك ننهيه على المقابلة اللي كانت بينا؟"

(دينا): "بس دي هتبقى نهاية تقليدية أوى ومتوقعة"

(محمد): "بس أكيد القارئ هيبقى نفسه يعرف إيه اللي حصل بعد ما خبطت على الباب"

(دينا): "يعني هيحصل إيه يعني؟"

(محمد): "ده كفاية يا بنتي منظر ك ومنظري وإحنا عارفين بعض، ومش عارفين بعض في نفس الوقت"

(دينا تنظر إلى أعلى، ثم تنظر إليه، وهي تتذكر الموقف):

- "يومها أول ماشوفتك كنت عايزة أقولك (إنت إيه اللي جابك هنا؟)"

(محمد): "لأ إنتي قلتي كده فعلاً بصوت واطي"

(دينا)، ضاحكة: "دي زي (بأة ولا إيه) عندك كده؟!"

(محمد): "أنا أول ما قعدت معاي كنت عايز أقولك أنا شوفتك قبل كده..  
وخفت لا تفتكره جو رخيص"

(دينا): "بس بجد يا (محمد) إنت أول ما قعدت معايا أنا كنت عارفة إنها  
مش هتبقى آخر مرة"

(محمد): "إنتي عارفة إن فيه حاجة في صوتك أول ما سمعته حسيتها"

(دينا)، مستغربة: "حاجة إيه؟"

(محمد): "ماعرفش إيه، بس يومها كل الضغوط اللي عليا اختفت، وحتى  
بعد كده كل ما أبقى شايل هم.. صوتك بقى يشيله عني"

صمتا لبرهة، كل منهما يتذكر وحدته قبل لقائهما، وونسه بعد اللقاء، ثم  
ابتسما في نفس اللحظة، وقال (محمد):

- "إنتي عارفة إن الابتسامة اللي أنا وإنتي بنبتسمها في نفس اللحظة بعد  
سكاتنا أحلى من (بحبك)؟"

ابتسمت (دينا)، وهي تفكر في كلامه العذب، ثم انتفضت، فهي تذكرت  
شيئاً.

(دينا): "إلا قولي صحيح.. إنت سميت القصة ولا لسة؟"

(محمد): "بفكر أسميها (رُبّ صدفة)"

(دينا): "تصدق حلو... بس مش معبر أوي عن قصتنا"

(محمد): "طب (يدق الباب)!"

(دينا)، ضاحكة: "ده على أساس إن الرواية فيها دق كثير"

(محمد)، ضاحكاً: "ولا يدق الباب دي تزعل (عمرو دياب)!"

(دينا): "طب فكر في حاجة ثانية!"

(محمد): "أنا في اسم ثاني متردد فيه"

(دينا): "مدام متردد يبقى هيطلع حلو... ما إنت كنت متردد تقابلني"

(محمد): "إيه رأيك في (اتفضل في الصالون)؟"

لم يستقر (محمد) بعد على النهاية.. ولم يستقر كذلك على اسم الكتاب... ولكنه استقر أخيراً على الأهم من ذلك بكثير... استقر على (دينا).

ويبقى السؤال الأهم... ماذا حدث؟... كيف أحبها؟... كيف أحبه؟... متى حدث ذلك؟... هل حدث أثناء تلك المقابلة الأولى التي جمعتهم في المنزل، أم حدث قبل تلك اللحظة وقت أن رأى أحدهما الآخر مصادفة في البنك، وهما لا يعرفان بعضهما؟

ماذا حدث؟ ما السر؟

لا أدري... هل السر في المفاجأة؟!... أن تنتظر شيئاً ما، فتجد ما هو أجمل في انتظارك... ما لم تتوقعه... ربما.. فالمفاجآت تثير مشاعرنا... تأسرنا... فكيف إن كان الشخص نفسه هو المفاجأة؟!... لا أدري هل هي رغبة تكونت لإحساسك بأن هناك شيئاً امتلاكه مستبعد.. وأصبح متاحاً لك؟!

ماذا حدث، وما السر؟

لا أدري.. هل حقاً هناك حب من النظرة الأولى؟... لا أستطيع الجزم بوجوده، ولكنني أستطيع الجزم بوجود إحساس مختلف تجاه شخص بعينه منذ اللحظة الأولى.. فهذه حتماً لم تكن نظرة العين الأولى، فقد رأت العين الكثير من الجميلات، لكنها قطعاً أول نظرة يصاحبها هذا الإحساس...

إحساس الراحة.. الطمأنينة.. الرغبة في إطالة هذه النظرة الأولى إلى آخر نظرة في العمر!

ماذا حدث، وما السر؟

لا أدري... هل السر في (الديچا-فو) بمعنى (شوهد من قبل)... إنك تخيلت هذا الشخص، ولو للحظات قليلة ملكك... فوضعت في خانة الحبيب... وكأنك حلمت به وأنت بكامل وعيك... ربما هذا ساعد قليلاً!

لا أعلم... هل السر في الإشارات؟... تلك العلامات التي يرسلها لنا القدر... هل تؤثر في توجهاتنا؟ إذا كان القدر يرسل لنا رسائل في مواقف معينة... كلمة.. أغنية... هل نستطيع استيعابها، وهل نستطيع قراءتها، وفهمها بشكل صحيح؟!

ك(دلق القهوة خير) مثلاً... دلق القهوة هي رسالة القدر... خير هي ترجمتنا لهذه الرسالة... هل ترجماتنا صحيحة أم إنها مرآة لما بداخلنا.. لما نتمناه (دلق القهوة مش خير.. ده بيبقع!)

~~~~~

انتهى (محمد) من الأوراق التي بيده، ثم قال مصدوماً:

- "ليه ده؟ ناقص ورقة!"

مسح (منير) بعينه سريعاً سطح المكتب باحثاً عن الورقة التائهة، ولكنه لم يجدها.. بحث (روزا) هي الأخرى أسفل مقعدها. أما (محمد) فكان يحرك عيناه في جميع الأنحاء، حتى سمعوا صوت (هاني) فرحاً:

- "لقيتها أهي.. لقيتها أهي.."

تناولها (منير) ثم قرأها في صمت، ثم ضحك، وقال لـ(محمد):

- "هتجيبلي إيه من المالديف؟"

ضحك (محمد)، وهو لم يفهم هل أعجبت (منير) حقًا؟ هل هو الفائز أم إنها مجاملة؟ فرح، ليس لأنه سيسافر، بل لأن روايته فعلاً تستحق أن تكون رومانسية.

بدأ (منير) في قراءة آخر صفحة في القصة بصوت مرتفع، وهو مبتسم على غير عادته.

~~~~~

ماذا حدث؟

لا أعلم... هل حقيقة الحب إنك صاحب الاختيار، أم أنها حقيقة السعادة في حد ذاتها؟ أن لك مطلق الحرية لست مقيداً!... ربما.. فمن الممكن أن ترفض نفس الاختيار لمجرد إحساسك بأنك مجبر عليه!... تخيل معي أن تدخل أحد المطاعم، فلا تجد في قائمة الطعام سوى نوعاً واحداً فقط... فحتى وإن كان المفضل لديك لن تشعر بالراحة التامة، وأنت تختاره.. بالعكس لو كان ضمن العديد من الاختيارات الأخرى!

نعم.. فالسعادة تكمن في حريتك في الاختيار، حتى وإن أخطأت الاختيار!  
فالله ميز الإنسان عن الملائكة بالاختيار... نعم، فالإنسان مخير في محيطه...  
مسير بوجوده في ذلك المحيط بالتحديد!



(رنا): "ألو"

مامت (محمد): "السلامو عليكو"

(رنا): "أيوة يا طنط... أنا (رنا جمال إسماعيل) زميلة (محمد) في البنك"

مامت (محمد): "أهلاً.. أهلاً.. إزيك يا حبيبة قلبي؟"

(رنا): "طنط أنا جايبة لـ (محمد) عروسة"

مامت (محمد): "بجد والله؟... مين يا حبيبتني؟"

(رنا): "بنت خالتي.. (دينا)... حساهم لايقين على بعض كده"

مامت (محمد): "والله ده إحنا نتشرف... يا خبر... قوليله بس إنتي عارفة  
(حمادة) مايعجبوش العجب ومغلبنا"

(رنا): "أيوة يا طنط، وعشان عارفاه هنغير الطريقة بأة"

مامت (محمد): "إزاي يا حبيبتني؟"

(رنا): "هنخلي (محمد) يشوف (دينا) قبل ما يشوفها، ويختارها، ولو بنسبة  
١%.. ١% اختيار حر هيفرق معنا كتر أوي"

مامت (محمد): "طب هنعمل إيه؟"

(رنا): "عمو بابا (محمد) هيكلمه يقوله إنه قابل واحد صاحبه الي كان  
شغال معاه في الكويت، و...."

♥♥♥ تمت ♥♥♥

محمد محسن



## الفهرس

|    |                        |
|----|------------------------|
| ٧  | المقدمة                |
| ٨  | المقدمة بجد            |
| ١٢ | ( ١ )                  |
| ١٥ | باور رينجرز وقت التحول |
| ١٧ | (عمرو) القديم          |
| ٢١ | الأساتوك ده            |
| ٢٥ | ماتقولش لحد            |
| ٢٦ | الأضواء                |
| ٢٩ | كلبك الساحر            |
| ٣٠ | ١٤ فبراير              |
| ٣٢ | حديث الروح             |
| ٣٣ | شيرين سيف النصر        |
| ٣٥ | لانسر بطة              |
| ٤٢ | اخترنا لك              |
| ٤٥ | طعم إيه؟               |
| ٥٠ | أوه تحدي               |
| ٥٣ | كلام من ذهب            |
| ٦٢ | العلم والإيمان         |
| ٦٦ | فقرة إعلانية           |

|     |                            |
|-----|----------------------------|
| ٧١  | .....ماما نجوى وبُقلّظ     |
| ٧٦  | .....إخراج راند لبيب       |
| ٧٩  | .....نهاية الإرسال تشششششش |
| ٨١  | ..... ( ٢ )                |
| ١٤٢ | ..... ( ٣ )                |
| ١٥٧ | .....الفهرس                |

للتواصل مع الكاتب:

**[facebook.com/MohamedMohsen84](https://facebook.com/MohamedMohsen84)**

**[facebook.com/Etfadalfeelsalon](https://facebook.com/Etfadalfeelsalon)**

## ◀ إصدارات دار الفؤاد للنشر والتوزيع ٢٠١٦ ▶

| المؤلف                | النوعية       | الكتاب                           |
|-----------------------|---------------|----------------------------------|
| عبد الحميد السنيسي    | أدب رحلات     | دقات على باب الغربية             |
| محمد عبد الغفار       | توثيقي        | ثورة محظورة النشر - ط٣           |
| رباب فؤاد             | رواية         | أزمة ثقة - ط٢                    |
| دعاء سيف              | مجموعة قصصية  | ولادة متعسرة                     |
| محمد سمير رجب         | مجموعة قصصية  | أقرباذين                         |
| كتاب جماعي            | كتاب جماعي    | حب في زمن الثورة                 |
| سناء البريتي          | رواية         | نقطة.. رجوع إلى السطر            |
| محمد عبد العاطي       | رواية         | أصل الحكاية                      |
| محمود الجوهري         | ديوان شعر     | ورقة في دوسيه                    |
| أدمنز صفحة الضاكتور   | كتاب ساخر     | شعب مالوش كتالوج - ط٢            |
| مصطفى محمود           | كتاب تحفيزي   | انتفاضة العملاق الداخلي          |
| عبد الرحمن سعيد       | شبابي         | خطوة لربك                        |
| رضا ربيع              | رواية         | التوقعات المرئية للخطوبة المصرية |
| سلافة الشرقاوي        | رواية         | زوجة مستقلة                      |
| إسلام علي/إلهامي مجدي | رحلة فانتازية | فانتوبيا                         |
| آلاء زهير             | تلوين للكبار  | حياة خفيفة على جناح فراشة        |
| محمود إمام            | توثيقي        | شمس بين الضباب                   |
| عبير جمال الدين       | تأملات        | مرايا الروح                      |
| عبير جمال الدين       | مجموعة قصصية  | بعض منا                          |
| ميرفت البلتاجي        | رواية         | ناريسا                           |
| محمد محسن             | رواية         | اتفضل في الصالون                 |

